


# WANTOK



Wan Wik, Jun30 - Julai 6, 2005 NAMBA 1615 Niuspepa bilong yumi ol PNG stret! K1.00 long Mosbi tasol - Ausait Mosbi K1.30



### Kala bilong PNG ats...


OL DISPELA lain lokol atis i bin kamapim liklik ekspu bilong ol yet ausait long Hideaway Hotel las wik. Ol i salim ol piksa ol i penim ol yet. Maski ol i nogat sans long stap insait wantaim ol arapela lain, planti manmeri i go kam long ekspu i bin raun lukim hat wok bilong ol tu. Lukim moa piksa bilong Lukim PNG Nau Expo long PES 24. *Poto: ANDREW MOLEN*



**KABUI MAKIM RDT  
BILONG NUPELA  
BOGENVIL - PES 19.**



**PES 3: Ol nes i ken  
kisim mekimsave**



**PES 7: Moball skwat  
kisim trening long palt  
egensim ol teroris**



**Origin 3 privit  
- Pes 29**

## Gumi insait long tinpis em i tok giaman: RD

Michael Novingu i raitim

TINPIS we bikpela tinpis kampani long Madang, RD Tuna Cannery i mekim i no inap i gat gumi o karamap bilong sem insait long en.

Dispela em toktok i kam long RD Tuna Cannery bihain long ol i mekim wok painimaut

sapos gumi i ken stap insait long tinpis.

Dispela wok nau em i bekim bihainim wanpela ripot i kamap long wanpela arapela niuspepa long sampela taim i go pinis we wanpela meri bilong Bumbu polis bareks long Lae i tok em i painim wanpela gumi insait long tinpis we RD Tuna Cannery i wokim long fektori bilong ol long Madang.

Bihainim dispela komplek, ol kampani opisa i karimaut wanpela wok painimaut we ol i putim gumi i go insait long tinpis, kukim na karim i go long Lae we ol i sekim na skelim wantaim dispela gumi ol i painim insait long tinpis.

Moa stori i stap long PES 3

DVD - R  
CD - R  
D - RW

**imation** High performance  
Optical Media

**THEODIST LTD**  
THE STATIONERY SUPERMARKET

Port Moresby (Waigani Drive). Phone: 325 6500. Fax: 325 0302  
Lae (Milfordhaven Rd). Phone: 472 5488. Fax: 472 7838

Store Data  
Swiftly and  
permanently.

# Ol meri bai gat sans long 2007 ileksen

Veronica Hatutasi i raitim

NAMBA wan Jenda (givim wankain luk-save long ol man na meri) woksop o bung bilong ol meri long Palamen na ol meri i stap long provinsel politiks long PNG na Pasifik rijen i bin tok oraitim tripela bikipela finging.

Namba wan em long PNG Gavman i kisim plen Komonwel i gat long kisim 30 pesen mak bilong ol meri i stap insait long Palamen namel long 5-pela yia i kam, stat long dispela yia 2005 na inap long yia 2015. Namba tu em long senisim Seksen 101 long Mama lo bilong PNG we ol i laik rausim ol 20 rijinel sit na tusim bilong ol meri sapos ol i laik inapim dispela mak we komonwel i laikim. Na long senisim dispela lo hariap pastaim long 2007 Nesenel lekseen we i no stap longwe nau. Namba tri em long dispela 30 pesen sit i mas go long ol meri tasol. Samting olsem 70 meri long ol provinsel gavman, ol meri grup, tupela long tripela nupela meri memba bilong nupela Bogenvil Ootnomes Gavman, ol meri lida long kantri, Dame Carol Kidu em wanpela meri long PNG Palamen, Lindiwe Maseko em Siameri bilong Komonwel Palamenteri Asosiesen i makim moa long 60 kantri, meri i makim UNIFEM, Komonwel Palamenteri Asosiesen na ol arapela bikman i bin sin-



• Siameri bilong Komonwel Palamenteri Asosiesen Lindiwe Maseko bilong Saut Afrika, Praim Minista Sir Michael Somare na bikmeri bilong Komonwel Palamenteri Asosiesen i toktok i stap long opening bilong woksop. Foto: VERONICA HATUTASI

daun long dispela tripela de bung i bin stat long Mande Jun 25 na pinis aste trinde June 27.

Praim Minista Sir Michael Somare long bikipela toktok bilong em long opim woksop i bin tok em i tru ol pasin kastom bilong PNG i mekim ol meri i namba tu bilong ol man.

Mama Lo na Nesenel Gols na Developmen i givim wankain luksave long

ol meri olsem ol man long helpim wantaim ol wok developmen bilong kantri.

Em bin apil tu long ol meri na ol oge-naisesen bilong ol long noken bagarapim ol yet tasol sanap strong na wok bung wantaim long kamapim gutpela samting. Bihainim dispela, em bin tokaut olsem ol bai rausim ol rijinel sit long 2007 na larim ol dispela 20 sit bilong ol meri i resis long en..

# Distrik beng i no wok gut

WOK bung namel long ol Distrik Tresera na ol memba i no gut-pela tumas long wok developmen bilong distrik na ol ples.

Dispela em bikipela belhevi bilong memba bilong Goitara Fabian Inou long palamen kibung long las wik Fraide. Mista Inou i tok wok bung namel long em na Distrik Tresera bilong em i no gutpela tru na em i laikim Inta Gavman Rilesens Opis na Pablik Sevis Opis long skelim dispela na kamapim sampela gutpela senis long en.

Mista Inou i tok wanpela senis em i laikim em long givim em pawa bilong rausim na kisim wokman bilong mekim dispela wok.

Em i tok ol memba i gat bikipela plen na projek bilong mekim long ol distrik tasol wok bilong stretim mani na givim i go long karimaut ol wok i no stret olgeta na i save holim bek planti wok long kamap hariap. Mista Inou i tok em i nogat pawa long rausim Distrik Tresera bikos lo bilong pablik sevis i banisim ol. Tasol

sapos em i ken i gat pawa long mekim dispela bai em i ken mekim dispela. Mista Inou i tok mani bilong distrik i save kam na stap long mekim wok tasol rot bilong rausim mani i save isi isi tru.

Wankain hevi tu em sampela memba i tokaut olsem ol tu i save bungim long distrik bilong ol olsem na gavman i mas stretim gut dispela sistem.

Distrik Treseri opis em nupela sistem we gavman i statim na opim ol treseri opis long planti hap provins na distrik pinis. Dispela long larim mani i go olgeta long distrik level we ol pablik sevens na ol wok long ples i ken kisim mani stret long hap na mekim wok bilong ol. Minista bilong mani Bart Philemon i tokaut pinis olsem dispela treseri opis em i nupela samting we gavman i sanapim na i laik lukim i wok gut. Olsem na sapos husat memba i lukim olsem ol distrik treseri opis long ilektoret bilong ol i no wok gut toksave hariap.

# Nesenel Dres resis i stap yet

PNG i mas gat nesenel dres we em i ken amamas long luksave bilong em yet long em hia long kantri na long ovasis olsem em i narakain.

Bikos i kam inap nau olsem 30 yias bihain long kantri i kisim independens png i nogat nesenel dres, Nesenel Kalsarel Komisn (NCC) wantaim sapot bilong PNG Ivens Kaunsil i putim kamap bikipela resis na askim pablik,ol wan wan manmeri, ol oge-naisesen long kantri long go insait long resis we i karim bikipela winmani long en. NCC i tok ol bai pasim resis long Ogas 5 na fainol de bilong sasim na

givim prais em long Septemba 16. NCC i tok ol manmeri i laik go insait long Nesenel Dres resis i mas bihainim gut ol kondisen we NCC i putim long bihainim.

I kam inap nau, Komiti i lukautim dispels resis i no kisim wanpela resis yet na em i askim strong ol gutpela manmeri bilong PNG long traim han na tingting na kamap wantaim sampela gutpela stail bilong ol long wokim kain dres na hanmak bilong yu bai i pas i stap. Tupela grup bai i winim prais na dispela em long tupela lain bai kisim K4,000 wan wan long kamapim gutpela risain long wokim

# Ol memba i no amamas long Spika

PASIN Spika bilong nesenel palamen Jeffery Nape i mekim long stopim palamen kibung long las wik Fonde i no gutpela tru long bel bilong planti memba bilong palamen. Sampela sinia memba bilong gavman na ol minista tu i no amamas long dispela pasin.

Spika Jeffery Nape i bin stopim palamen long 12 kilok na tok long ol i ken go long belo kaikai bikos em belo taim. Em i mekim dispela taim Gavana bilong Milen Be Tim Neville i bin askim sampela bikipela kwesten i go long Praim Minista Sir Michael Somare long pasin we gavman i mekim long makim sampela bikman long bosim opis bilong IPBC na wanem as na siaman bilong Telikom PNG Fabian Gubon i risain long wok bilong em.

Mista Neville i tok Somare i putim sampela poroman na lain bilong em i go insait long menesmen bilong IPBC na tu ol i pusim nus bilong ol i go insait long wok na menesmen

bilong Telikom PNG. Olsem na em i laikim Praim Minista Sir Michael Somare long tokaut klia long palamen na pipel bilong Papua Niugini sapos ol dispela askim i stret o nogat.

Tasol Spika Jeffery Nape i tok dispela olgeta askim i no stret na Praim Minista i no inap bekim bikos em ol askim we i sut long bagarapim na daunim Praim Minista. Olsem na em i no oraitim Somare na bekim ol dispela askim na askim palamen long go long belo malolo.

Ausait long palamen planti memba i no amamas bikos ol i tok dispela askim bilong Tim Neville em toktok we i sut long bisnis na opis bilong kantri na i no bilong wanpela man. Olsem na i nogat asua long Praim Minista i bekim ol dispela askim. Na tu ol i tok Spika i nogat pawa long abrusim kwesten bilong Gavana. Em i gat pawa long lukautim na go pas long palamen tasol em i nogat pawa long stopim ol lida long toktok long hevi bilong pipel na kantri.

**A COLLEGE TO CHANGE YOUR WORLD IN 2005** YOUR accredited international awards

Invest in accredited qualifications and skills to gain a successful career. Everything you need for study success is provided; Training Materials, Guide, Exams, Revision Tests, Exam, Award.

**Diplomas (£150/US\$300/AUS\$360)**

- \*Accounts, Hotels, Tourism, Computers
- \*Business, Management, English, Stores
- \*Personnel, Office, Purchasing, Advertising
- \*Marketing, Insurance, Secretary, Office

**Advanced Diplomas, BBA, BCom, MBA**

- \*Business, Marketing, Finance, Organization

For a FREE Prospectus/brochure contact: CAMBRIDGE INTERNATIONAL COLLEGE P.O. Box 1378, Southampton, SO17 3WX, Britain

Web: www.cambridgecollege.co.uk  
email: info@cambridgetraining.com  
Fax: +44 2380 337200

Accredited British Training & Education registered with the National Training Council & Ministry of Labour of Papua New Guinea



# Straik i no bihainim lo

Veronica Hatutasi i raitim

STRAIK o stop wok ol nes insait long kantri i wokim i no bihainim lo na ol i ken kisim mekim save.

Long wankain taim tu, singaut i go long ol voluntia nes i kam helpim long wok long ol haus sik bikos sindaun bai go nogut long ol haus sik sapos i nogat woklain tru i stap long lukautim ol lain wantaim bikpela sik na ol mama i laik karim.

Sief Ekseyutiv Opisa bilong Pot Mosbi Jenerel Haus sik Dokta Alphonse Tay i wokim ol dispela toktok long aste apinun taim Wantok i askim em long straik bilong ol nes we i bin stat long 7 kilok aste moning na i wok long go het yet inap taim dispela niuspepa i go long prin.

Samting olsem 5,000 nes insait long kantri husat i memba bilong PNG Nesas Asosiesen i lusim wok bikos ol i no amamas long ol alawens na pei bilong ol we ol bin tok oraitim long 2002.

Dokta Tay i tok i tru na em i sori long ol nes long wanem sampela bilong ol i no kisim dispela alawens na pei, tasol em i tok tu olsem PNG Nesas Asosiesen i paulim sampela long ol long wanem ol nes i wok long ol eben eria o bikpela taun i bin kisim pinis dispela pe.

"Dispela lusim wok ol nes i wokim i brukim lo. Ol nes i no wokim sikret balot na Industriai rejistra i no givim tok orait long ol long lusim wok. Ol dispela nes husat i stap long stop wok bai kisim mekimsave. Ol wan wan Haus Sik Menesmen long ol provins bai lukluk long wanem kain mekim save ol bai givim ol. Hia long Pot Mosbi Haus sik, bai



• Ol nes long Bogenvil i redi long lusim wok wantaim ol wanwok bilong ol long Mosbi. Tasol sampela i tok ol bai tingting planti long ol sik manmeri.

mipela i lukluk long en bipo mipela i givim mekimsave. Mekimsave i ken go inap long pinisim nes long wok.

"Ol nes insait long Mosbi i bin kisim pinis dispela alawens an pei ol i straik long en. Asosiesen i wok long paulim ol. Ol i no streti yet ol nes long ol rurel eria na ol i wok long karimaut ol toktok long stretim ol," Dokta Tay i tok.

Long aste apinun long tripela ten minit i lusim 5 kilok, taim Wantok i toktok wantaim Dokta Tay, ol i bin pasim wanpela sejkkel, medikel na obstretik wok long Pot Mosbi Jenerel Haus sik bikos ol i sot tru long ol nes. Liklik lain tasol olsem wan wan nes i wok long ol wan wan wod.

Wantok i bin raun i go tu long Pot Mosbi Jenerel Haus sik na lukim olsem i nogat nes i wok insait long wok bilong ol mama i karim bebi. Ol sumatin i skul long

kamap Dokta i wok long helpim Dokta i stap. Ol arapela wod bilong ol mama olsem Wod 9, 10 na 11 i bin gat wan wan nes tasol i wok i stap. Insait long Mosbi na long Pot Mosbi Jenerel Haus sik yet, samting olsem 40 na 50 mama i save karim bebi long wan wan de.

Dokta Tay i tok em i bilip olsem sampela gutpela samting i mas kamap long ol toktok we Asosiesen bilong ol PNG Nes, Abitresen Traibunel na ol bikman long Helt Dipatmen i wok long mekim yet.

Olsem na em i singaut long ol voluntia nes i givim sevis bilong ol bikos laip bilong ol sikman em i bikpela samting.

Em i bin singaut tu long pablik long lukautim ol yet gut long dispela taim ol nes i lusim wok long wanem bai i nogat hap bilong kisim marasin long ol pablik haus

sik na helt senta. Ol imejensi wod tasol i op i stap long dispela taim.

Wantok i no bin inap long kisim toktok long Asosiesen bilong ol nes long wanem ol i no bin laik toktok long ol nius man.

Long wankain taim, ol nes long Buka Haus sik i sapatim ol wanwok bilong ol long kantri na ol i wetim tasol kaikai bilong kibung namel long PNG Nesas Asosiesen, Industriai Traibunel na ol Helt Dipatmen atoriti. Liklik lain i bin wok i stap taim Wantok i go sekim haus sik long aste apinun.

Bogenvil brens presiden bilong PNG Nesas Asosiesen na Deputi Metron long Buka Haus sik Rose Tsiroats i tok sapos ol i givim tok orait long stop wok i go het, liklik lain nes bai wok i stap long ol wod bikos ol i gat wok long lukautim ol siklain.

## Gumi insait long tinpis i tok giaman: RD

I kam long Pes 1

Dispela wok painimaut i soim olsem ol i laik giaman long bagarapim gutpela nem bilong kampani long wanem dispela gumi we ol i painim insait long tinpis i stap nupela yet we em i luk gutpela na nupela.

Tasol gumi we ol kampani opisa i kukim na karim i go long Lae i bruk bruk na i slek pinis. Dispela i soim olsem dispela komplek i no tru.

Long wankain taim, Komyuniti Rilesens Opisa bilong RD Tuna Kampani Stotik Kamyia i tokim Wantok Niuspepa olsem i gat rot long sekim gut wan wan tinpis pastaim long i go aut long salim.

"Olgeta tinpis, pastaim long mipela i salim i go aut, em ol Kwaliti Kontrol opisa i save sekim gut pastaim long ol i go aut long ol stua long salim," Mista Stotik i tok.

Em i tok moa olsem hat bilong paia we i save kukim pis i antap moa we i save kukim gut tinpis.

"Sapos i gat pipia insait long tinpis o ol arapela samting i stap insait long tinpis bai em i solap na i pairap namel long 48 aua pastaim long mipela i salim i go aut long ol kastoma bilong mipela," Mista Kamyia i tok.

Em i tok dispela em i no namba wan taim bilong kampani long kisim kain komplek olsem.

"Mi bin kisim 10-pela kain komplek olsem we ol i painim kondom na ol arapela samting insait long tinpis. Ol dispela komplek kampani i karimaut wok painimaut na i no tru, na sampela ol komplek i tokaut olsem mipela i laik traim long giaman kampani na kisim kompensesen mani."

## Nupela so bilong strongim PNG kalsa

Andrew Molen i raitim

NESTLE, kampani i save mekim Milo dring, nau i wok bung wantaim Nesanel Kalsarel Komisn (NCC) long kamapim wanpela nupela rot bilong strongim kalsa bilong PNG.

Dispela em i wanpela kalsa so ol i kolim Nescafe "Tumbuna Taim" na long amamasim dispela bai i nogat singsing na danis tasol, planti moa samting long amamasim na soim kalsa bilong yumi long PNG bai i kamap tu long dispela so we bai i kamap long Julai 30 long Sir Hubert Murray stadium long Mosbi. Eksekyutiv Dairekta bilong NCC Dokta Jacob Simet i lonsim dispela kalsarel so na i tok klia olsem dispela so i no bilong singsing na danis tasol, na bai i gat planti arapela stori bilong em i stap.

"Long Hailans i go long ol aitan, long wanpela nambis i go long narapela nambis. Olgeta stail bilas bilong PNG bai i kam bung long soim stret kalsa bilong yumi," Dokta Simet i tok. "Dispela so em bilong Pot Mosbi yet na long statim namba wan yia bilong Tumbuna Taim so, samting olsem 20 kalsarel singsing grup bai kam bung. Bihain long ol i kam insait long ovol, wan wan grup bai kam singsing long fran long gren sten na long wankain taim wanpela i toktok long tum-

buna stori bilong dispela ples o grup."

Long dispela de tu bai i gat ol man husat bai i toktok long ol stori tumbuna we ol tumbuna bilong bipo i givim i kam inap nau na wanpela string ben na mambu ben tu bai pairap.

"Dispela so bai i mekim planti manmeri i amamas na tu bai em i soim planti kala na stail bilong PNG, tasol moa long en, em bai kambek neks yia," Dokta Simet i tok.

Maketing Kodineta bilong Nestle, Joshua Nablu i tok em i long taim nau taim Pot Mosbi so i pinis na i nogat wanpela bikpela samting olsem i kamap insait long kapitel siti.

"Nescafe Tumbuna Taim em i no wanpela kompetisen o resis namel long ol singsing grup na i nogat prais bai i go long namba wan grup tasol em i wanpela so bilong amamasim ol planti kain kain na stail kalsa bilong PNG," Mista Nablu i tok.

"Tumbuna Taim em i olsem yumi bai stori ken long histri bilong yumi long bipo taim bilong tumbuna i kam inap nau.

"Em bai helpim yumi long luksave long ol pasin na samting bilong yumi long bipo olsem ol kastom na ol stori i stap baksait long ol singsing na danis na ol bilas bilong yumi we yumi i save laikim tumas," em i tok.



YUPELA redi long sut long TV tu o nogat? Namba tri gem bilong Stet Ov Oriijin bai kamap neks wik Trinde nau. Stap sambai long brukim bun gen.

PLANTI toktok kamap long ol senis gavman i laik kamapim long lo bilong lukautim ol diwai. Bipo yet em bikpela senis i kamap long dispela lo long daunim pasin stil. Nau yet mipela i mas lukluk long ol lain husat i wok long egensim ol dispela senis. Planti long ol em ol lain husat i gat bikpela save na gutpela nem. Yumi mas putim yau na skelim gutpela tingting bilong ol.

LONG wankain taim, ol lida i noken ting olsem ol liklik manmeri i nogat save long dispela kain samting. Ol papa graun bilong ol diwai i mas i gat maus bilong toktok. Planti i tok ol dispela senis long lo bilong lukautim diwai bai pasim maus bilong ol. Sekim Wantok neks wik long glasim olgeta tingting long ol dispela senis.

WANPELA arapela yangpela musik sta bilong PNG i kamap nau. Olsem wanem? Mipela PNG nogut o?

SAPOS yu wanpela musik man i save laik skelim tingting bilong Glasim Musik wantaim JK, sekim pes 21. Dispela gutpela skelim tingting i save sut long PNG musik stret nau bai i kamap insait long National niuspepa.

BIKPELA bel kros nau i stap wantaim ol nes. Na long ol wik i go pinis, bikpela toktok i kamap long sait bilong marasin i sot, nogat inap masin bilong ol haus sik. Tasol nogat wanpela toktok i kam long ol praivet dokta na ol bisnis i save salim marasin. Bai mipela sekim ol dispela lain tu o nogat?

GUTPELA tru na Ombudsman Komisn i glasim gut wok pasin bilong ol lida i stap. I luk olsem sampela long ol i wok long asua liklik gen. Kain kain sut toktok i plai i go kam long Palamen na olgeta hait stori bilong ol i wok long kamap ples klia nau. Mipela ol liklik gras ruts manmeri i lukluk i stap. Sampela moa.

## Ol maining mama autim kros

OL MAMA graun bilong ol main insait long kantri i singaut strong long nesanel gavman long kamapim strongpela lo bilong banisim bus, graun na wara long wanem wok maining i save bagarapim wara bilong ol.

Ol mama i sanap aninit long nem, Mine Affected Women's Foundation (MAWF) o faundes bilong ol mama i karim hevi bilong wok maining i mekim dispela singaut taim ol i bung long namba tu kibung bilong wok maining bilong ol meri i kamap long Madang las wik.

Ol maus meri bilong MAWF i tok olsem i tru olsem maining i save bringim ol gutpela samting tasol i gat planti hevi tu i save kamap.

Ol i singaut strong olsem taim gavman na Mining kampani i laik statim main, ol i mas singautim olgeta stek holda na lukluk long sindaun bilong ol pastaim.

Ol i tok planti taim ol i save lus tingting long ol as ples lain i stap arere long wara we main i save tromoi ol pipia bilong ol long en.

Basilia Selibu bilong Kuni long Sentrel provins i tok ol pipel bilong i save yusim Auga-Angabanga Wara na ol i save kisim taim tru taim Tolukuma Gol Main i bin stat tromoi ol pipia long wara bilong ol.

Em i tok komyuniti bilong em i save yusim dispela wara olgeta taim ol i save was was, dring na kisim abus long em.

"Taim yu bagarapim dispela wara yu wok long kilim ol manmeri husat i save yusim dispela wara," Misis Se-tebu i bin kra i na tokim ol manmeri long dispela kibung.

Elizabeth Matit em i narapela meri i stap klostu long Flai Wara na Ok Tedi main i save tromoi pipia long en i go long dispela wara. Em i tok Wara Flai em i pas long skin bilong ol na i stap wantaim ol nau.

Ol dispela toktok bilong ol meri ya i bin kirapim bel bilong ol arapela meri na ol i tok strong olsem ol i no amamas long ol lain i go pas long dispela bung bikos ol i no bin i gat sans long autim ol wari bilong ol.

Ol arapela lain husat i bin i gat taim long toktok i bin givim taim bilong ol long ol dispela mama long autim wari bilong ol.

# Bogenvil ileksen sevim mani

Veronica Hatutasi i raitim

## ...Ol menesa i amamas tru long wok

PNG i ken lainim sampela gutpela samting long ileksen long Bogenvil we i bin pinis tasol na nau i sanapim nupela Otonomes Gavman bikos em i bin go gut tru long ol taim ol i makim long em na antap long em, ol bin sevim K500,000 long K5 milien manimak we ol bin katim long karimaut wok bilong ilkesen.

Ileksen Menesa bilong Otonomes Bogenvil Gavman (OBG) Mathias Pihei taim em i tok amamas long gutpela ileksen i bin kamap na nogat bikpela meknais i kamap na tu, olgeta samting i bin kamap olsem ol bin plenim long em.

" Mi amamas long olgeta pipel na vota bilong Bogenvil long larim

ileksen i go gut. Mi tok tenkyu i go long ol poling opisa husat i kari-maut gutpela wok, ol opisa bilong ilektorel hetkota long Mosbi husat i bin wok hat we ol wok manmeri bilong ol i bin kam helpim mipela, ol opisa bilong mi, Bogenvil Etmnistresen we i bin givim helpim wantaim ol wok manmeri na ol arapela helpim mipela i

askim long en, Ol ileksen opisel bilong Australia, mani sapot bilong AusAID, gavman bilong Japan, Saina, Gemeni, ol intenesenel obseva na Yunaitet Nesens long olgeta helpim i kamapim gutpela ileksen.

Mista Pihei i tok dispela em i namba wan taim ol i mekim sevim long mani ol i katim long kari-

maut ileksen na dispela i soim olsem ol wok i go gut long taim bilong em stret na i nogat wok hait na ol ripot long rot ol i yusim mani long em i stap long ples klia.

Bikpela eria we ol i tromoim bikpela mani long en em long Trensport na aluwens.

Em i tok ol i peim olgeta aluwens na mani we ol i sevim em dispela K500, 000 na i soim tru olsem ol man i mekim wok tru.

## Bogenvil tok gutbai long UNOMB

Aloysius Laukai i raitim

BOGENVIL i bin tok tenkyu na gutbai long Politikel Etvaisa bilong Yunaitet Nesens Obseva Misin (UNOMB) em William Ozkaptan las wik Fonde.

Ol bin holim wanpela liklik kaikai long konferens rum bilong Etmnistreta long Buka we Presiden bilong Bogenvil Otonomes Gavman Joseph Kabui na Etmnistreta Peter Tsiamalili i bin wokim ol tok tenkyu toktok.

Presiden Kabui i bin tok tenkyu long Mista Ozkaptan long ol wok em i mekim bilong painim gutpela sindaun long Bogenvil na moa yet, long wok bilong bungim, rausim na bagarapim ol gan.

Presiden Kabui i bin luksave tu long Ambaseda Noel Sinclair husat i bin go pas long UNOMB long Bogenvil long bikpela wok em



• Olsem mak bilong tok tenkyu na luksave long gutpela wok, Presiden kabui i givim wanpela Bogenvil basket i go long UNOMB Etvaisa William Ozkaptan. Foto: Aloysius Laukai

bin mekim long toktok wantaim ol grup i stap insait long pait long Bogenvil long sindaun wantaim em na toktok. Na dispela i bin opim rot long tupela grup i kamapim wanbel na mekim wok

bilong lusim ol gan i stat na go het. Long wankain taim tu, Etmnistreta Tsiamalili i bin tok tenkyu i golong man husat nau i bos long UNOMB Misin em long Tor Stenbock long

sapot we Misin i givim long Bogenvil inap ol i pinisim ol wok na lusim ailan long mun Ogas bilong dispela yia. Etmnistreta Tsiamalili i tok Obseva Misin bilong Yunaitet

Nesens long Bogenvil na i narakain na i kamapim gutpela wok stret bikos ol i no bin yusim gan long wok bilong kamapim wanbel namel long ol birua grup long Bogenvil.

## Ol yut lida greduet long wok wanbel na bel isi

Aloysius Laukai i raitim

TAIM Bogenvil i bisi wantaim ol ileksen kempein, kaunim na kirapim nupela Otonomes Gavman na go hetim tu ol selebresen, pasto trening skul long Aero long Wakunai distrik i bin redim ol yut lida bilong 4-pela sios long ailan long greduesen bilong ol we i redim ol long wok bilong kamapim bel gut, sekan na stretim tingting (rehabilitesen na rikonsiliesen).

Nau Bogenvil i kisim nupela gavman tasol i gat bikpela wok i stap yet long kamapim bel gut na sekan pasin na stretim tu tingting bilong planti lain, moa yet ol yangpela, we Bogenvil hevi i bin bagarapim tingting na laip bilong ol.

Long las wik Fraide, 46 yut lida bilong sios i bin greduet bihain long ol i pinisim 10-pepa wik trening aninit long join progrem bilong Remnens Ministri, Kristen Membas Felosip (CMF) na Hope Ministri Intenesenel i beis long Kolodaro, Amerika.

Dairekta na fauna bilong Remnens Ministri Ishmael toroamam husat i bin foma komanda bilong

Bogenvil Revoluseneri Ami i tok em i wari long ol yangpela bilong Bogenvil na bihain taim bilong ol na olsem, em i bin laik helpim wantaim wok bilong stretim laip na tingting bilong ol. Na olsem, em i putim han wantaim Reveren Cherrie Campbell bilong Hope Ministri Intenesenel na sinia Pasto Ezekiel Obed bilong PNG CMF muvmen.

Mista Toroama i tok tru, nau Bogenvil i gat demokretik gavman, em i lukim olsem ol yangpela i no strtet yet long fisikel, spiritual na tingting sait. Na ol i mas wokim samting long stretim dispela kain stap.

Em i tok i gat bikpela nit long stretim tingting na sindaun bilong ol yangpela na ol bai klia long bihain taim bilong ol yet na Bogenvil, moa yet, taim vot bai referendum vot i kamap namel long 10 na 15 yias bihain long kirapim nupela Otonomes Gavman.

Mista Toroama i tok ol yut em ol lida bilong tumora na ol i mas klia gut na mekim ol gutpela disisen long Bogenvil na bihain taim bilong em.

Mista Toroama i wokim ol dispela toktok long taim bilong greduesen las Fraide yet.



• Ishmael Toroama em Dairekta bilong CMF i sekanim ol sumatin husat i greduet long dispela de. Foto: ALOYSIUS LAUKAI

**BIAZ** OLGETA YIA BIABIA SAVE GO LONG "FAN RAN" RESIS... EM INDI SAVE WINI LIKLIK... DISPELA YIA EM TINGIM WANPELA AIDIA...

EM I GO BORDINIM WANPELA WILSEA LONG CHESTIA HOM (PLES BILONG OL DISEBOL MAN) NA GO LONG DISPELA PERSI RESIS.

EM BAI ISI LONG KRIZ TASEL...

EM KAMAP LONG 2-MAIL HIL NA BREK I LUS LONG WILSEA...

HE! HE!

HO! MAN VAI DISABOL, OZ!

BAGA JEST ROLL I GO DAUN NA SOTKAT IGO DAUN LONG SETELMEN.

# Strongpela singaut i go long sapatim pait egensim AIDS

SINGAUT i go long ol pipel bilong is Nu Briten long sapatim pait egensim HIV/AIDS.

Provinsel Polis Komanda long Is Nu Briten Allan Kundi i bin wokim dispela singaut taim em i toktok long wanpela HIV/AIDS "peer edukesen" trening woksop long Kokopo. Peer edukesen i min olsem skulim ol poroman we yu save gut long ol olsem wanpela sios, meri, yut, wan strit, ol wantok, ol wanskul grup yu stap insait long em bikos em bai isi long infomesen i go long ol.

Mista Kundi i tok maski PNG i kamap namba wan winim ol arapela

kantri insait long Pasifik rjen long gat bikpela mak bilong pipel wantaim sik HIV/AIDS, na moa pipel i wok long dai long em, planti pipel i no bisi na ol i no gat kliapela save long dispela sik o sapos ol i save, ol i no bihainim ol rot bilong abrusim o daunim.

Em i tok i moabeta long olgeta manmeri, stat long famili i go long strit, sios na gavman long sanap wantaim na pait egensim dispela sik.

15-pela meri bilong Kokopo, Gesel na Rabauf i bin sindaun long woksop we Yuropien Yunien i bin sponsaim.

Luk olsem planti manmeri i no save wari tumas long dispela sik.

## Aloysius Laukai i raitim

STRONGPELA salens i go long nupela Bogenvil Otonomes Gavman lida long tingim ol pikinini we skul bilong ol i bin bagarap na tu, ol manmeri i bin givim vot long ol.

Melanie Kauona em pikinini bilong foma biknem pait lida bilong Bogenvil Revoluseneri Ami, Sam Kauona i bin autim dispela toktok long Arawa las wik long makim ol Bogenivl sumatin i skul long ovasis.

Taim Mis Kauona i tok tenyu long ol pipel bilong Bogenvil long hatwok bilong ol long kisim

nupela gavman i bin tok skul bilong ol Bogenvil pikinini i bin bagarap long planti yia bilong hevi na nau, nupela gavman i mas givim sans long ol long kisim na lainim save we ol i no kisim.

Em i tok strong long ol lida bilong fri na demokretik Bogenvil gavman olsem ol pipel yet i givim namba na pawa long ol na long wankain taim, ol i ken rausim dispela pawa sapos ol i no mekim gut wok long sevim pipel bilong ol.

Em bin tok dispelas nupela gavman olsem ol arapela gavman i mas givim wok i go long

nupela jeneresen na tingim dispela nupela jeneresen em mipela ol pikinini bilong nau na taim ol yia i go, bai kamap ol lida bilong tumora.

"Wanem samting yu mekim long mipela nau em bai mipela i givim bek long yu taim yu lapun. Tasol mipela i pilim olsem bai yupela i no lusim tingtign long mipela," Mis Kauona i tok.

Em i taim bilong mekim samting tru na i no giaman.

"... samting yu mekim, mipela givim bek taim yu lapun"

# Deputi gavana bai raun long Tanga

OL pipel bilong Tanga Konstituensi long Nu Briten provins bai lukim Ekting Gavana Gerson Rabana long tupela wik.

Dispela em bikos em bai mekim wokabaut i go long ailan, stat long Julai 10 inap long de namba 20 na as tingting em long karimaut ol komyuniti developmen forum (CDF).

Dispela i go hetim CDF progrem bilong Provinsel Gavman em i karimaut long olgeta hap bilong provins.

Aninit long CDF progrem, ol bikman bilong Provinsel Gavman i save go long ol ples na toktok wantaim ol pipel long ol developmen projek ol i katim mani i go long ol longn baset bilong ol insait long wanpela yia.

Mista Rabana i kisim ples bilong Gavana lan Ling-Stuckey husat bai stap long Palamen bung long Mosbi na bihain, go long ovasis.

Mista Rabana bai statim wokabaut bilong em long Wod 8 long Ngisampam na pinisim wokabaut long Wod i long Tirivon.

Ol arapela Wod we bikman ya bai raun long ol em long Angkitrita long Wod 8, Suan long Wod 7, Malesak long Wod 6, Ampisu long Wod 5, Sasa long Wod 4, Ambaba long Wod 3 na Fonli long Wod 2.

Mista Rabana i tok em i amamas long dispela wokabaut bilong em long karimaut CDF progrem na i tok ol dispela toktok i bikpela samting bikos ol pipel provinsel Gavman i laik kisim tingting bilong ol pipel long wanem samting tru ol i laikim we ol i ken lukluk long em na putim insait long 2006 baset.

Em i tok tu olsem bikpela samting long em tu long kisim dispela wokabaut em long lukim sapos ol projek ol i makim long Tanga aninit long 2005 baset i go het o nogat.


Em i tok sem i laik tru long bungim ol pipel bilong Tanga na toktok long ol samting ol i laikim i kam aninit long developmen progrem na ol i ken glasim na katim mani long em long mani plen bilong neks yia.



• Arawa Hai Skul sumatin amamasim ol bikman. Foto: ALOYSIUS LAUKAI



• Ol dispela lain i kam long olgeta hap bilong Bogenvil i wetim ka, moto bot na sip long go bek long ples bilong ol na redi long sapatim nupela gavman. Foto: VERONICA HATUTASI



## EASIPAY INSTALLATION IN EAST NEW BRITAIN PROVINCE

INSTALLATION DATES	LOCATIONS
Monday 04/07/05 to Friday 8/07/05	TAKUBAR, (GELEGELE JUNCTION TO PAPINDO)
Monday 4/07/05 to Friday 08/07/05	TAKUBAR
Monday 4/07/05 to Friday 8/07/05	KABAKAUL/RAPOPO
Monday 4/07/05 to Friday 8/07/05	KABAKAUL/INDUSTRIAL
Monday 11/07/05	OKUA
Monday 11/07/05 to Wednesday 13/07/05	TAVUI No.1
Monday 11/07/05 to Wednesday 13/07/05	TAULIU/TAPO
Monday 11/07/05 to Wednesday 13/07/05	BITAPAKA
Monday 11/07/05 to Friday 15/07/05	KEREVAT PPL STAFF
Monday 11/07/05 to Friday 15/07/05	RABAU PPL STAFF
Thursday 14/07/05 to Friday 15/07/05	WARANGOI PPL STAFF

Issued by  
PNG Power Public Relations

# PNG famili long Japan helpim ol Manam

WANPELA PNG famili i stap long Tokyo, Japan i helpim ol pipel bilong Manam Ailan we maunten paia i bagarapim ol wantaim 55 katen klos ol bin bungim long ol poroman na ol woklain bilong PNG Embasi long Japan.

Diplomet Steven Barampataz bilong Kagua long Sauten Hailans i wok moa long 25 yias olsem wanpela diplomat na meri bilong em Yogi bilong Indonesia husat i bin tisa planti yia long Pot Mosbi Intenesenel skul i bin mekim wok kwik-taim taim ol i harim hevi bilong ol Manam Ailan pipel na formim wanpela netwok long ol poroman na ol pipel i wari long hevi we moa long 10,000 Manam Ailan pipel i stap long em. Ol i bungim ol klos na i bin inapim 55 katen olgeta na ol i salim i kam long sip long Lae.

"Mipela i kisim bikpela blesing na helpim na sip we mipela i putim ol klos kago long em i no sasim mipela. Ol i larim mipela i putim ol samting long sip fri long Japan i kam



• Pikinini Alicia na papa Stephen Barampataz husat i helpim long salim samting. Mama Yogi i no stap long dispela foto. Foto: Lawrence Stephens

olgeta long Lae, "Mista Barampataz i tok.

Nau famili i wetim tasol nius olsem ol klos i go gut long Lae.

Nau, famili i selebretim greduesen bilogn pikinini meri husat i bin skul long wanpela Katolik hai skul long Tokyo na ol i makim em i go skul long Clarke Yunivesiti long Boston, Amerika.

Steven na Yogi i gat tupela pikinini. Gregory i skul long Kwinslen Yunivesiti long Australia na susa bilong em Alicia.

Yogi i bin amamas long pikinini Alicia husat i bin hatwok long stretim ol klos na putim ol long pasel na bokis

Em i tok haus bilong ol i pulap long ol samting na wanpela famili bilong Fiji i bin helpim ol long putim ol klos long rum bilong malolo we ol bin stretim na putim ol long ol bokis na salim ol i go.



## PNG GAN KIBUNG (SAMIT)

Mande Julai 4 - FRAIDE Julai 8, 2005  
YUNIVESITI OV GOROKA

Intenel Sekyuriti Minista Hon. Bire Kimisopa bai holim PNG Gan Kibung long Yunivesiti bilong Goroka, Isten Hailans provins long Mande Julai 4 i go inap long Fraide Julai 8.

Praim Minista Rait Hon. Sir Michael Somare bai opim kibung.

Long dispela kibung Gans Kontrol Komiti bai tokaut long ol wok painimaut bilong Rot So.

Long dispela Kibung aninit long Hon. Bire Kimisopa Komiti bai redim ol polisi na ol toktok we em bai givim long Nesenel Eksekyutiv Kaunsel long kamapim sampela wok long em.

Husat i gat laik na i laik kamap long dispela Kibung i mas toksave long dispela ol lain:

### GANS KOMITI

#### Siaman

Mesa Jenerol Jerry Singirok, MBE (Rtrd)  
Email: jsingirok@hotmail.com  
Mobile: 686 5343

#### Deputi Siaman

Sir Barry Holloway  
bholloway@online.com.pg  
Mobile: 682 8934

### GAN SEKETERIAT

Mr Mathew Nelson  
Eksekyutiv Opisa  
Ph/Feks: 311 2141  
Email: pnggunscon@global.net.pg

### NRI SEKETERIAT

Mrs Loa George  
Ph: 326 0300  
Email: nri@global.net.pg

### Jenerol Korespondens

PNG GANS KONTROL KOMITI  
P.O. Box 1270  
Boroko  
NCD  
Papua Niugini  
Ph/Feks: 311 2141  
Email: pnggunscon@global.com.pg

### Atoriti i kam long

Mesa Jenerol Jerry Singirok, MBE (Rtd)  
Siaman



Australian Government  
AusAID

## Wol Beng helpim bai pinis long Disemba

Michael Novingu i raitim

TEKNIKEL helpim we Wol Beng i save givim long ol meri i stap insait long maining bai i pinis long mun Disemba dispela yia.

Dispela em toktok bilogn Teknikel Etvaisa bilong Wol Beng Dokta Graham Hancock taim em i pinisim bung bilong "Wimen long Maining Konferens i bin kamap long Madang.

"Yupela i lukim pinis taim Wol Beng i helpim yupela na senis i kamap pinis insait long ol maining eria bilong yupela.

Dispela teknikel helpim mipela i givim yupela bai pinis long dispela yia. Mi askim yupela long wokim ol wok plen bilong yupela nau na givim mipela hariap bai mipela i ken lukluk long en. Nau yet, mi lukim i nogat gutpela wok bung wantaim i stap namel long yupela ol meri i stap long maining eria. Yupela ol meri i gat planti save. Kamapim gutpela wok-bung namel long

yupela na winim ol man," Dokta Hancock i tok.

Em i tok moa olsem ol meri i mas toktok strong long wokbung wantaim ol man. Na long dispela rot tasol bai kamapim gutpela wok we ol semis bai go stret long ol komyniti bilong ol.

Long wankain taim tu, etvaisa bilong maining John Strongman i tokim ol meri olsem tru, Wol beng bai lusim ol, ol bai kisim helpim i kam long gavman bilong Japan long karimaut ol wok bilong ol.

"Mi laikim yupela i ams kamapim gutpela wok bung wantaim ol arapela stekholda we bai mipela helpim long givim trening long kamapim gut wok bilong yupela," Mista Strongman i tok.

Em i tok moa olsem rot i go logn wok bilong ol i no isi na bihain sindaun bilong ol long maining eria na kantri i stap long han bilong ol long kisim sevis na gutpela sindaun long ol komyniti bilong ol.

## Akoitaim lukluk long statim maining meri benk

Michael Novingu i raitim

MADANG Risot i bin pulap kapsait long moa long 200 meri i bin bung long Madang long holim konferens bilong ol meri i wok long Maining bisnis long PNG na ovasis.

Antap long ol meri i kam long ol maining kampani long PNG, i bin gat tu ol meri i kam long Australia, Fiji, Indonesia, Romania, Polen na ol arapela kantri moa.c Minista bilong Maining Sam Akoitai taim em i opim bung i bin welkamim olgeta meri long PNG na ovasis i bin kam long dispela bung.

Mista Akoitai i bin tokim ol meri olsem ol i save mekim planti hatwok long gaden, haus, opis na ol arapela wok tasol nogat luksave i

stap long hatwok ol i mekim long en. Em i tok envoironmen, ol bus, graun, diwai na ol narapela samting ol maining kampani i bagarapim pinis.

Em i tok taim ol i go, bai dispela i kamapim hevi namel long ol meri na pikinini long kamapim gutpela sindaun we olgeta samting i bagarap pinis.

Long dispela konferens o bung, i bin gat planti gutpela save meri i kam long olgeta hap bilong kantri na ovasis.

Em bin tokim ol meri long gfasim gut ol samting na wokim ol gutpela plening long karimaut wok bilong ol insait long maining eria.

Em bin tok PNG i gat planti maining kampani i stap na em bin tokim ol meri long wokbung na skelim gut mani.

# Mobail skwat redi long MSG bung

## James Kila i raitim

OL MEMBA bilong Polis Mobail Skwat 14 na ol arapela polisman insait long Goroka, Isten Hailans provins i bin stap insait long wanpela spesel trening long redim ol yet gut tru long lukautim ol bikman bilong Pasifik Ailans na Australia na Nu Silan husat bai kamap long Goroka long Melenesien Spiahet Grup kibung we bai kamap long mun Ogas.

Dispela trening ol i kisim tu i ken helpim ol long putim ai long wanem kain ol birua lain ol lain teroris i kam insait long bagarapim bung bilong ol lain Pasifik Ailan lida long Isten Hailans provins.

Dispela ol memba bilong Mobail Skwat 14 em wanpela spesel lain tru long kisim dispela kain trening we ol i kolim 'Klos Proteksen

Duti' na dispela em long givim ol moa save long stap na was long ol bikman husat bai kam long kantri. Dispela kain trening em ol lain long Nesenel Sekyuriti Yunit (NSU) tasol i save kisim long en, tasol dispela skul ol lain Goroka i kisim i mekim ol olsem namba wan Mobail Skwat yunit insait long kantri long stap insait long dispela trening.

Ol arapela polisman long ol narapela divisen husat i stap long dispela spesel trening em ol opisa bilong CID, trafik, haiwe patrol na tu long Dog Yunit.

Tupela instrakta bilong Spesel Sevises Divisen (SSD) long MacGregor i bin stap wantaim ol dispela polis opisa long Goroka insait long dispela tupela wik trening. Ol tupela kos fesiliteta em inspekta Chris Perou

wantaim Sajen Jack Wek, husat em 21C bilong MacGregor Mobail Skwat Hetkwata long Mosbi.

Tupela i amamas long ol memba bilong polis fos long Goroka long wanem ol i harim tok na mekim olgeta samting long trening i kamap gut tru.

Ol polisman i bin kisim trening long lukautim ol ples we ol bikman bai stap miting na kaikai na ples bilong slip na tu wanem ol eria ol dispela bikman bai wokabaut long en.

Dispela ol trening ol i kisim em i gutpela kain trening tru long redim ol yet gut tru long was long ol bikman meri na ol VIP bilong ovasis husat bai stap long dispela miting.

Ol polisman bilong Mobail Skwat 14 i bin kisim setifiket bilong ol las wik Fraide bihain long tupela wik tren-

ing.

Provinsel Polis Komanda Suprintenden Philip Solata i givim tok amamas bilong em i go long ol memba bilong Goroka polis husat i bin stap insait long dispela kos we em i tokim ol lain polisman bilong em olsem dispela kain trening em i gutpela na i redim gut ol long go het long wok bilong ol.

Inspekta Solata i tokaut tu olsem nau yet PNG i no hait tumas long wanem kain ol birua long kamap long en bikos i gat planti kain kain lain olsem ol lain bilong India, Pakistan, Sri Lanka na Filipins i stap long hia. Olsem na dispela kain trening ol lain polisman i kisim bai redim ol long putim kamap gutpela lukaut long ol bikman meri husat bai kam long PNG long stap long ol bikpela bung.

## Siune lonsim Hailans rais skelim senta long Minj

### James Kila i raitim

MOA long 5,000 manmeri i bin kapsait stret long Minj distrik gavman stesen long Westen Hailans provins las wik Sarere long lukim wanpela bikpela bung bilong ol fida we i makim lonsing bilong rais multiplikesen na distribusen senta bilong Hailans rijen.

Dispela rais projek em gavman bilong Taiwan i helpim long kamapim na bai i sevim olgeta provins insait long Hailans rijen.

Minista bilong Agrikalsa Mathew Siune wantaim Embeseda bilong Taiwan, Jenerel Michael Cheng i bin lonsim dispela rais projek long Minj long fran bilong ol bikman olsem Gavana bilong Westen Hailans na bipo praim minista Paia Wingti, Gavana bilong Simbu Peter Launa na ol arapela bikman bilong Westen Hailans na tu Sief Eksekutyutiv Opisa bilong Kopi Industri Koporesen (CIC) Ricky Mitio i bin stap long en.

Mista Siune, Mista Wingti na Memba bilong Anglimp Saut Wagh, Jamie Maxtone Graham i givim bikpela tok amamas long ol lain bilong Taiwan long dispela projek long kamap long Minj long Westen Hailans.

Minista Siune i tokim ol pipel bilong Minj distrik long lukautim dispela ol lain saveman bilong Taiwan na noken stil na bagarapim wok bilong ol long distrik.

"Ol dispela lain i kam long givim gutpela sevis long yupela. Yupela i mas lukautim ol gut," Mista Siune i tok. Em i tok tu olsem rais nau i kamap olsem wanpela namba wan kaikai long planti famili insait long Hailans na PNG. Em i tok ol famili long Hailans nau i ken groim rais na tu kaukau long sait na taim ol i laik kaikai tupela kain kaikai ol yet i ken skelim.

Mista Siune i givim bikpela tok amamas long Mista Graham husat i putim olgeta pepa wok long bringim dis-

pela bikpela projek i kamap long distrik bilong em.

"Dispela yangpela lida olsem Mista Graham i gat moa tingting long helpim yupela ol pipel long painim gutpela sindaun long sait bilong ikonomi na komyniti laipstail bilong yupela.

"Mista Graham i bin nok planti taim tru long dua bilong mi olsem em i laikim dispela kain projek long kamap long eria bilong em. Mi harim i go na bihain mi skelim na givim tok orait long wok i ken kamap long Minj," Mista Siune i tok.

Hetman bilong Taiwan delegesen, Jenerel Michael Cheng i tok olsem long yia 1990 Taiwan i bin sainim wanpela agrimen wantaim PNG gavman long kisim rais bilong Taiwan i kam insait long kantri. Stat long dispela taim i kam inap nau, dispela stadi na wok bilong planim Taiwan rais long PNG i kamap gut tru. Insait long kantri, namba wan rais distribusen senta i stap long Buba insait long Morobe provins.

**"Graham i bin nok planti taim long dua bilong mi long statim kain prosek"**

Mista Cheng i tokaut olsem insait long dispela agrimen namel long PNG na Taiwan bai i lukim ol teknikel o saveman bilong Taiwan Teknikel Misin i givim trening na skul long rot bilong planim rais na tu helpim long ol rais pikinini na tuls bilong karimaut dispela wok.

Em i tok dispela ol lain Taiwan saveman bai wok bung wantaim ol opisa bilong DAL long karimaut dispela wok.

Mista Cheng i tok dispela projek em i soim pasin bilong gutpela wok poroman namel long tupela kantri em PNG na Taiwan.

## Nupela yunivesiti stadi senta i op long Kutubu eria


OL sumatin long Sauten Hailans provins bai kisim helpim long skruim save bilong ol wantaim nupela Yunivesiti stadi senta ol bin opim tasol long dispela mun.

Ol bin opim Moro Stadi senta long Mipa Kutubu ilektoret bihain long Vais Sansela bilong Yunivesiti ov PNG Les Eastcott i sainim wanpela Memorandum ov Andastending wantaim Dairekta bilong Komyniti Developmen Inisietiv (CDI) Sisa Kini.

Moro Stadi senta em i namba wan kain senta bilong skul olsem ol i sanapim long eria bihain long sampela lain i bin bagarapim Mendi stadi senta.s

Eksekutyutiv Dairekta bilong UPNG Open Kolis Abdul Mannan i tok dispela em i stat long nupela samting na senta bai operet olsem sab senta long Kikori na Samberigi eria na bai ol sumatin na pipel long Sauten na Galp provins bai kisim gutpela samting long en.

Wel kampani Oli Ses i wok wantaim CDI long sanapim ol skul bilding na mani bilong ranim dispela senta. Na



• **UPNG Vais Sansela Profesa Les Eastcott na Dairekta bilong CID Sisa Kini i sainim MOU agrimen long opisel opening bilong stadi senta. Stori/poto: FRANK ASALI (UPNG sumatin)**

UPNG bai givim ol program we ol sumatin bai stadi long en na tu, ol tisa husat i gat save long karimaut wok i tisa long dispela stadi senta. Na ol i apgretim tu ol save bilong ol.

Mista Mannan i tok taim stadi senta i go hetim wok bilong em, em bai ranim ol Basela ov Ats long Edukesen, Akaunting, Pablik Etnisteresen na Polisi Menesmen kos.

Aninit long arenjimen, ol sumatin bai skul long kisim ol setifiket, diploma na digri taim ol i slip long ples o wok long ol ruel eria.

Mista Mannan i tok senta i bin statim wok bilong em long 2004 na nau tasol ol i mekim opisel opening bihainim wok patnasip namel long yunivesiti na CDI.

Stadi senta i gat tripela klasrum, kompyuta leboretori na haus slip bilong ol sumatin husat i laik kamap boda.

Memba bilong Nipa Kutubu Robert Kapaol i tok tenkyu long Oil Ses kampani na ol join ventja patna long givim mani helpim na aninit long edukesen program bilong CDI.

Em bin tok tekyu tu i go long UPNG long kisim edukesen i go klostu long ples we ol pipel bilong Nipa Kutubu i ken skruim save bilong ol long en.

Em i askim strong ol pipel long lukautim gut senta na em bai stap op bihain taim tu wel kampani i go.

**YAMAHA**

Port Moresby Ph 3229478 • Lae 4781800 • Kokopo 9829199 • Madang 8522188 • Goroka 7321844 • Mt. Hagen 5421886 • Wewak 856 2255  
Kavieng 9842788 • Kimbe 9835153 • Tabubil 5489060 • Vanimo 8571254 • Poregera 5479367 • Buka 9739915 • Lihir 9864099 • Alotau 6410100



**EF2600**

- Easy to start
- Fuel Efficient
- Quiet Operation
- Fuel - 4 Stroke
- 2.3 KVA
- 240 Voltage Output


**PLUS FREE TOOL KIT**

WAS K3,300.00

**ONLY K2199**

**Ela Motors**

www.elamotors.com.pg \* www.toyota-southpacific.com



**Meri Hiri i redi...**

Yangpela Atis Joseph Kaluwin i hatwok long penim nupela piksa long raun-abaut long Godens insait long Pot Mosbi. Em i tok dispela em i hap wok bilong stailim ples na redi long namba 30 independens amamas bilong PNG we bai i kamap long mun Septemba. *Poto: ANDREW MOLEN*

**Ol manmeri long siti klinim ples**

OL wokman bilong Nesenel Kapitel Distrik Kornisen (NCDC) long Mosbi i lusim opis bilong ol na go aut long strit we ol i kamapim wanpela "clean-a-thon" long helpim na klinim siti las wik Fraide.

Wanwan dipatmen bilong NCDC i wok long wanwan hap bilong siti we i lukim ol i wok wanpela ful de.

Reguletori divisen bilong komisina i wok long Erima we ol i rausim ol rabis na pipia bilong skin buai i silip nabaut long graun long buai maket long hap, fran long ol stua, long rot bilong Spoonbill draiv, i go olsem long ples balus na 9 mail raunabaut.

Sampela ol manmeri i stap long hap i kamaut na helpim ol tu long wok.

Misis Anna Kamara husait i save stap long hap i tok em i amamas long lukim olsem ol wokmanmeri bilong NCDC i no stap long opis na tok long ol wok i kamap tasol ol yet i kamaut long helpim ol pipol tu na mekim wok.

"Mi yet mi amamas long givim han long klinim ples na rausim ol pipia," Misis Kamara i tok.

Planti ol poroman bilong Misis Kamara long Erima tu i kam wantaim ol rek na brum bilong ol na wok tu long klinim eria bilong ol.

Misis Kamara i tok tu olsem ol wanlain bilong em husait i

stap long Erima i tok ol i luk-save nau long as bilong lukautim ples na noken mekim planti pipia na lusim ol strit bilong ol i mas i stap klin olgeta taim.

Dispela lo bilong infomol sekta we i stap nau i mekim planti manmeri save salim ol kainkain samting long rot na arere long ol bas stop olsem na Misis Kamara i tok wok bilong klinim ples i no bilong NCDC tasol, em i bilong olgeta manmeri.

"Em i wok bilong ol lain husait i save salim samting, ol lain husait i save kam painim ol long baim dispela ol samting na em i wok bilong NCDC wantaim," Misis Kamara i tok.

**Mosbi polis painim bas i kilim sumatin**

**UPNG Sumatin Ripota Samson Kendeman i raitim**

POLIS long Mosbi nau wok long painim yet wanpela waitpela 15 sita bas bihainim indai bilong wanpela sumatin bilong Yunivesiti bilong Papua Niugini (UPNG) las wik Fraide.

Ripot i kam long ol lain sumatin i lukim hevi i kamap i tok wanpela namba 3 yia Saiens sumatin i bin go long bas stop we i gat buai na smuk maket long samting olsem 30 minit lusim 6 kilok apinun taim wanpela 15 sita PMV bas i baim em long sait bilong rot.

Dispela sumatin bilong Sandaun provins i bin indai stret.

Polis long Boroko, Sinia Inspekta Andy Anderson i tokim Wantok long Trinde moning olsem polis i wok long painim yet dispela bas. I nogat ripot tu long draiva bilong pas i go givim long polis stesen.

Inspekta Anderson i tok taim ol i painim dispela bas, bai ol i sasim draiva na putim em i go long han bilong kot.

Ol lain manmeri i sanap na lukim dispela birua i kamap i tok dispela bas em i wanpela waitpela 15 sita bas.

Polis i givim nem bilong sumatin olsem Jacky Itpopin, i gat 23 krismas bilong. Tekim, Telefomin distrik insait long Sandaun provins.

Wanpela lain bilong salim buai husat i no laik autim nem bilong em i tokim Wantok olsem Jacky wantaim tupela poroman bilong em i bin kam olsem long Renbo. Dispela sumatin i lusim tupela wan poro bilong em na go baim buai long maket hapsait long bikrot.

Long wankain taim dispela 15 sita bas i bin spit i kam na baim dispela sumatin long sait.

Ol i bin karim em i go long Pot Mosbi Jenerel Haus Sik, tasol em i bin indai yet long rot.

Presiden bilong Flai Riva Sumatin Asosiesen long UPNG, Timothy Steve i tok dispela sumatin em i wanpela tasol long ples bilong em i kam skul long bikpela skul olsem yunivesiti.

Mista Steven i tok: "Em i wanpela gutpela manki husat i save harim na bihainim toktok na i save go pas long olgeta kain kain wok na tu putim planti taim bilong em long skul, bikos kos bilong Saiens em i wanpela hatpela kos bilong lainim.

"Mipela tingim em i wanpela saveman na tu em i gutpela lida we em bai kamap long bihain taim long en long Papua Niugini we mipela i bin lusim".

Long dispela wik Trinde ol bai wokim haus krai bilong en long UPNG saplin na kisim bodi bilong em i go long ples long tude, Fonde moning.

Ol bai planim bodi bilong em long ples.



**RON ISI:** Ol Sumatin long yunivesiti ov Papua Niugini i putim dispela dram long namel bilong rot wantaim toksave long en olsem ol kar i go i kam i mas ron isi. *POTO: ANDREW MOLEN.*

**Towamo na Trinity go pas long distrik yut konfrens**

**Paulus Tali raitim**

EVENJELIKOL Luteran yut long Papua distrik bai holim distrik konfrens bilong ol long

Towamo Trinity kongrigesen long Morata long Mosbi namel long Julai 1 na 3.

Towamo Trinity Yut Presiden Danny Jeng i tokim Wantok Niuspepa olsem wok redi bilong konfrens i wok long go gut tasol.

Ol yut bilong Nesenel Kapitel Distrik yet wantaim ol yut bilong ol ausait ples olsem

Kerema, Popondetta, Alotau na Kiunga bai kam.

Presiden i tok tu olsem moa long 120 deleget bai kamap long dispela bikpela bung.


Pe bilong wan wan memba em K30, na man husat bai givim bikpela toktok long dispela konfrens em bipo Sief Jastis Sir Arnold Amet na Baibel Stadi Masta Evanjelis Magio Wemim husat bai kam long Goroka. Het tok bilong stadi em Larim Tingting bilong Yu i Kamap.

As tingting bilong konfrens em long ol yut bilong tete i mas save long kantri na ol i laikim ol

gutpela lida long wok wantaim na karimaut wok long halivim ol arapela.

Presiden Danny i tok dispela em i het tok bilong bung long wanem nau yet insait long kantri, ol pipel i stap long kain kain hevi olsem mani i sot, hevi bilong lo na oda i go bikpela, sik AIDS i wok long go bikpela na i gat ol arapela hevi tu i stap.

Dispela i mekim na ol lida i no tingim laip bilong ol long go long God papa long lukautim ol gut na ronim gut kantri bilong taim bihain.



**INFORMAL SECTOR SKILLS EXPO**

**COMMUNITY JUSTICE LIAISON UNIT OF THE PNG LAW AND JUSTICE SECTOR PROGRAM IN PARTNERSHIP WITH NCDC**

*Skills training/Empowering - A crime Diversionary Strategy*

**Date:** 13th - 15th July 2005 (Wednesday, Thursday, Friday)  
**Time:** 8:00am - 3:00pm  
**Venue:** Sir John Guise Stadium

For more information, contact the CJLU office on 323 3098 or visit us at Sambre Haus - Dept. of Community Development.



# Nambawan Palamenteri Jenda woksop ....Laikim moa meri long Palamen



**Stori i kam long las wik....**  
Lorraine Siraba i wok wantaim Young Womens Christian Association (YWCA) long Pot Mosbi. Wapela bung bilong ol YWCA insait long Pasifik rijen na tu Australia, Nu Silan i bin kamap long Rotorua, Oklen long Nu Silan we i bin bungim bikpela lain meri long stap wantaim long wapela wik..

Ol i save wokim mumu long tokples bilong ol i kolim long "Hangi" na ol Maori konset we yu ken lukim tu dispela danis i gat nem, "Haka". Moa long 1 milien turia i save kam long Rotorua long olgeta yia.

Ol lain deleget long bung i bin slip long haus we ol i wokim long stail bilong ol tumbuna bilong ol Maori ol i kolim long "Tangatarua Mara". Em sans ya long mipela i slip long tumbuna haus bilong ol we i stap klostu long Wairiki Institut ov teknoloji.

Ol papagraun i bin welkamim mipela insait long wapela seremoni ol i kolim long "Powhiri" we i mak olsem ol tumbuna bilong ol i luksave long mipela. Seremoni i bin pinis wantaim "Hongi" rabim nus na porewt isi olsem mak bilong welkam.

Het tok bilong RTI

ol Metodis Wimens Federesen bilong Samoa long Amerika long 1950.

Antap long lainim, lukim na pilim kalsa na naispela ples em Nu Silan na ol pipel bilong em i givim, bung i wapela sans long wokim na strongim wok pren namel long ol YWCA meri i bin kam long ol arapela hap bilong Pasifik na senisim ol aida o tingting wantaim ol.

Moa yet, wantaim ol YWCA long Hamilton, Aotearoa, Rotorua na Whangarei.

Ol lain bai helpim mipela wantaim wapela wokmeri long kirapim Yang Wimens Desk long Nesenel YWCA Nesenel opis. Mipela i amamas long Sharon Baghwan Rolls bilong Pasifik Femlik na memba bilong YWCA Fiji bai raun i kam lukim mipela long dispela mun.

Olsem ol yangpela meri, mipela i lainim planti samting long RTI tasol long wankain taim tu, YWCA PNG i kisim salens long glasim na skelim na kamapim gut ol program bilong em long helpim gut ol meri long kantri.

Veronica Hatutasi i raitim

**SAMTING olsem 50 meri i wok long Nesenel na Provinsel politikel level i bung long Pot Mosbi long dispela wik long stap insait long wapela jenda ikwaiiti woksop long save moa long wok ol man na meri i ken mekim long sapatim wapela narapela insait long ol wok developmen na politiks bilong kantri.**

Jenda i min olsem ol samting i sut long man na meri.

Het Opis bilong Komonwel Palamenteri Asosiesen i stap long London, Ingran wantaim Unifem em han bilong Yunaitet Nesens i go pas long ol wok bilong helpim ol meri long ol memba kantri i sponsaim dispela tripela de woksop.

Em i namba wan kain woksop i kamap insait long PNG we i bungim olgeta meri lida long politiks sait i wok long Palamen, ol meri grup, nesenel level na long ol provins i kam bung wantaim insait long wapela konferens o woksop olsem.

Ges Spika long dispela woksop em Honorebol Lindiwe Maseko em Siameri bilong Komonwel Wimen Palamenteri Komiti (CWP) we i karamapim 53 Komonwel memba kantri, i tok bikpela samting we dispela komiti i strongim em long lukim moa meri i go insait long Palamen. Mak we ol i tagetim em long 30 pesen.

Em i tok planti kantri long Afrika nau i go pas long bikos ol i ovarim dispela mak wantaim moa meri lida bilong ol i stap long Palamen, tasol long ol arapela kantri, mak i stap daunbilo tru. PNG i wapela long ol we mak i stap daunbilo na nau, em i gat wapela meri memba long Palamen. Insait long 30 yia PNG i kisim independens 4-pela meri tasol i bin stap long Palamen.

Em i tok em i no isipela samting long ol meri i go insait long Palamen tasol ol i noken slek o givap, ol i mas strong na wok hat.

"Ol meri i mas strongim tingting bilong ol na wok hat. Ol i mas putim strongpela tingting bilong ol long dispela na sosaiti tu i givim sapat. Bikpela samting tu em pasin bilong ol



• Theresa Saini i makim Wimen in Politik long Esia Pasifik rijen, Misis Lindiwe Maseko em Siameri bilong ol meri palamenterien long Komonwel na Komyuniti Developmen Minista Dame Carol Kidu long bung bilong welkamim ol lida i kam long Komonwel na ol meri lida long ol provins. Foto: VERONICA HATUTASI.

man i go long ol meri i mas senis na ol politikel pati i mas sapatim ol meri.

Tru, yumi gat ol historikel na katsere samting we i mekim ol meri i no stap long wankain level ol dispela i mas senis. Bai "mipela i karimaut ol woksop long mekim ol meri na ol arapela bikman i klia na sapatim gut ol meri long go insait na helpim long poliitkel eria." Misis Maseko i tok.

Dame Carol Kidu em Minista bilong Sosel Developmen na i memba bilong Komonwel Palamenteri Wimens Komiti i tok dispela i wapela historikel bung bikos em i kamap long namba wan taim na i bungim ol meri lida bilong olgeta provins i bung na kisim save, serim ol tingting long ol samting i karamapim ol meri, wok long Palamen na jenerel isu bilong ol meri.

## Ampa bai kirapim ol distrik komiti

NUPELA Bogenvil Otonomes Gavman i gat tripela meri insait long Haus Palamen bilong em we i gat 40-pela memba long em. 37 memba em ol man.

Francesca Semoso husat pastaim i bin wapela redio wokmeri long PNG we nek bilong em i save pairap antap tru long Nesenel Bortkasting Komisnin- NBC-na Nau FM long Mosbi, i winim sia long makim ol Not Bogenvil meri na tu, ol Haus palamen memba i makim em long kama p deputi spika.

Laura Ampa husat i gat bikpela luksave long Buin olsem meri i strongim wok bilong ol long planti yia i bin winim sia bilong ol meri long makim ol meri Saut Bogenvil.

Na Magdalen Toroansi husat i bin wok olsem diplomet long planti yia taim em i wok wantaim Foren Afeas na makim kantri long ol ovasis opis olsem Nu Yok, Amerika, Saut Korea na moa i winim sia long Sentrel Bogenvil long makim ol meri long dispela-konstituensi.

Mis Toroansi i bin pinis long wok long 2001 na go stap long ples na i bi wok wantaim ol meri Sentrel Bogenvil husat i luksave long wok bilong em na givim

em ful sapat long winim sia. Long las wik Fonde Presiden bilong Bogenvil Otonomes Gavman Joseph Kabui i makim Mis Toroansi olsem wapela long ol 10-pela Kabinet memba na i makim ol meri.

Em i kamap olsem Minista bilong ol Meri, Rilijen, Tredisinel Atoriti Lokol Level Gavman na ol Non Gavman Ogenaisesen.

Wantok i bin kisim sampela tingting bilong Laura Ampa husat i kam long Karkar Ailan insait long Madang provins tasol i marit long ples Nakaro long Buin. Na em i strongim kona bilong em long Buin we em i wok wantaim ol meri.

"Bai mi wok wantaim ol meri insait long Saut Bogenvil na ol komyuniti wantaim tu ol eks paitman long daunim domestik vailens o pasin bilong paitim nogut na bagarapim ol meri, reip, bagarapim pikinini na hevi insait long famili.

Karimaut ol edukesen aweanes long ol komyuniti em bikpela samting long kirapim dispela wok.

Skulim ol meri long helpim ol yet na salim ol pikinini meri i go long skul.

Na ol i mas save olsem ol pikinini meri i mas gat wankain sans olsem ol

pikinini man. Ol meri i bin kisim bagarap, ol man bilong ol em ol bin kilim ol o ol i lusim ol em bai mipela i mekim wok rises na lukluk long wanem helpim ol i ken kisim.

"Ol meri i bin mekim bikpela wok tru long

wok bilong pasinim gutpela sindaun na i moa gutpela long ol man i givim wankain sapat nau long ol meri long dispela wok na yumi ken putim han wantaim long skruim wok moa yet.



• Longpela taim wokmeri na "Mama bilong Samoa YWCA Dokta Penelope Alailima-utu i kisim awod. Em i sanap wantaim grup bilong em bilong Samoa.



• Haus ol i wokim long tumbuna stail we sampela i bin slip long em. Kain kaving em i mak bilong ol Maori pipel.



**Kuk Kona wantaim MERI WANTOK**

**Kokonas Biskit**

**Yu mas i gat:**  
125 grem medo lea majarin o bata  
1-pela kap kasta suga  
1-pela kiau  
2-pela kap fleim self reising flaua  
Liklik hap sol  
1-pela kap gretet kokonas o kokonas yu sikirapim  
Moa suga long sait

**We long Kukim:**  
1- Miksim majarin na suga, tanitanim kiau na putim flaua we yu siftim o seksekim pinis. Putim i go wantaim tu sol na gretet kokonas

2- Rolim i go olsem ol bal na presim o mekim i go flet namel long ol han. Long antap hap bilong dispela we yu rolim i go long bai, dipim top hap long ekstra suga.  
3- Taim yu putim ol kokonas biskit miks yu rolim na fletim pinis i go long beking trei yu grisim liklik, putim dispela sait yu dipim long suga i tanim antap bilong larim i spret.  
4- Bekim long hotpela oven insait long 10 na 15 minit.

TOKTOK NATING Wantaim Fr. Paul Liwun SVD



Ol bisop bungim nupela hetman long Rom

...ol i karim save i kam long daiosia bilong ol

TAIM mi stap long Gret wan long rilijen klas, tisa bilong mi i bin skulim mi olsem God em i stap long olgeta hap na em i tu bin droim wanpela bikpela ai long soim olsem ai bilong God. Em i bin tokim mipela olsem, God i gat bikpela ai, na em inap lukim olgeta samting i stap long ples klia na i stap long ples hait tu.

Katekismo bilong Katolik sios i bin skulim yumi olsem God em i stap long olgeta hap. Tasol olsem wanem yumi bai save olsem God em i stap long olgeta hap?

Wanpela man, nem bilong em Mulla Nasrudin i save bihainim skul bilong Guru (Tisa) bilong em olgeta taim. Wanpela taim Guru i bin skulim em olsem: "Lukim.... God em i stap long olgeta hap. Yu mas luksave long en". Dispela skul o tok bilong Guru bilong em i bin kamap strong tru insait long bel bilong Mulla Nasrudin.

Wanpela de, em i bin raun i go long wanpela zu o ples ol i save lukautim ol animal wantaim gelpren bilong em. Nem bilong gelpren bilong em; Nyrdia. Tupela i amamas tru i wokabaut insait long zu wantaim planti ol arapela manmeri. Wantu tasol i gat wanpela tok save i kamap long laud spika olsem: "I gat wanpela elefan i bin lusim banis bilong em. Olgeta manmeri i stap insait long zu i mas painim ples bilong hait, bai elephant i no kilim yupela".

Taim Mulla Nasrudin i harim dispela toksave, em i bin tokim gelpren bilong em olsem; "Noken pret daling, God i stap long olgeta hap".

Tasol Nyrdia i pret tru. Em i bin fosim Mulla Nasrudin long go wantaim em na painim ples bilong hait. Tasol Nasrudin i no laik bihainim tok bilong gelpren bilong em. Nyrdia em yet i ronawe na hait insait long toilet. Tasol Mulla Nasrudin i no laik bihainim.

I no longpela taim bihain, elefan i bin kamap na kikum na atakim Mulla Nasrudin na bagarapim em stret. Bihain elefan i bin tromoi Mulla Nasrudin i go insait long wanpela raun wara i stap insait long zu. Laki, bikos reskyu tim i bin kamap na holim elefan na putim i go bek long banis na tu i bin helpim Nasrudin i kam aut long raun wara. Em i stap laip yet, olsem na ol i bin hariap na karim em i go long haus sik.

Long apinun, taim Guru bilong Mulla Nasrudin i harim wanem samting i bin kamap long Nasrudin, Guru i bin kam na lukim em long haus sik. Guru bilong em i kirap nogut taim em i lukim pes bilong Nasrudin i bagarap tru....wanem samting i bin kamap long yu, Nasrudin?, guru bilong em i askim em.

Mulla Nasrudin i komplem long tisa bilong em: "Yu bin skulim mi olsem, noken pret, God em i stap long olgeta hap. Long dispela as tasol mi no wari tumas, bikos mi bilip olsem God bai kam na lukautim mi. Mi no bin painim wanpela ples long hait, taim mi harim toksave i bin kamap long laud spika. Tasol, God i no bin kam ne helpim mi, olsem na mi bin kisim bikpela bagarap tru".

Guru bilong em i smail na lap wantaim, na i bin tokim Mulla Nasrudin olsem: "I tru, God em i stap long olgeta hap. Yumi inap lukim pes bilong God na harim nek bilong em. Nek bilong man i kamap long laud spika, na sliia tok bilong gelpren bilong yu long go na hait long toilet, dispela olgeta i kamap long God husat i stap long olgeta hap. Toksave i kamap long laud spika na tok bilong gelpren bilong yu.... olgeta i kam long God. Bikos yu NO LAIK HARIM OL NA BIHAINIM WANEM SAMTING OL I ASKIM YU LONG WOKIM, olsem na nau yu kisim bikpela bagarap tru. Noken kros na sutim tok nating long mi".

Tru. God em i stap long olgeta hap. God i yusim narapela manmeri long helpim yumi. Olsem na HARIM NA BIHAINIM TOK GUT.

OL Katolik Bisop bilong PNG na Solomon Ailan i kam bek long wokabaut bilong ol long Rom wantaim ol gutpela samting ol i lainim long en we ol bai go hetim long ol daiosis bilong ol.

Dispela wokabaut i gat histri long em bikos namba wan, ol i bungim nupela hetman bilong Katolik Sios long wol em Pop Benedict 16 na narapela em long ol bin kisim wanpela bisop i makim Angliken Sios wantaim ol long dispela wokabaut bilong ol i go long Rom.

Vais Presden bilong Konferens bilong ol Katolik Bisop long PNG na Solomon Ailan na Oksileri Bisop bilong Hagen Asdaiosis Bisop Douglas Young i tok ol bisop i bin lukim Pop Benedict 16 na em i wanpela man i gat daun pasin na ol i amamas olsem em i gat taim na yau long harim ripot bilong ol bisop long wan wan daiosis bilong ol.

"Dispela i kamap ples klia long etres bilong em taim ol bisop i pinisim wokabaut bilong ol.



• Pop Benedict 16

Pop egensim ol pater long kamap politisen

HETMAN bilong Katolik Sios long wol Pop Benedict 16 i tokim gen ol Katolik pater long dispela wik olsem ol i noken go insait long politiks tasol soim piksa bilong klinpela na daun pasin.

"Noken paulim luksave bilong pater wantaim taitol bilong man nating o wantaim wok politiks," Pop Benedict i tokim ol bisop bilong PNG na Solomon Ailan husat i bin stap insait long wanpela wokabaut i go long Rom insait long las tupela wik.

Em i tok ol bisop i mas soim eksampel bilong laip we i isipela (simple), klinpela, daun pasin na wok long givim sevis i go long ol pipel wantaim tu wok long wokim misa lotu olgeta de.

Pop i bin toktok strong long gutpela wok bung i mas stap namel long ol bisop, pater na moa yet, ol katekis na ol arapela lei sios woklain husat i karimaut ol wok misin bilong sios," Bisop Douglas i tok.

Bisop Douglas i tok tu olsem ol narapela Dipatmen long Vatiken i bin autim laik bilong ol long helpim loko o aspels sios long PNG na Solomon Ailan i karimaut ol wok bilong ol wantaim wok bung namel long ol arapela Katolik sios long wol.

Ol bikpela samting we ol bisop i bin toktok long en em long situasen bilong ol refuji bilong Wes Papua long PNG, Ol lain Kiribati Ailan pipel husat i sindaun long Solomon

Ailan, ol lain bilong Manam Ailan we hevi bilong maunten paia i bagarapim ol na ol i lusim ples na sindaun long kea senta, trening na fomesen skul bilong ol pater, Kristieniti na tumbuna kalsa, ol wok ekumenisim o wok bung wantaim ol arapela sios, moa yet, dispela wantaim Angliken Sios na wanem samting sios bai mekim long trabel ol kleji olsem ol pater i wokim. Long planti ol toktok long ol dispela samting, ol bisop i bin amamas long lukim olsem sios long PNG na Solomon Ailan em inapim ol wok bilong em gut. Long wankain taim tu, ol bin amamas long ol tingting we i bin kam long ol

wanlain bilong ol long Afrika.

Ol bisop i save mekim dispela wokabaut i go long Rom bihain lobng olgeta 5-pela krismas. Ol i save gat bung wantaim Pop na givim ripot bilong ol long ol samting i kamap long daiosis bilong ol, raun lukim ol matmat bilong Aposel Peter na Paul husat ol bin kilim dai long Rom na ol i planim ol long matmat long Vatiken. Ol i save raun lukim tu ol narapela Dipatmen long Vatiken na moa yet ol dispela i lukautim Evanjelaisesen, Ekumenisim, Heit, Sosel justis na Liteji.

Long namba wan taim tu, ol bisop i bin kisim wanpela bisop bilong Angliken Sios long PNG i go wantaim

ol long dispela wokabaut long soim gutpela wok pren namel long tupela sios i stap long PNG.

Ol bin kisim Asisten Bisop bilong Aipo/Rongo Daiosis long Hailans em long Bisop Denys Ririka olsem ges bilong ol long dispela wokabaut. Pastaim ol bisop i save toktok tasol long gutpela wok bung namel long tupela sios long PNG tasol long dispela taim, samting tru i kamap taim ol i kisim Bisop Denys i go wantaim ol.

Taim ol bisop i go bek long ol wan wan daiosis bilong ol, ol bai go het long glasim ol toktok ol bin gat long bung long Rom na ol samting we ol i ken lainim long Katolik Sios long narapela hap bilong wol.



Lain ya bai karimaut bel gut na sekan pasin wok

• 49 yut lida bilong kombain sios long Bogenvil i greduet long Wakunai Aero Pasto trening skul long karimaut wok bilong stretim tingting na sekan na kamapim gutpela wanbel pasin. Foto: ALOYSIUS LAUKAI

Angliken Bisop Denys kisim presen long Pop

...Bisop Cherubim sik long Rom

Veronica Hatutasi i raitim

BISOP Denys Ririka em Asisten Angliken Bisop bilong Aipo/Rongo Daiosis long Hailans, PNG i kiskim wanpela gif o presen long Pop Bendict 16 long Rom we em bin ol Katolik bisop bilong PNG na Solomon Ailan i bin kisim em i go olsem ges bilong ol long soim gutpela wok bung na pren namel long tupela sios.

Presen ya em long naispela kopi bilong Nupela Testamen we ol i raitim long han long Tokples Grik.

Bisop Ririka i bin sik liklik na em i no bin inap long kisim presen na Jenerel Seketeri bilong Konferens bilong ol Katolik Bisop bilong PNG na St. Lawrence Stephens i bin makim em na kisim presen na givim i go long em.

Long wankain taim tu, Oksileri Bisop bilong Pot Mosbi Asdaiosis Bisop Cherubim Dambui i bin sik taim ol i stap long Rom wokabaut na nau em i stap long Lazaro Spallanzani Haus sik long Rom.

Pastaim em bin slip long Gemeli Haus sik we leit Pop

John Paul 2 i save go long em taim em i sik inap long em i dai.

Taim em i sik pastaim, em bin lukim ol Dokta long Vatiken klinik tasol ol i salim em i go long Gemeli na bihain long Lazaro we em i stap nau long 5-pela de nau.

Mista Stephens i tok em bin lukim em long Mande bipo em i lusim Rom na ol Dokta i wok long painim as bilong sik we i gat bikpela tuhat o fiva long en. Haus sik i ting olsem dispela sik i mas kain tropikel sik we i save kamap long hotpela ples yet.



GUTPELA GOD BAI I GIVIM SAMTING LONG OL MAN I PREA LONG EM

Jisas i tok moa olsem, "Yupela i mas prea na askim God long givim ol samting long yupela, na em bai i givim long yupela. Yupela i mas wok long painim samting na bai yupela i lukim. Yupela i mas paitim dua, na God bai opim long yupela. Olgeta man i prea long God, ol i save kisim ol samting. Man i wok long painim samting, em i save lukim. Na man i paitim dua, God bai opim dua long em. "Olgeta pasin yupela i laik bai ol arapela manmeri i mas mekim long yupela, ol dispela pasin tasol yupela i mas mekim long ol. Dispela em i as tok bilong lo, na em i as bilong Tok bilong ol profet.

MATYU 7: 7-8, 12.

**Glasm Tok wantaim Bisop Peter Fox**



**Pel bilong Pasifik**

WOI i gat planti nasipela nambis. Australia i gat nambis we planti pipel i save long em ol i kolim long Bondi Bis. Hawaii i gat Waikiki. Ingran i gat gutpela nambis na Frens Riviera em nem we i gat bikpela nem long intenesenel level. Ela Bis i ken resis wantaim olgeta ol dispela biknem nambis. Yumi gat ol kokanas, waitpela waisan na gutpela wara i no tuhat o kol tumas.

Mosbi i laki long gat nambis long namel bilong taun. Na em i samting bilong sem sapos yumi westim nating dispela. Em bai naispela hap long raun wokabaut long em sapos i nogat pipia long en. Em bai gutpela ples long swim long em sapos paip i karim pekpek i kapsaitim long solwara i no stap klostu.

Wanem samting i kamap long naispela gaden long hap sait bilong nambis? I bin gat raunwara we yu inap long lukim wanpela dolphin i swim. Em i hul nating nau, putap long pipia. Ol manmeri inap wokabaut antap long ol hap bilong wokabaut ol i wokim long ol palang na lukluk aninit long ol pis. I bin gat win sefing long sua na ol naispela kala seil i bin mekim i luk nais tru. I no longpela taim i go pinis, yumi bin gat ol dispela samting, tasol i nogat nau.

Pot Mosbi bilong yumi i ken kamap olsem "Pel bilong Pasifik" o top naispela ples tru long Pasifik na Ela Bis em samting tru long amamas long en. Dispela kain driman em no inap long kamap tru? Tingim, em bai inap luk olsem wanem?

Yumi ken klinim na rausim ol pipia, putim nupela peint long ol likik stua long nambis i save salim ol sof dring na kaikai na klinim tu ol siso, ol slaid na raunabaou ol pikinini i save pilai long en. Sapos i nogat ol stilman, ol manmeri i ken go na famili i ken raun aninit long ol lait i luk nais. Ol yangpela pipel i ken bung na wokim babakyu na danis long naispela musik na i no hariap i go long haus taim tudak ni painim ol.

Yumi ken senisim Pot Mosbi i kamap olsem "Pe bilong Pasifik" tasol dispela i ken kamap sapos yumi laikim stret .Em i taim nau long kisim bek Mosbi long ol manmeri nating. Ol stilman na raskol i nogat rait long kisim dispela long yumi. Planti bilong yumi i laikim bai yumi gat seif na naispela ples we ol pikinini bilong yumi bai groap long en. Pot Mosbi i ples bilong ol grasrut manmeri, ol gutpela pipel bilong PNG. Sapos yumi laik , yumi ken mekim kamap Mosbi olsem ples yumi laikim em i kamap long en. Yumi no nidim mani long mekim dispela tasol laik na amamas long yumi yet na siti bilong yumi. God i givim nambis i fri long yumi.

**Yunaitet Sios lonsim mentenens projek**

**Veronica Hatutasi i raitim**

YUNAITET Sios long PNG i lonsim wanpela projek long karimaut ol wok mentenens long ol bikpela institusen bilong ol.

Wanpela em long kamapim gut trening kolis bilong ol Minista na Pasto insait long Is Nu Briten provins na narapela em long Ela Yunaitet Sios long Pot Mosbi Eben rijen..

Rarongo Tilojikel em bikpela Tilojikel trening skul bilong ol Yunaitet Sios minister na pasto long PNG na ol arapela Pasifik rijen.

Modereta bilong Yunaitet Sios long PNG Reveren Samson Lowa i tok ol i lonsim "Think Big Start Small Projek" na ol bai go hetim long tupela rijen.

Namba wan em ol i karimaut long Niugini Allan rijen na dispela em long Rarongo Tilojikel Kolis we ol i

stat pinis long mun Epril long karimaut ol wok mentenens na stretim ol bilding na ples long kamapim gut na ol pasto na minister i ken sindaun gut na go hetim trening long ol wok bilong ol.

Projek long Ela Yunaitet Sios i bin stat long mun Mei.

Reveren Lowa i tok tingting long kamapim dispela em long serim wok wantaim ol pipel na kongriksen long karimaut ol wok mente-

nens na kamapim gut ol bilding na kamapim gut ples.

Reveren Lowa i tok bai ol i kisim ol voluntia long Yunaiting Sios long Australia long helpim ol wantaim long projek na namba wan

grup bai i kam kamap long kantri tude apinun. Namba tu grup bai i kamap long dispela Sande.

Insait long tupela wik i kam, laspela grup bai i kam na gohet long wok mentenens.

**Caritas strongim gutpela sindaun**

**Aloysius Aisi i raitim**

KATOLIK Sios insait long Enga provins i wok strong nau long bildim ol gutpela kristen

Komyuniti long kamap self rilaien o mekim samting long lukautim em yet na rasmusim pasin bilong pait.

Ol daiosisen Caritas opisa long Wabag i strongim dispela wok na nau ol i trenim ol yangpela manmeri long 4-pela dineri bilong daiosis i stap.

Siaman bilong Daiosisen Caritas opis Jacob Pos husat i bin karim wanpela woksop long lidasip, seif ritaiens, jastis na pis long Par Pastorel Senta long Wabag i tok aweanes na trening long ol komyuni- nihti lida i bikpela samting long kamapim gutpela sosaiti.

Mista Pos i tok givim trening i go long ol dispela manmeri bai redim ol long kamap ol trena na ol bai trenim ol arapela insait long ol komyuniti bilong ol.

Pipel i ting Enga em wanpela provins we pait na hevi i save kamap olgeta taim tasol sios i developim o kamapim ol sevis oong painim gutpela sindaun, demokresi na fridom. Na Katolik sios wantaim Caritas long Wabag i wok long mekim,"Mista Pos i tok.

Caritas long Wabag i gat ol lida long 19-pela peris bilong daiosis husat i kisim trening na we ol i givim ol wok long strongim ol pipel long mekim ol samting bilong helpim ol yet.

Long wankain taim, Caritas long Wabag bai hostim o kamapim wanpela konferens bung long jastis, pis na integrel humen developmen o strongim man kamapim developmen long olgeta eria na i askim ol Palamen memba bilong ol, Enga provinsel Gavman, ol Lokol Level gavman, pablik sevan na sampela politisen long Mosbi bilong stap insait long em. Bung bai kamap long wanpela wik na stat long Julai 25 inap loong de namba 29.

**BTA selebretim 25 krismas**

**Paulus Tali i raitim**

BAIBEL Trenlesen Asosiesen las wik i bin amamasim 25 krismas bilong ol insait long kantri.

Planti manmeri tru i bin kamap long lukim na amamas long dispela de wantaim ol wokmanmeri bilong tanim tok long Baibel.

Wanpela man Bogenvil, Mark Saipara husat i save go pas long tanim tok long tokples Nagovis long 10-pela yia i kamap tu long dispela de na i tok kain luksave long wok bilong ol na amamasim dispela 25-yia bilong Asosiesen i strongim em long go moa long wok bilong em.

Em i tok wok bilong ol long tanim tok long buk Baibel i go long tok ples bilong wanwan manmeri i helpim ol manmeri long save gut long tok bilong God na kam save moa long God.

Long makim dispela de olpela dairekta bilong BTA

David Gela i tok wok bilong tanim tok i go long tok ples bilong wanwan ples i no isipela samting. Em i save kisim planti taim long tanim, em i tok. Tasol bikpela tok tenk yu i mas long God Papa long mekim ol samting isi.

Bipo Palamen memba bilong Menyamia long Morobe provins, Ainde Mainzo i wanpela bilong tanim tok long Baibel i kamap long dispela de. Mainzo i save tanim tok i go long tok ples Angatiha long helpim ol pipel long Langama long Morobe long save long tok bilong God.

Ol wokmanmeri bilong BTA klostu nau i stap long olgeta provins long kantri.

Wok bilong BTA i no bilong tanim tok tasol. Nogat.

Ol i save helpim ol skul long ol manmeri long rit na rait tu. Long kamapim ol progrem bilong lidim ol prea grup na planti ol arapela samting.

Long wok bilong ol trensieta ol i save askim ol Kristen long



**• Karl Franklin 1st BTA Dairekta na Siaman William Edoni katim kek.**

helpim ol long pre tu long wok bilong ol i ken kamap gut.


Long selebretim dispela de tu bipo dairekta bilong Sama Institut ov Linguistik (SIL) Karl Franklin we i tok em i amamas long lukim planti ol manmeri i kamap long lukim na amamasim dispela de.

Em i amamas tu long ol manmeri husat i givim taim bilong ol long tanim tok i go long tok ples bilong wanwan ol ples tu.

Long dispela taim BTA i givim medol long Franklin na Bruce Whilly long wok bilong ol SIL na sapotim BTA.

Ges spika long dispela de Dame Carol i tok em i amamas long wok bilong BTA na i tok strong long BTA na ol sios long ol i mas wok bung gut wantaim gavman long bringim gutpela sevis na sindaun i go long ol pipel.

**POSITION VACANT**



**CATHOLIC CHURCH INSTITUTIONAL STRENGTHENING PROGRAM COORDINATOR**

The Catholic Bishops Conference (CBC) Secretariat invites applications from people interested in the development of Church institutions to meet the challenges of **planning and management**, and in particular, financial management, responsibility and accountability.

With support from the AusAID and Caritas Australia funded Church Partnership Program, the CBC is managing a series of activities specifically intended to improve administrative capacity throughout the Church. The program includes planning workshops, administrative and accounting skills development, and support to individual administrators.

A Program Coordinator is sought for the institutional strengthening program. The position will be based at the CBC offices in Gordon, NCD.

The successful candidate must have:

**Essential criteria**

- A University degree (or equivalent)
- Experience working in the area of human resource and management skills development
- Demonstrated ability in report writing
- A commitment to the ethos and values of the Catholic Church
- Demonstrated ability of empowering and supporting people
- Ability to be flexible and work within a team and independently when required
- Excellent written and oral communication skills

**Desirable criteria**

- Work experience in financial administration
- Experience managing or reporting on donor supported aid programs
- Knowledge and understanding of administration requirements in PNG.
- Current driver's licence

Applications should include a CV and statement addressing the selection criteria. Please forward applications or enquiries to:

**Josephine T Dukaduka**, Catholic Bishops Conference, PO Box 398, Waigani NCD 131  
Ph: 3259577, Fax: 3232551,  
Email: [cbc@catholic.org.pg](mailto:cbc@catholic.org.pg)

**Closing date for applications: Wed 13 July 2005**

# Ol Jubili sumatin soim sapot long Maun Daimon

Veronica Hatutasi i raitim

OL sumatin bilong Jubili Katolik Sekonderi skol long Pot Mosbi autim bikpela tok sori na wari long ol sumatin, moa yet ol sumatin meri, bilong Maun Daimon Hai Skul long Sentrel provins husat i bin bungim birua

na hevi long Tunde Jun 14 na salim wampela sapot pas long ol. Long dispela birua, 20-pela raskol bilong 6 Mail setelmen i bin repim o bagarapim tripela sumatin meri na stilim olgeta samting bilong 13-pela sumatin man na ol narapela samting i bin stap insait long skul trak bilong ol.

Dispela birua i bin kamap long Tunde nait 10 kilok samting taim skul bas na ol sumatin i wok long go bek long skul bihain long wampela sik sumatin meri i bin kisim tritmen o marasin long Dokta long Pot Mosbi Jenerel Haus sik.

Trak i bin bungim hevi taim wampela taia i bagarap long

setelmen eria tasol draiva i no stop na i go tasol inap ka i sek-sek olgeta na em i stop long stretim dispela hevi.

Ol ripot i tok ol raskol i mas lukim trak bilong Maun Daimon i go pastaim na ol i putim sampela hap ain long kamapim bagarap long skul trak.

Taim trak i stop, tupela manki i go aninit long trak na stat long rausim na senisim taia na ol meir i stap insait.

Ol narapela manki sumatin i sanap olsem sekyuriti long trak.

Bihain long samting olsem 15 na 20 minit, moa long 20 raskol manki i kamap long bus wantaim ol naip, ol gan ol i wokim long ples na wampela fektori gan na kisim ol kalkuleta, ol su, ol hanwas na ol arapela samting ol manki sumatin i gat long han na bek bilong ol.

Ol sumatin ya i bin kalap long trak na go wantaim sik sumatin bihain tasol long stadi na ol i no bin gat taim long lusim ol samting bilong ol long haus.

Ol sumatin man i no pait bek tasol ol i larim ol raskol i kisim ol samting long ol.

Ol i kikim ol sumatin man, holim gan long ol na draiva na tokim ol olsem sapos ol i mekim samting ol bai sutim ol. Na ol i go long trak we ol 4-pela meri sumatin i hait i stap na pulim ol i kamaut na bagarapim tripela long ol.

Wampela i bin strong na pait bek na em i ronawe na singautim ol polis long mobail telepon bilong sampela lain na ol polis i go na paiarim gan long hap we ol raskol i hait long em na kilim dai wampela, tripela i kisim bagarap na stap long haus sik na ol narapela i ronawe.

Long sapot pas i go long ol brata na susa long Maun Daimon Hai skul, ol Jubili sumatin i tok Ol i no inap stap isis moa na larim ol samting nogut na bagarap i kamap long ol gutpela manmeri na moa yet, ol susa na brata sumatin.

"Pasim maus i min olsem yumi tok orait long samting i kamap. Na mipela i no inap long pasim maus moa.

Yupela ol arapela skul bai pasim maus tasol i stap? Mipela long Jubili i raitim na salim pas i go long ol meri skul sumatin bilong Maun Daimon husat i bin kisim bagarap na autim bikpela wari na tok sori bilong mipela long ol.

Mipela i laik tokim ol tu olsem mipela i pre long ol na mipela i stap wantaim ol long spirit long dispela taim bilong hevi.

Mipela i salim wampela pas i go long ol niuspepa long egen-sim pasin nogut tru we ol raskol i bin wokim long bagarapim ol susa bilong mipela na olgeta gutpela manmeri na pikinini long PNG," pas bilong ol Jubili sumatin i tok.

Pater John Glynn husat i wampela tisa long skul i save skulim ol sumatin bilong Jubili long bihainim gutpela pasin olsem jastis, tok tru na daunim ol korap na nogut pasin long sosaiti na lidasip i wari tru long ol dispela kain pasin i kamap na i askim ol atoriti long gavman long lukluk long dispela rot.



Ol sumatin i glasim ol nupela lida!

Ol skul pikinini bilong Arawa i welkamim ol nupela memba bilong Bogenvil Otonomes Gavman taim ol i go bungim ol pipel long dispela wik. Foto: ALOYSIUS LAUKAI



DEPARTMENT OF ENVIRONMENT AND CONSERVATION  
ENVIRONMENT DIVISION  
National Zone Unit

## TOKSAVE

DISPELA TOKSAVE I GO LONG OLGETA REFRIGERATION TEKNISEN O SAVE MAN/MERI LONG WOK BILONG BOKIS AIS, RUM NA AIR KONDISEN BILONG KARINSAIT LONG MILNE BAY PROVINCE OLSEM NIUPLA LO BAI I PUTIM TAMBU LONG OL MAN/MERI HUSAT I NO KISIM SKUL LONG WOK WANTAIM CHLORO FLUORO CARBON (CFC) (trade name: FREON or R12) NA HYDRO-CHLORO-FLUORO-CARBON-(HCFC) (trade name: R22).

DIPATMEN BLONG ENVIRONMENT NA CONSAVEISEN BAI RONIM KOS/SKUL BILONG OL REFRIGERATION TEKNISEN LONG PNG. YU HUSAT TEKNISEN I LAIK KISIM SAVE LONG DISPLA KOS BAI I MAS GIVIM NEIM, POSTAL, TELEFON, FEKS NAMBA NA NEIM BILONG TEKNIKAL SKUL YU BIN KISIM SAVE LONG EN I KAM LONG DISPLA EDRES.

PH: 325 8166, O 323 0846  
FAX: 323 0847 O  
EMAIL: pngozoneunit@datec.net.pg

DISPLA TOKSAVE I KAM LONG SEKRETARI BILONG DIPATMEN BILONG ENVIRONMENT NA KONSAVEISEN.

## Nius Bilong HIV AIDS

wantaim David Ephraim



Long liklik toktok bilong mi long dispela wik, mi gat spesel ripot bilong

lukluk bek long independens na aweanes long 30 krismas i go pinis

LONG lukim 30 krismas bilong kantri bilong yumi Papua Niugini, planti senis i bin kamap olsem planti ol save manmeri i bin kamap long lukautim kantri.

Long 1975 i kam inap long nau, planti hevi i bin kamap olsem pasin raskol, birua long Bogenvil, Sandline na ol kainkain pasin korapsen i wokim kantri i klostu i dai.

Moa long dispela, populesen i go antap moa yet na tu lukim kainkain sik olsem TB, na nau bikpela moa em HIV/AIDS we i bagarapim planti famili na planti i dai pinis i kamap.

Insait yet long dispela hevi, Gavman i bin singaut long helpim ol kantri na oge-naisesen olsem Wol Beng long helpim.

Wampela helpim we Gavman i bin askim na kamapim wantaim sapot bilong Australia em ECP program.

Nau yet Gavana bilong Morobe i bin kisim dispela program i go long kot na kot i painim olsem dispela program i no rispektim o luksave long Mama Lo bilong PNG.

Planti i bin ting Australia i bin wokim kamap dispela program, nogat.

Dispela program em Dokta Puka Temu wantaim Sir Rabbie Namaliu wantaim ol Somare Gavman bin kamapim bihain long Wol Beng i bin tokaut long askim bilong Foren Afeas Minista long helpim program long fainensol manesmen.

Tasol Wol Beng i bin tok ol i no trastim PNG Gavman long ol dinau long program olsem long pasin korapsen na mis-menesmen insait long Gavman sekta bilong kantri. Insait long konstitusen bilong yumi, i gat 5-pela gols o ol i kolim long Nesenel Gois na Dairektiv Prinsipol. Nambawan em Integrol Humen Developmen, namba 2 em Ikwat Patisipesen o wokbung wantaim, namba 3 em Nesenel Soverenti na Self Rilaens (Strong bilong kantri na wok independen), namba 4 em Netserel Risos na Environmen.

Namba 5 em, Pasin bilong PNG stret.

Long independens i kam inap long nau planti long dispela em i no karim kaikai gut. Planti em nogut tru.

Nau kantri i wok amamas long 30 yia, bikpela askim em, tru tru Papua Niugini i demokretik kantri o nogat.

Yumi gat politikol independens tasol yumi no kisim yet ikonmik independens gut.

Singaut long ol lida bilong yumi taim nau long kamapim lo na polisi we bai promotim lokel infomol bisnis.

Long dispela rot bai ikonmik bilong kantri bai kamap strong gen.

# Lo na Oda insait long komyuniti

Hevi bilong lo na oda insait long komyuniti nau i wok long go bikipela, na nau i gat wanpela grup ol i kolim ol yet Komyuniti Jastis Laieson Yunit insait long Lo na Jastis Sekta Program i go pas long strongim wok insait long komyuniti long traime daunim dispela bikipela hevi. Dispela em i stori i go pas long wok bilong Komyuniti Jastis Laieson Yunit. Olgeta mun bai ol i givim liklik stori long wok bilong ol. Sapos yu gat tingting long strongim komyuniti bilong yu, sekim Wantok Niuspepa long pinis bilong olgeta mun long kisim tingting na stia tok i kam long Komyuniti Jastis Laieson Yunit.

**BIKPELA** wok bilong daunim ol hevi bilong lo na oda insait long Pot Mosbi i kisim pinis stia na sapat i kam long Komyuniti Jastis Laieson Yunit (Community Justice Liaison Unit) insait long Lo na Jastis Sekta Program.

Komyuniti Jastis Laieson Yunit nau i redim pinis plien bilong daunim ol hevi bilong lo na oda i sut long ol kontrol sistem o stretpela wok pasin na komyuniti developmen.

Em i luksave pinis long strong bilong mekim wok patnasip wantaim ol arapela ejensi bilong lo na oda, ol NGO grup na mekim wok insait long komyuniti sevis long kamapim dispela senis na developmen.

Dispela wok luksave nau i stap bihain long Komyuniti Jastis Laieson Yunit i kamapim wanpela woksep we ol i singautim Nesenel Kapitel Distrik Komisnin long kam sindaun.

Sampela yia i go pinis, Nesenel Kapitel Distrik Komisnin i kisim nem nogut long kain kain ol paul pasin olsem korapsen we ol manmeri i kisim wok kontrak i no bihainim stret lo, ol politik senis, stil pasin na ol arapela i lukim NCDC i no karim sevis i go long husat manmeri i baim takis long gavman.

Ol arapela hevi bilong lo na oda insait long Pot Mosbi siti i kamapim bikipela na i hat tru long daunim.

Tasol nau, wanpela rot i op pinis na CJLU i go pas wantaim bikipela sapat i kam long publik sevis na ol NGO na ol arapela ejensi olsem Polis, Kot, CS, Jastis, Ombudsman Komisnin na Publik Prosekuta.

Dispela wok i kamapim bihainim stia tok i stap aninit long Konsaltativ Implimentesen na Monitoring Kaunsol we CJLU i sanap strong long lukim namba wan bikipela

as tingting long LUKAU-TIM MOSBI bai i mas i go het long NCD. Wanpela gutpela woksep ol i kolim Ogenaisesen Selp Ripleksen (Organisation Self Reflection) i bin kamap tupela mun i go pinis we i opim rot bilong senis bai kamap long Nesenel Kapitel Distrik Komisnin we Komyuniti Jastis Laieson Yunit i go pas long en. Dispela i sut long halivim long stiaim ol wokmanmeri na menesmen bilong NCDC long luksave long wok bilong ol na ol rot bilong ol long bihainim long daunim sampela hevi i wok long bingim ol wokman husat i save baim takis long NCDC na gavman long sevis.

Dispela woksep i sut long kamapim rot we NCDC wantaim publik sevis o komyuniti bai i ken wok bung na lukluk long wanem namba wan wok bilong NCDC.

Nau Ekling Siti Menesa Iva Kola i tokaut olsem wanpela pas long nuspepa i bin toktok long wanem wok em namba wan wok bilong NCDC na dispela i givim sem long em olsem na em i laikim ol i mas bung na painim rot we ol i ken lukluk long daunim sampela long ol dispela hevi.

Aninit long Lo na Jastis Sekta Program, namba wan wok em long lukautim Mosbi o long tok inglis ol i save tok Eben Sefti o gutpela sindaun na bel isi insait long ol taun na siti. Ol arapela ejensi bilong gavman i kirapim pinis wok long traime daunim hevi bilong lo na oda long wan wan program bilong ol. I mas i gat moa wok na nau em taim bilong karim NCDC i kam insait long dispela bikipela piksa we bai i lukim em i go pas tu long wok bung wantaim ol dispela ejensi yusim wanem kain ol risoses.

As tingting bilong dispela woksep em long:

- Painimaut na luksave long wanem rot bai NCDC i karim ol komyuniti sevis long wan wan distrik insait long Nesenel Kapitel Distrik;
  - Luksave long wanem rot NCDC i save wok long daunim hevi bilong lo na oda;
  - Lukluk long ol wok i ron olsem wanem long bipo na traime kamap wantaim nupela wok bung na kirapim wok bung long daunim ol lo na oda hevi; na
  - Lukluk long wok bilong strongim kontrol sistem o atoriti insait long ol 12-pela wod na karim sevis i go long ol wod we dispela bai stopim ol hevi bilong lo na oda.
- Bilong Kirapim tingting bilong ol wokmanmeri bilong NCDC, CJLU opisa, Shelley Launa i kisim wan wan tingting bilong ol lain bung long wanem samting ol laikim dispela woksep bai stretim.
- Bihain long dispela, wan wan komyuniti lida bilong ol sivil sosaiti grup i makim wanem kain wok ol i save mekim insait long komyuniti bilong ol na wanem rot NCDC inap long wokbung wantaim ol long stretim na daunim ol hevi bilong lo na oda. Bihain long dispela, CJLU opisa i go pas gen long wanpela skul we olgeta lain bung i mekim wanpela WOT analisis eksasais. Insait long dispela eksasais, ol i yusim wanpela tingting bilong painim aut ol hevi na asua long wok ples bilong ol.
- Nesenel Kodineta bilong CJLU, Dokta Rodney Kameata i tokaut olsem dispela Problem Tree Tool, em i wanpela gutpela eksasais bilong painim aut na luksave long ol hevi na traime long kamapim ol rot bilong stretim hariap.

Dokta Kameata i tok em i bilip olsem dispela "problem tree tool" bai givim gutpela skul long luksave long wanem kain program i gutpela aninit bai sivil sosaiti na NCDC i ken wokbung long stretim.

Arapela aktiviti bilong grup em ol menesa bilong NCDC i painim aut olsem; Wokmanmeri (manpower); politik na etministresen wok i stap; ol risos na lejislesen i stap pinis givim gutpela rot bilong wokbung wantaim ol lo ejensi na sivil sosaiti i stap olsem strong bilong NCDC.

Ol i tokaut tu olsem ol wok o samting we i no gutpela tumas em; i nogat gutpela na save wokmanmeri bilong mekim wok stret; i nogat gutpela wok pasin bihainim lo i mekim na NCDC i no karim aut gut oi sevis program.

Namba tu grup em ol namel menesa. Dispela tim i tokaut olsem i nogat gutpela kopret plening, wok bilong polisim na lukautim ol publik maket. Ol wokman i slek nabaut na i nogat gutpela kodinesen, plening na wok monitoring. Long wok bilong publik riiesen tu, ol i tok, i nogat gutpela paifim toktok wantaim ol manmeri save baim takis o wokmanmeri insait long NCD.

Long hia, ol i painim aut olsem wanpela bikipela samting i no i stap em NCDC Kopret Plan i no putim insait em tingting bilong ol sivil sosaiti. Dispela i mekim planti ol komyuniti grup lida i toktok strong olsem NCDC i mas kisim tingting bilong ol pastim na kamapim long nupela Kopret Plen.

CJLU opisa, Shelley Launa i tokaut olsem planti senis i wok long kamap na dispela woksep i laik traime long lukluk gut gen na skelim sampela ol hevi na muv i go het long Kirapim Pot Mosbi bai em i stap gut.

Ekting Siti Menesa Kola i tok tu olsem insait long wok plien bilong NCDC, i gat tripela wok sekta; Lo na Jastis, Eben Menesmen na Komyuniti Developmen we ol i mas lukluk gut gen long wok bung wantaim na kamapim bel isi namel long ol pipel i stap insait long NCD.

Ol hait pasin na salens i stap nau i luk olsem i gat nid long sapatim na strongim NCDC long noken i stap longwe long pasin politik, we i wok long bagarapim wok bilong NCDC longpela taim. Wantok sistem na paul pasin na korapsen tu i bikipela insait long NCDC.

Ol i tokaut olsem straksa bilong NCDC i narakain liklik na i no mitim nid bilong ol lain i save baim takis olsem na ol i welkamim ol tingting we ol ken Kirapim wok gen na wok bai ron gut insait long NCDC.

Dispela grup makim ol mausman bilong ol sivil



Wanpela hap we ol NCDC wokmanmeri i tok i nogat gutpela wok plening em long sait bilong lukautim ol publik ples na maket. I nogat inap wok manmeri na i nogat inap mani i go long dispela wok.

sosaiti i bekim ol toktok bilong NCDC wokmanmeri olsem, NCDC i gat gutpela wokmanmeri husat i gat gutpela save long mekim wok na baset bilong ol i stap long K90 milien em gutpela mak bilong ol i mas lusim ol les pasin, raskol pasin, na sanap strong long bringim sevis i go long ol pipel long Mosbi.

Ol i tokaut olsem ol wok i no kamap gutpela long NCDC em; infomesen teknologi, i nogat gutpela wok lukaut na kontrol long ol program na wokman, wokpasin bilong ol wokmanmeri i no gutpela tumas we ol i les na slek nabaut na wok politik i stopim planti wok long i go het.

Sivil sosaiti grup i tokaut NCDC i gat planti gutpela sans long mekim mani na karim sevis i go long ol pipel tasol ol i no luksave long dispela sans. Sampela i tokaut long ol kain sevis olsem trentpot, ges haus, na hostel we NCDC inap long Kirapim wankain ol sivil atoriti long siti Townsville long Australia i save mekim.

Wanpela samting NCDC i nap long lukluk na kirapim em strongim ol lo i banisim laiesen, trentpot, baim na salim ol haus, graun na peim rent.

Long wok bilong enjinering, dispela grup i toktok strong long NCDC i mas kamap papa o kisim onasip long ol infrastaksa na long sait bilong sosel sevis, NCDC i ken mekim mani na ronim ol helt, skul, yut, spots na meri program insait long lokal level gavman, em wok bilong ol viles kot.

Ol i strongim toktok olsem NCDC em i gat atoriti long Nesenel Kapitel Distrik na wok bilong daunim lo na oda insait long siti i mas sut bihainim gutpela lukaut na kontrol sistem na komyuniti developmen. Ol i laikim NCDC i mas tokaut strong long ol pasin nogut olsem reip i save kamap long ol meri yusim ol welpe sevis bilong ol. Na i no wok bilong polis na CS tasol o kot tu. Dispela bai lukim sampela hevi bilong lo na oda i go daun.

Dispela bung i tokaut long nid bilong skelim gut ol risoses i go long ol eria bilong strongim komyuniti developmen na i ken karim senis i go long laip bilong ol pipel long Mosbi.

Long etministresen wok, woksep, painimaut olsem i gat bikipela nid long wok bung wantaim na

toktok i mas kamap namel long ol menesa husat i mekim wanem wok.

Bung i painimaut olsem wanpela we bilong helpim NCDC long mekim gut wok bilong em na karim sevis i go long pipel bilong NCD em bilong mekim, senis long NCDC Ekt.

Lady Hilan Los, wanpela mausman bilong ol sivil sosaiti grup i tok, sapos ol ekt bilong NCDC i no wok gut long lukluk long ol hevi insait long siti, ol i mas senisim.

Tasol planti ol NCDC wokman i tokaut olsem sapos ol wokmanmeri i traime long kamapim ol senis long ekt, ol porek nogut ol bikman i pinisim ol long wok.

Planti ol mausman bilong sivil sosaiti grup i strongim ol NCDC wokmanmeri long sanap strong na mekim gut bihainim gutpela na stretpela pasin we bai lukim ol sevis i ron gut na noken porek long tokaut long tok tru.

Mista Alois Francis bilong Konsaltativ Implimentesen na Monitoring Kaunsol i



tokim ol osem CIMC i gat gutpela wok bung wantaim gavman na opis bilong em. Sapos i nogat nid long ol i bringim senis i go long NCDC Ekt, em i ken halivim long paifim mekim gut wok bilong em na stap olsem namel man long kamapim ol senis long Ekt.

Dispela woksep i karamapim tupela de tasol, Ms Kola i tokaut ol i lainim planti gutpela samting na dispela i Kirapim tingting bilong ol long luksave long wanem wok bilong ol wanwan long NCDC na pasin bilong wokbung wantaim ol stekholda na sivil sosaiti long kamapim senis long laip bilong ol pipel long Pot Mosbi na mekim Pot Mosbi i kamap ples bilong gutpela sindaun.

\* **Komyuniti Jastis Laieson Yunit i save wok wantaim sivil sosaiti na lo na jastis sekta ejensi long nesenel na rijinel level long kirapim na strongim gutpela sindaun na daunim pasin raskol insait long komyuniti bihainim wok patnasip.**



Polis em wanpela long ol lain husat i wok long wok bung wantaim Komyuniti Jastis Laieson Yunit long daunim ol hevi bilong lo na oda insait long komyuniti. Ol Foto: WANTOK NIUSPEPA

## HEI YU!

**PNG FAMILY HEALTH ASSOCIATION**

**Het Opis: Morobe Provis**  
2nd Street IPI Building, Rum 3.5  
Post Office Box 839, Lae 411, Morobe Province, PNG.  
Tel: 472 6523  
Fax: 472 6296  
Email: pngfha@datec.com.pg  
Clinic: Rum 2.12

**Opis: East New Britain Provis**  
European Union Building, Butuwin  
Post Office Box 216, Rabaul  
East New Britain.  
Tel: 982 8727  
Fax: 982 8721

**Opis: Eastern Highlands Provis**  
Westpac Bank Building, Goroka  
Post Office Box 139, Goroka, Eastern Highlands Province.  
Tel: 732 1369  
Fax: 732 2859

**Yu wok long painim halivim long:**

- Ol rot blong spesim pikinini olsem kondom, kiau marasin na sut?
- Ol skul tok long ol hevi we isave bungim man na meri taim ol i laik kamapim pikinini?
- Skul tok long S.T.I., sik HIV/AIDS na ol arapela hevi blong bodi?
- Kaunseling long gutpela sindaun blong femili?

**Orait kam lukim mipela long ol opis long Lae, Kokopo na Goroka.**

**PNG Family Health Association (PNGFHA)** em i wanpela NGO i save wok strong long kirapim wok na tingting blong ol man meri long femili plening, sexual na reproduktiv helt na ol sevis long halivim ol long kamapim gutpela sindaun blong femili na pipel blong komuniti long PNG.



Salim of pas i kam long WANTOK NIUSPEPA: P.O. Box 1982, Boroko N.C.D 111 Fax: 325 2579 Email: word@global.net.pg

### Maus pas na aipas memba

**Dia Edita**  
 MI TU laik bekim pas bilong wanpela manki Nabak. Em yet em Mista Robert Nalo bilong Goldie River, husat i komplem long Memba bilong Nawaeb long Wantok Niuspepa 28 Epril, 2005.

Mi laik bekim pas bilong yu, Robert Nalo olsem. Ating yu no trupela manki Nabak na tu ating yu no stap long ples, yu mas paul long taun.

Tru sapos yu tok long kain servis olsem ol longpela longpela bilding, 50 stori long Nu Yok em tru.

Dispela em yumi no lukim, tasol wanem kain servis stret ating plis beten na kamap o?

Mipela liklik manmeri mipela lukim sampela senis kamap pinis.

Robert Nalo yu tok aipas na maus pas ya maski yu rausim traipela pipia pas long long ai bilong yu yet pastaim orait yu toktok long arapela.

Yu save maus i no save mekim samting pastaim.

Tingting na pasin save wok pastaim na bihain maus tokaut.

Yu lusim pasin bilong tok baksait na stat prea long Papa long helpim yumi Nawaeb pipel.

Tingim "A brave man can walk with stick slowly, and cannot fall".

**PIKININI NAWAEB BUANA MOROBE PROVINS**

### Intapritesen bilong yu long baibel i rong

**Dia Edita**  
 MI LAIK bekim pas bilong yu, Peter Tilini yu bin rait i kam long Wantok Nius.

Mi bin ritim Baibel teks Mt 5:17-19 yu bin rait long bekim pas bilong mi.

Baibel riting bilong yu em i stret, tasol Baibel intepretesi n o tanim bilong yu i go kranki na bilip bilong yu i sanap antap long kranki skul tingting bihainim we bilong man.

Jisas Kraiss em i no tok olsem, mi i kam bilong bihainim 10-pela lo na holim strong sabat, nogat ya.

Peter Tilini yu wanpela lo distroya, bikos yu sin man. Taim yu mekim wanpela sin, yu brukim olgeta lo bilong God pinis, James 2:10 "For whoever shall keep the whole law, and yet offend in one point, he is guilty of all."

I nogat wanpela man long dispela wol mama i karim em long sin na dai blut bilong Adam em i fit long bihainim holi lo bilong God.

Bikos yumi olgeta i gat sin nogut bilong Adam, yu wanpela long dispela Peter Tilini sin man Rom 3:23.

Tasol Jisas Kraiss em i Pikinini tru bilong God na em tasol i nogat sin, na blut bilong Jisas em i blut bilong God i nogat sin na em i holi pikinini bilong God na em tasol em i kam na bihainim olgeta lo bilong God na inapim o fulfillim Rom 10:4 na holi sabat tu em Jisas tasol Mt 11:28.

Rot i go long heven tu Jisas yet Jon 14:6, olsem na sinman olsem yu na mi i nidim Jisas Kraiss insait long laip bilong yumi na i no lo na sabat.

**PETER KELO KAINANTU ISTEN HAILENS PROVINS**

### Korapsen em bikpela tru long Is Sepik

**Dia Edita**  
 MI LAIK raitim dispela pas i go long Wantok Niuspepa na tok kros i go long dispela hevi bilong korapsen o stil pasin i wok long kamap bikpela tru long Is Sepik dipatmen we ol sinia pablik seven i stilim planti mani klostu long K8 milien.

Long mun i go pinis, provinsi tresera bilong Is Sepik ol i saspendim em long kamap Dairekta insiat


long wanpela kampani we ol i peim ol yet long K150, 000 long wokim Angoram na Wosera Gawi Distrik treseri opis.

Olgeta dispela mani em mani bilong ol pipel bilong Is Sepik na ol i yusim treseri olsem praivet beng bilong ol. I gat planti ol narapela kampani em ol dispela sinia pablik seven i sanapim wantaim ol meri bilong ol na mi amamas long harim wanpela Grup

ol i kolim Sepik Solidarity Grup i kamap pinis long wok painimaut long korapsen.

Bilong wanem na Praim Minista Sir Michael Somare na Gavana bilong Is Sepik i pasim maus na i no toktok long ol dispela samting?

**JOHN KRISOAKI WEWAK IS SEPIK PROVINS**



Toksave: Sampela ol pas mipela i kisim i longpela tumas na i no givim spes long ol arapela pas, plis raitim pas liklik. Na tu putim nem na adres bilong yu long olgeta pas yu salim i kam, tenkyu. - Edita

### Noken sutim tok nating

**Dia Edita**  
 YES tupela mausman bilong ol Buang, Sem Saking na Yatu Majim, toktok yutupela i raitim na putim kamap nem bilong wanpela wokman bilong God.

Long wanem samting em i wok long mekim nau long PNG. Yupela tripela yet i brata, brata tru bilong Buang komuniti tasol yutupela yet i no save long as tru bilong wok nau em i wok long mekim bilong helpim pipel bilong God. Olsem na yutupela i paitim

em long pes bilong en stret. Em yet em i no mekim wanpela tok nogut i go long yutupela.

I nogat tru. Em i stret al! Nau yutupela i sindaun isi na skelim toktok bilong yutupela wantaim dispela tok bilong God, Aposel Pol i raitim i stap long Romans 12:3-8 na wanpela ves 16.

Em i gat wok tru bilong en we inapim tok Pol i tok ya we God i givim em. Tasol em i luksave long sindaun bilong yumi i no gutpela olsem na em i mekim ekskius long sot-

pela taim tasol long mekim dispela sait wok. Sapos em i winim dispela wok pinis, orait em bai i go bek long wok bilong en olsem tok i stap antap.

Dispela em i sotpela bekim i go long yutupela yet Sem Saking na Yatu Majim.

Yupela husat pablik i laik sapolim o agensim em i orait tasol, mi bai amamas long lukim long pepa. Mi yet mi memba bilong Papalain.

**PAF PEE KOKI, NCD**

### Sapos yu no klia, maski toktok nating

**Dia Edita**  
 MI LAIK bekim pas bilong brata ya Paulson Daus bilong SDA Sios long Kimbe i kamap long Wantok Niuspepa namba 1611 Jun 2 2005.

Yes brata yu rait na toktok planti long Katolik Sios. Brata mi ken tokim yu stret olsem olgeta Baibel ves yu raitim em olgeta i no go stret long ol tok bilong yu.

I luk olsem yu yet i no save gut long Baibel. Mi laik tokim yu brata olsem Katolik Sios i no olsem yu nau.

Katolik Sios i gat olgeta evidens na samting i stap long Rom (Vatican City). Sapos yu go long hap bai yu lukim olgeta pas na ol toktok bilong ol aposel yet i stap. Stat long yia 30 i kam inap nau yet. Klin rekot, na yu Paulson Daus yu gat bilong yu long SDA Sios tu o nogat, stat long yia 30 na kam?

Sapos nogat orait maski toktok planti na bihainim mipela.

**NAMASIL VANU MAPRIK IS SEPIK PROVINS**

### Em i hat long bihainim tenpela lo

**Dia Edita**  
 MI GAT sampela poin mi laik mekim bilong stretim hap tok long Buk Rev - 12:1-6 na 17:1-6.

Dispela tok em Ronnie Kengi bilong Mendi, SHP i bin mekim kamap long Wantok Niuspepa # 1610 June 1st.

Na tu, em i tok sios antap long tenpela lo em i trupela sios. Orait, long Rev 12:1-6 i stori profesi. Na Ronnie i tok olsem dispela ves i tok profesi olsem em i makim meri o sios.

Moa yet Ronnie i tok tu olsem i gat tasol tupela sios i stap long graun tude. Wanpela em sios i holim na bihainim tenpela lo, na narapela em sios sanap antap long laik bilong man.

Liklik toksave i go long Ronnie i olsem, i nogat tru wanpela man o meri long graun tude inap long holim na bihainim dispela tenpela lo. Ol trupela lain na pipel bilong God stret, em ol Israel.

Ol i no inap bihainim. Nogat, ol i brukim dispela lo. Olsem wanem bai yu Ronnie na ol wan lotu bilong yu inap long bihainim stret dispela tenpela lo?

Yu yet i brukim wanpela bilong ol dispela tenpela lo pinis tu mi bilip - olsem na yu asua pinis. Na long sait bilong tupela sios olsem yu tok pinis, bai mi tokim yu olsem i nogat tupela sios long dispela graun olsem yu tok. Nogat tru.

Em wanpela sios tasol bilong Jisas Kraiss na em tasol em i trupela sios bai i wok long autim tok bilong man mas tanim bel (repentance) John 3:3-7 i go inap taim Jisas i kam bek nambatu taim long kisim sios bilong em i go.

Mi no ting olsem Baibel i tok long tupela sios. Long wanem, sapos olsem orait i gat tupela grup o lain man na meri i stap long graun tude a?

Wanpela lain em ol lain bilong yu yet SDA husat i save kipim lo na narapela lain husat save lotu long nambawan de bilong wik (Sande) ol kolim ol kristen tude.

I gat wanpela sios tasol, em Kristen Sios husat ol i taitim bun na mekim wok autim gutnius i stap.

Sios we ol tanim bel tru (tru repentance towards God) na ol baptais long bihainim lek mak bilong Jisas, na Holy Spirit bilong God i silim ol pinis ol bilong God stret - em ol tasol i gat tiket (laip stap gut oltaim).

John 1:12 i tok: tasol long ol husat i kisim (received) Jisas long laip bilong ol, God i givim ol pawa, namba olsem ol i pikinini tru bilong em. Lukim tu John 5:24, Rom 1:9-10. Buk Tambu i no tok yu kipim tenpela lo na God i kisim bek yu, nogat tru. Titus 3:5

Dispela namba 4 lo em i sut stret i go long ol Israel tasol Exodus 20:1-17. Dispela Baibel ves yu tok John 14:15 i no stori long dispela namba 4 lo. Keep the Sabbath dei holi ya.

Dispela ves i sut i go bek long lo insait long 5-pela buk we Moses i bin raitim em long Buk Genesis, Exodus, Levitikes, Numbers na Deutronomy we Jisas i kam long inapim (fulfillim). Orait, Rev 12:1-6 em i no makim sios we yu tokim long em. Nogat.

Em i profesi i makim Israel we Kraiss i kam long en. 7-pela het na 10-pela kom i soim piksa bilong satan bai kamap ples klia olsem anti kraiss (anti Christ) Daniel 7:7.

Na Rev 17:1-6 pamuk meri i piksa bilong bikpela rilijis Babylon, quote in English "The woman is the state religion, who rides upon the anti Christ and is protected and made official by the government etc...."

Em tasol na wetim bekim bilong yu husat i laik bekim.



## Godens maket i kamap ples bilong dring bia

GODENS maket long Pot Mosbi i kamap ples bilong dring bia. Namel long wik na long wiken, ol man i save karim botol bia na dring long ples klia long fran bilong maket.

I tru olgeta pipel i save, Papua Niugini em i wanpela demokratik kranti, na ol manmeri i fri long mekim wanem samting ol i laikim. Tasol i gat lo i stap we i luksave long fridom bilong ol arapela manmeri. Taim yu gat fridom long dring long pablik ples na kamapim ol bikhet pasin, tu i gat fridom we ol arapela manmeri i mas muv raun fri long salim na baim ol kaikai na sayor long maket.

Long dispela as na lo bilong PNG i tambulim ol man long dring long ol pablik ples na mekim ol bikhet pasin. Godens Maket em i wanpela ol pablik ples.

Tu ol man i putim dat bot na singautim ol arapela man long pilaim na winim mani na sof dring. Ol man tu i putim ol arapela laki gem olsem haia kas. I tru olgeta manmeri long siti i nidim mani long stap laip. Tasol sapos ol man i gat gutpela tingting, ol bai painim ol gutpela rot bilong mekim ol liklik bisnis pulim wan siling.

Godens Maket i stap insait long bel bilong Pot Mosbi. Dispela maket i stap long



**TOK PISIN**  
wantaim  
**PETER MAIME**

Nesenei Kapitel Distrik na em hetkwota bilong Papua Niugini. Dispela ples em bilong ol manmeri bilong kainkain hap bilong PNG. Godens maket i no bilong wanpela tokples o hauslain.

Pot Mosbi em ples we i gat ol lain bilong ol arapela hap bilong wol tu i stap. I gat ol lain bilong Australia, Nu Silan, Amerika, Saina, Filipins na planti arapela kantri.

Sapos Pot Mosbi em bilong olgeta manmeri bilong PNG na wol, ating yumi mas gat sampela kain pasin bilong luksave long ol tu. Yumi mas luksave long yumi yet olsem mi wanpela i stap namel long ol arapela manmeri. Ating long dispela rot bai yumi luksave gut long fridom na laip bilong ol arapela brata na susa.

Bipo Godens maket em wanpela gutpela maket long Pot Mosbi. Planti ol bisnis lain, ol wok manmeri na ol lain long arapela kantri i save go baim kaikai na sayor. Ol i

save go long Godens maket bikos ol kaikai long ol supamakot, prais i antap tumas. Tasol, nau, maski prais bilong ol kaikai long supa maket i dia tumas, ol i mas go yet bikos ol i wari long sefti bilong laip bilong ol.

Olsem na planti ol loka fama husat i salim kaikai long Godens Maket i lusim bisnis wantaim ol dispela kastoma, husat i no moa kam long maket long baim ol kaikai na sayor.

Gordens Polis Stesin i stap kiostu long maket. Polis i bin traim hat tru long rausim ol man i dring spak, pilai dat na kas, tasol dispela bikhet pasin i stap yet.

Tia ges na gan i no inap stretim dispela bikhet pasin long Godens Maket. Dispela maket i stap ananit long lukaut bilong Nesenei Kapitel Distrik Komisn (NCDC). NCDC i mas mekim wok awenes na tok-save long ol manmeri long rispektim ol arapela luksave long ol yet na ol arapela manmeri.

PNG nau i stap olsem independen kantri, 30 krismas olgeta. Yumi ol pipel bilong dispela kantri i mas lainim long rispektim ol arapela manmeri na mekim samting i stret long ai bilong lo. I gat lo bilong wan wan ples i stap.

## Lida i mas gat driman long wok bilong em

WANPELA "pasin" bilong gutpela lidasip insait long sios o kongregesen o long wok gavman na kampani em i pasin bilong kamapim "piksa" bilong laip

bilong tumoro o laip bihain long tempela yia na kirapim wok i sut long kamapim kaikai bilong dispela driman. Long tok Inglis ol i

kolim "vision". Long tok pisin yumi ken tok "driman". Wanem mining tru bilong tok "vision"?

Yumi ken tok gen olsem "vision" em i piksa bilong wok o plen we lida i kamapim long tingting (het) bilong em long wanem kain laip o sindaun bai em inap kamapim long tumoro.

Planti taim, dispela piksa long tingting em lida i kamapim long helpim em long wok strong long kamapim dispela sindaun em i laikim ol memba i mas amamas o oganaisesen i kisim helpim long en. Long narapela hap tok yumi ken tok olsem "piksa insait long tingting" em lida i mas kamapim long "rot we" em i laikim dispela grup o oganaisesen bai bihainim; wanem kain oganaisesen o grup long tumoro.

Piksa bilong wok o laip long tumoro em lida i save kamapim taim em i lukim oganaisesen, seket o grup i nogat kliapela wokmak o as tingting long stap olsem grup; o dispela seket i paol nabaut long wanem i nogat driman bilong em; o laip pasin, save na sindaun bilong nau i salensim em long kamapim piksa bilong laip, bilip, sindaun na pasin o wokmak bilong tumoro we bai dispela grup o oganaisesen i ken ron gut.

Taim lida i gat driman, laip bilong dispela grup o oganaisesen long tumoro



**Ol prinsipol bilong gutpela lida**

wantaim  
Evangelist

**OHARE JABERE**

em i mas i gat risoses long mekim dispela driman i kamap tru o karim kaikai.

Namba wan samting em i mas lainim olgeta wokman o memba long dispela "driman" bilong em. Long wanem taim ol memba o wokman i klia gut long driman bilong lida, bai olgeta wok ol i mekim bai sut long mak bilong kamapim kaikai bilong driman. Na tu, taim ol memba i save gut long driman bilong lida, dispela bai inap long kirapim bel na tingting bilong ol long wok strong long kamapim tru dispela driman.

Planti lida i save feil long kliarim driman bilong ol long ol memba o wokman olsem na wokman o memba i paol nabaut. Wok em i mekim i no save sut long driman.

Narapela poin, lida mas kamapim ol wokmak o wok program bilong mekim dispela driman i karim kaikai. Soim driman tasol long ol wokman o memba bai i no inap helpim dispela driman long karim kaikai. Lida yet mas go pas long stiaim na direktim olgeta wok pro-

gram we bai inap kamapim tru dispela driman.

Em tu i mas kirapim bel bilong memba o wokman long kain amamas olsem belgut pei, o malolo we dispela i ken amamasim wokman long wok hat long kamapim stret driman bilong lida. Sios o kongregesen planti lida i nogat driman olsem na nogat gutpela laip o sindaun i save kamap o i nogat gutpela wokmak bilong dispela grup o oganaisesen. Lida i no save i gat gutpela "vision" o driman bilong kirapim gutpela wok nabaut long grup o seket bilong em. Dispela kain grup o oganaisesen em i olsem, sip i drip namel long solwara i nogat kepten bilong en. Na taim strongpela win na solwara i sekim em, em i drip nabaut i stap.

Gutpela tingting olsem:

Gutpela lida i mas i gat "piksa bilong laip tumoro" insait long grup o kongregesen bilong em. Dispela lida em i nap long kamapim gutpela wok, sindaun, laip insait long oganaisesen bilong em. Kain lida olsem, em lida bilong wokhat. Na em i no lida bilong sindaun nating na wetim narapela man long mekim tok.

## WANTOK

Published Weekly, Wednesday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: 325 2500  
Fax: 325 2579  
Email: word@global.net.pg  
Pe bilong wanpela yia  
52 niuspepa

<b>Ples:</b>	<b>Air:</b>
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

**General Manager**  
Justin Hansu Kili

**Editor**  
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by the four major churches of Papua New Guinea - Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

## WANTOK KOMENTRI

### Snek pulap insait long helt sevis

LONG dispela wik, ol nes na sista bilong haus sik i givim tok lukaut long gavman olsem ol bai lusim wok bilong ol. As bilong dispela kros bilong ol i stap long gavman i no stretim gut pei bilong ol.

Tasol wanem taim tru na dispela bel kros i bin kirap?

Dispela bel kros bilong ol nes em i wanpela hap tasol long bikpela hevi insait long helt sekta we nau i wok long kamap ples klia. Hevi i sut long sait bilong helt sevis insait long kantri.

Minista bilong helt Melchior Pep yet i tokaut long dispela wik olsem i gat planti samting i no stret insait long helt sekta.

Sapos em i bin mekim gut wok bilong em, em bai save olsem ol liklik man long ples husat i nogat rot long go kisim marasin long bikpela haus sik i wok long karim dispela bikpela hevi long taim yet na nau ol i save lukim olsem samting i save kamap long olgeta hap.

Dispela kain pasin i no stret.

Bilong wanem tru na wanpela man long bus ples long Aitape i mas lusim pikinini bilong em i dai long wanem em i karim em na ron i go long helt senta na ol wokmanmeri long helt senta i tok i nogat marasin. Long wanem as na ol bai salim em long karim pikinini bilong em na ron i go long bikpela haus sik long kisim marasin bikos i nogat ambulens?

Dispela turangu pikinini i bin indai long sol bilong papa bilong em.

Pasin bilong lukim samting i no wok na lusim i go long taim inap kantri bagarap em i pasin we mipela i mas traim lusim.

Ol liklik manmeri i save bungim kain kain hevi long ples. Tasol ol lida bilong yumi long Mosbi siti i no save long ol hevi ol pipel i karim. Olsem wanem na ol i no save.

Em bikos yumi hia long Papua Niugini, pasin bilong yumi i olsem. Sapos mipela i lukim olsem samting i no wok stret na nogat man i senisim, bai yumi larim i go olsem tasol inap yumi painim bikpela bagarap.

Sapos helt minista i bin i gat ol gutpela manmeri i wok aninit long en, bai em i save olsem taim bikpela toktok i kamap olsem marasin i sot long ol haus sik, tru tru ol sikmanmeri i wok long tromoi bikpela hap mani long baim long ol arapela stua nabaut na ai bilong em bai op.

Na bilong wanem ol sik manmeri i go long Pot Mosbi Jenerel Haus Sik i no inap kisim marasin long haus sik yet na ol nes i save salim ol long go baim long narapela stua i stap insait long haus sik?

Helt sekta bilong kantri i gat bikpela wok long lukautim laip na sindaun bilong olgeta manmeri.

Sapos i gat planti samting i no stret insait long dispela sekta, nau em i taim bilong glasim gut. Nau em i taim bilong painim ol dispela snek i stap insait long helt sistem husat i wok long paulim marasin na stilim mani, o paulim ol masin bilong ol haus sik na salim i go long ol arapela manmeri.

Sapos yumi glasim gut, bai yumi ken painim ol.



# PASIFIK NIUS

## SAIPAN: EMPERA NA EMPRES BILONG JAPAN RAUN LONG SAIPAN

EMPERA bilong Japan, Akihito na Empres Michiko i kamap long Saipan long lukim hap we wanpela bikpela pait tru i bin kamap long Wol Woa 2 long prea na onaim ol planti tausen soldia bilong Japan, Amerika na ol as ples i bin lusim laip bilong ol long woa.

"60 yia i go pinis, wanpela bikpela pait em ol i bin go het long en hia long dispela ailan. Ol lewa bilong mipela i bruk taim mipela i tingim ol pipel husat i bin pait long dispela ples we i nogat kaikai, nogat wara, na nogat halivim bilong ol lain i kisim bagarap," tupela marit i tok long wanpela pas.

Ol namba long Japan i tok samting olsem 43,000 soldia bilong Japan na 12,000 as ples manmeri wantaim ol pikinini i bin indai long dispela bikpela pait long Saipan.

Namba bilong US na ol as ples lain inapim 3,500 soldia na moa long 900 as ples manmeri. Long 1995 taim ol i makim namba 50 krismas bilong pinis bilong woa, empera na empres i bin raun lukim ol wan wan ples insait long Tokyo siti, Hiroshima, Nagasaki na Okinawa long prea bilong ol lain i dai long woa.

"Dispela taim long dispela graun i stap longwe long ples bilong mipela, mipela i tingim bek na onaim ol lain husat i lusim laip bilong ol long woa, na mipela bai tingim dispela rot we ol famili bilong ol i bin bihainim na mipela i prea long gutpela sindaun na bel isi long wol." Akihito na Michiko i tok. "Em i bilip bilong yumi taim mipela i wok i go het, mipela olgeta bai tingim olsem kantri bilong yumi tete i kirap antap long laip bilong olgeta dispela pipel."

Wanpela hap ol i bin go lukim em 'Banzai Klif' we ol soldia bilong Japan i bin ronawe na les long ol i holim ol. Ol i bin kalap long dispela ples na kilim ol yet na ol i bin singaut 'Banzai' we i minim olsem stap laip longpela taim bilong onaim papa bilong Akihito, leit Empera Hirohito.

### VANUATU:

**OL AIR VANUATU BOD MEMBA LUSIM WOK**  
OL KOLISIN patna bilong Vanuatu gavman i tingting planti long namba bilong ol pipel i sindaun makim Air Vanuatu long bod.

Dispela i lukim ol i rausim 4-pela long moa long 30 memba bilong bod.

The Independent niuspepa long Vanuatu i tok dispela samting i kamap long kokus miting bilong ol pati i stap insait long kolisin gavman las wik.

Presiden bilong Vanuatu Ripabliken Pati (VRP) na ministra bilong pablik yutilitis, Maxime Carlot i wanbel long daunim namba bilong ol pati memba bilong em long givim sans long ol arapela politikel pati.

Ripot i kam olsem ol memba bilong ol kolisin gavman i gat wankain tingting olsem bikpela namba bilong ol bod memba long Air Vanuatu bod i no halivim bisnis bilong dispela balus kampani, na i ken givim kain kain hevi long en.

### MARSHALL AILANS: MARSHALLS AILAN MAN KISIM MEKIMSAVE

WANPELA man Marshal Ailans i kisim mekim-save bilong kot inap long 7-pela krismas kalabus bihain long kot i painim olsem em i traim long kilim indai wanpela man Taiwan i wok olsem wanpela volantia tisa long mun Me.

Sief Jastis Carl Ingram i tok dispela mekimsave i soim olsem pasin bilong paitim o traim long kilim man em i bikpela birua tru insait long Marshall Ailans, wanpela Pasifik kantri i gat samting olsem 55,000 pipel i stap long ol liklik ailan.

Andy Jeillan, 20 i senisim askim bilong em long i no rong i go long em i rong long wanpela samting tasol em long traim long kamapim meda o kilim man i dai.

Pait bilong em long Taiwan volantia meri tisa Chao-Min Yeh, 30 krismas long haus bilong em long kapital siti Majuro taim em i yusim wanpela ain paip long paitim em i lusim Chao-Min wantaim bun long pes bilong-em i bruk na tu ol arapela hevi long bodi.

Ol i bin karim em i go aut long kantri go bek long Taiwan long kisim halivim.

Ol gavman lida, opisa long Taiwan embesi na nius midia i bin autim bel kros bilong ol long dispela kain pasin.

Nius i kam long PACNEWS

# WOLNIUS

### Kisim taim...

DISPELA ol manmeri-em ol polis long Saina i bin holim pasim ol long ol i karim ol strongpela tambu drak. Tupela ten (20) drak dila i bin kisim mekimsave na ol i kilim 6-pela las wik Fraide. Dispela pablik mekim-save i makim bikpela de bilong Intanesenel Anti-Drak de we i bin pundaun long Sande.

REUTERS/China Newsphoto

### Kolim skin...

Ol dispela man Pakistani i painim ples bilong kolim skin bilong ol long wok ples bilong ol. Ol i save wok long wanpela ples bilong mekim blok ais. Bikpela hot san i bagarapim siti ples Multan long kantri Pakistan inap long wanpela mun olgeta. Samting olsem 375 manmeri i dai pinis long dispela bikpela hot san i wok long raun long India, Nepal, Pakistan na Bangladesh. Dispela bikpela hot



san nau i winim olgeta narapela taim bipo we san i bin hot nogut tru insait long ol dispela kantri na ol arapela hap bilong Esia. REUTERS/Asim Tanveer



### Tewel man ya...

WANPELA man Bahraini putim klos olsef em i kisim bikpela bagarap taim ol manmeri i mas long makim Intanesenel Day long Sapotim ol Turangu i kisim bagarap long Manama, Jun 24. Dispela de em Yunaitet Nesens (UN) yet i makim dispela de. Planti tausen manmeri i bin mas las wik Fraide.

REUTERS/Hamad i mohammed




### Bagarap bilong drai..

WANPELA Sikh fama bilong India i wokabaut namei long drai rais fam bilong em insait long Roper distrik long Punjab stet long not bilong India. Planti moa fama long hap i lusim rais bilong ol bihain long bikpela ren bilong Monsun i no kamap long ples bilong ol yet. REUTERS/Ajay Verma




# WOLNIUS



### Wara bagarapim ples...

BIKPELA tait wara i bagarapim Guangxi rijen bilong Sauten Saina. Traipela ren tru i bin pundaun na olgeta wara i solap. Graun i bruk na kilim moa long 124 pipel na 69 i lus yet. Insalt long wanpela taun Wusu, ol haus i sindaun long salt bilong Wara Wuzhou em wara i go insalt inap long rup bilong haus. Olgeta manmeri i ronawe i go antap long ol haus bilong ol. *REUTERS/Jason Lee*



### I no het ya...

WANPELA yangpela man Amerika i sapim gras bilong em bihainim kruse na wetim wanpela bikpela kruseit bilong wanpela biknem Pasto Billy Graham long Nu Yok. Dispela man Billy Graham i get 86 krismas na em i tokaut long Gospel i go long planti manmeri we namba bilong ol i abrusim moa long 210 millen pipel long moa long 185 kantri long wol. Ol lain husat i save bihainim ol stua lotu bilong em i tok dispela bikpela kruseit long Nu Yok em i las kruseit bilong em. *REUTERS/Shannon Stapleton*



### Paitman!

TUPELA paitman bilong Islamik Jihad i mas long wanpela bikpela bung long Nablus siti long Wes Bank. *REUTERS/Abed Omar qusini*



### Makim taim bipo...

MAN antap long hos i ron i go namel long ol bikpela grup manmeri ausalt long Siutadella Taun Hol long makim bikpela de bilong amamasim fis de bilong San Joan (o Santu Jon) long Jun 23. Ol dispela man i kalap long hos i makim ol man bilong taim bipo olsem ol bikman, ol pater, ol man bilong mekim kain kain santing na ol fama. *REUTERS/Dani Cardona*



### Kros bilong ol meri...

TUPELA meri Peru i autim bel kros bilong ol agensim ol meri insalt long sti Ciudad Juarez long Mexico long fran bilong Meksikan Embeal long Lima. Stat long 1989 i kam inap nau, santing olsem 400 meri na yangpela pikinini meri i bin indel, planti long ol i dai bihain long ol man na soldie i bagarapim ol. Moa long 70 meri i lus yet insalt long Ciudad Juarez na Chihuahua, Meksiko. Dispela tokaave long ol namba i kam long Amnesty Intanेशनel.

# Boi Minj i no sem long tilim kondom long pablik

## ...Minj em ples nogut bilong HIV/AIDS long Westen Hailans

James Kila i raitim

**W**ANPELA yangpela man bilong Minj, Douglas Konmil i no wari long hot san i kukim em taim em i wokabaut na givim aut ol kondom paket long ol manmeri long Minj taun.

Bagaros ya i no sem. Pes bilong em i drai na em i givim aut ol dispea paket kondom long laik bilong em tasol.

Tuhat tu i kapsait long poret bilong em na em i karim ol paket kondom long sait bilong em na sampela long raksek bek bilong em na i wokabaut namel long ol bikpela lain manmeri long Minj na givimaut ol plastik kondom long paket long ol manmeri long Minj gavman stesen long las wik Sarere.

Douglas i givim taim bilong em long helpim ol lain komiti bilong Minj HIV/AIDS aweanes long traim helpim long daunim na banisim dispela sik nogut we i kilim planti manmeri pinis insait long kantri tude.

"Plis ol brata susa, noken sem. Kisim tasol ol dispela kondom. Em bilong sefti bilong yupela," Douglas i mekim toktok taim em i raun na givim aut kondom long ol manmeri.

"Mi no givimaut kondom nating long yupela na yupela bai yusim nating nating na kuap nabaut.

"Mi givim kondom long helpim yupela long lukautim gut skin bilong yupela taim yupela i slip na kuap wantaim ol arapela lain em yupela i no save tumas long en," Douglas i tok.

Douglas i no bin sem stret long dispela taim. Taim em i laik givim kondom long sampela yangpela skul meri bilong Minj Hai Skul, ol yangpela meri ya i sem na lap wantaim na i laik ronawe. Tasol em i strong yet na givim skul toktok long ol.

Bihain long ol i harim toktok pinis ol yet i askim long kisim wan wan paket kondom long karim i go long ples.

Dispela wokabaut bilong Douglas i karim kaikai stret bikos long apinun taim sere- moni i pinis yu ken lukim planti ol lain manmeri bilong ples i wokabaut wantaim kondom long poket bilong ol long karim i go long ples.

Las wik Sarere moa long 2000 manmeri i bin bung long Minj gavman stesen long Westen Hailans long lukim Minista bilong Agrikalsa, Mathew Siune wantaim Het bilong Delegates bilong Taiwan, Jenerel Michael Cheng lon- sim nupela Hailans rais multiplikesen na distribusen senta. Dispela projek em

*"Plis ol brata susa, noken sem. Kisim tasol ol dispela kondom. Em bilong sefti bilong yupela."*

lokol memba bilong Anglimp Saut Waghi, Jamie Maxtone Graham wantaim helpim bilong gavman bilong kantri Taiwan i kamapim wanpela gutpela sapot i kam long min- ista bilong agrikalsa.

Long dispela bung long Minj bipo long ol bikman i mekim toktok ol lain bilong Minj HIV/AIDS komiti tu i stap long karimaut awenes bilong ol namel long ol manmeri husat i bung long dispela taim na em tu i karim ol paket kondom na givim aut long ol manmeri long Minj.

Sista Kerry i tokim *Wantok Niuspepa* olsem dispela wok bilong awenes ol i karimaut



• Yangpela man Douglas Konmil i givim aut kondom long ol yangpela manmeri long Minj.

long Minj distrik em i bikpela wok tru bikos Minj em wan- pela ples insait long Westen Hailans provins we namba bilong ol lain husat i gat dispela sik HIV/AIDS i antap tru.

Olsem na wok bilong ol nau em long givim skul na toksave long ol manmeri long ol ples na hauslain komyniti long ol rot ol i mas bihainim long abrusim dispela sik nogut.

Las wik tu i lukim tupela sumatin lida bilong Yunivesiti bilong Papua Niugini em presiden bilong Jiwaka Sumatin Asosiesen long UPNG, John Ka'a wantaim vais presiden Samuel Mokaan i go long Minj long helpim Sista Kerry long karimaut dispela kempein namel long ol manmeri.

Dispela tupela sumatin lida bilong PNG i go long helpim long dispela wok awenes long namba wan semesta malolo bilong tupela.

Mista Mokaan long toktok bilong em las wik Sarere i go long ol pipel long Minj em olsem ol i mas stap gut na lukautim bodi bilong ol na bai ol i ken amamas long planti samting ol i laikim long en long dispela graun.

Taim ol manmeri i hambak na dring bia na smuk mari- wana na het paul na slip wantaim kain kain manmeri, ol inap kisim dispela sik nogut HIV/AIDS.

Mista Mokaan i tokaut tu olsem insait long wanpela wok painimaut long Minj eria, wanpela rurel ples we ol i kisim 40 blut sempol long en ol i painimau olsem 7-pela bilong ol dispela blut sempol i karim binatang bilong HIV/AIDS. Dispela namba em i no gutpela tru long dispela ples komyniti.

Sista Kerry i tokaut olsem wok bilong karimaut awenes



• Wanpela tieta grup i soim pilai bilong pasin nogut we i save kamapim HIV/AIDS.

namel long ol pipel em wok bilong olgeta manmeri.

Em i tok kantri bilong yumi i gat pinis dispea bikpela sik nogut HIV/AIDS olsem na yumi olgeta i mas wok bung wantaim na tokaut moa long ol yangpela bilong yumi long stap gut na bihainim gutpela Kristen laip na noken slip wantaim ol arapela lain husat yumi no save gut long ol.

"Mipela i givim aut kondom long soim olsem mipela i laik helpim na givim dispela tok- save na poret i go long ol manmeri long ples na haus- lain olsem dispela sik HIV/AIDS i ken bagarapim laip na tu developmen bilong komyniti taim ol lain i dai," Sista Kerry i tok.

Dispela HIV/AIDS awenes kempen long minj em lokol MP Mista Graham i helpim wantaim ol samting bilong soim piksa olsem multi-midia projekta na tu sampela ara- pela masin.

Tru tumas, long dispela de, dispela yangpela man Douglas Konmil i bin mekim gutpela toktok tru long kari- maut awenes namel long

planti manmeri husat i bung long Minj.

"Mipela i nidim tru ikonmik developmen long kamap tasol i mas i gat helti populesen o manmeri i stap long mekim wok. Dispela awenes bilong HIV/AIDS i laik skulim ol manmeri long abrusim pasin pamuk na ol i ken stap helti na wok hat na ikonmik developmen bai kamap."

Wanpela tieta grup long dispela taim tu i bin putim kamap wanpela kain ekt we i soim ol pasin nogut em ol yangpela i save bihainim long dring spak na paul wan- taim ol pamuk meri nabaut na kisim dispela sik nogut em HIV/AIDS.

Bikpela toktok ol lain komi- ti bilong HIV/AIDS awenes i tokaut em olsem ol manmeri i mas tingim Kristen pasin na lukautim skin bilong ol yet na tu ol maritman na meri i noken paul nabaut bikos dispela sik i ken painim ol na bihain em bai bagarapim sin- daun bilong famili bilong ol.



• Sista Kerry long namel na tupela UPNG sumatin em Jiwaka sumatin asosiesen presiden John Ka'a long lephan na vais presiden Samuel Mokaan. Ol Foto: James Kila.

Maski san i hot tru, Douglas Konmil i raun na givimaut ol kondom long ol manmeri long Minj... James Kila i ripot long yangpela man i pait egensim AIDS...





Australian Government AusAID



# PNG-ADB Maikrofainens na Wok Projek

## Pasifik Rijinel Konfrens long Maikro Sevings 28 - 29 Jun 2005 HOLIDAY INN, POT MOSBI - PAPUA NIUGINI

### HET TOK: SEVIM MANI TETE BILONG GUTPELA SINDAUN TUMORA

CGAP em i wanpela bikpela grup i karamapim 28 pablik na praivet developmen ejensi husat i wok bung long opim rot i go long ol mani sevis bilong ol lain turangu, we ol i save kolim maikrofainens. Ol dispela as tingting i bin kamap na kisim luksave bilong CGAP na 28 memba dona bilong en, na i kisim tu luksave bilong Grup bilong 8-pela lida long G8 Samit long namba 10 de bilong mun Jun 2004.

- 1. Ol lain turangu i mas i gat ol kain kain mani sevis, i no dinau tasol.** Olsem ol arapela manmeri, ol lain turangu i mas i gat ol mani sevis we i isi long kisim na yusim, i nogat bikpela hatwok, na kos bilong em i no antap tumas. Bihainim laik bilong ol, ol i no laikim dinau tasol. Ol i laikim ol arapela sevis olsem sevings, insurens o mani bilong lukautim ol yet na sevis bilong salim mani.
- 2. Maikrofainens em i wanpela bikpela rot bilong nogat egensim poveti o hevi bilong nogat gutpela sindaun.** Taim ol turangu manmeri i gat rot long ol mani sevis, ol bai i ken mekim moa mani, bungim ol samting bilong ol na banisim ol yet egensim ol arapela bikpela mani hevi. Ol turangu famili i save yusim maikrofainens long lusim pasin long painim kaikai long wan wan de i go long makim gut rot bilong bihain taim: ol i save putim mani long ol gutpela kaikai, haus, helt sevis na edukesen o skul.
- 3. Maikrofainens em wok bilong sanapim ol mani sistem we i ken helpim ol lain turangu.** Insait long planti developmen kantri, namba bilong ol turangu lain em i bikpela tru, tasol ol i save painim hat tru long kisim sevis long ol beng. Planti taim ol manmeri i save lukim maikrofainens olsem wanpela kain wok 'developmen' bilong ol dona, gavman, o komyuniti bisnismanmeri tasol na i no stap insait long bikpela wok mani. Tasol maikrofainens bai inap long helpim bikpela namba long ol lain turangu sapos em i go insait long bikpela wok mani sistem.
- 4. Maikrofainens i ken lukautim em yet, na i mas mekim olsem sapos em i laik go aut long ol bikpela namba manmeri.** Planti lain turangu i no inap kisim gutpela mani sevis we i makim hevi bilong ol long wanem i nogat inap strongpela institusen we i ken givim dispela kain sevis long ol. Ol strongpela institusen i mas sasim inap mani long karamapim ol kos bilong ol. Kos rikavri o wok bilong kisim bek mani ol i yusim em i no pinis bilong en. Tasol em i wanpela rot long painim ol bikpela level we ol dona i ken givim mani long en. Wanpela

- 5. Maikrofainens em bilong sanapim ol strongpela lokol mani bisnis.** Mani bilong ol lain turangu i mas i gat ol strongpela mani bisnis insait long kantri husat inap sanap strong na givim mani sevis. Ol dispela institusen o bisnis i mas pulim ol sevings insait long kantri na tanim ol dispela sevings i go kamap ol dinau, na givim ol arapela sevis tu. Taim ol lokol bisnis na ol kapitil maket i go bikpela, bai i nogat moa bikpela halivim i kam long ol dona na gavman, na ol gavman developmen beng.
- 6. Maikrokredit bai i no inap long stretim olgeta hevi.** Maikrokredit i no namba wan samting bilong helpim olgeta manmeri long olgeta hevi. Ol lain turangu manmeri husat i nogat inap kaikai na i nogat mani bilong bekim dinau i mas i gat ol arapela sapat pastaim long ol i ken yusim gut ol dinau ol i kisim. Planti taim ol arapela rot i ken rausim hevi bilong nogat gutpela sindaun - olsem ol smol grens, ol wok na trening program, o strongim infrastraksa. Olgeta dispela sevis i mas ron wantaim wok bilong bungim sevings.
- 7. Mak bilong ol intres ret i save bagarapim ol lain turangu taim ol i save painim hat long kisim dinau.** Kos bilong mekim planti liklik dinau em i antap tru na i winim manimak bilong wan wan bikpela dinau. Sapos ol makrolenda i ken sasim ol intres ret we i antap moa long ol dinau ret bilong ol beng, ol bai no inap long kisim bek mani bilong ol. Groa bilong ol bai i stap long mak bilong ol saplai bilong mani i kam long ol dona o gavman. Taim gavman i skelim ol intres ret, ol i save makim ol i go daun olgeta bai ol maikrokredit i no inap long kisim bek mani bilong ol, olsem na ol dispela kain regulesen i no gutpela. Long wankain taim, wanpela makrolenda i noken yusim ol bikpela intres ret long kisim bek mani long ol manmeri i dinau long karamapim bikpela mani em yet i tromoi long asua bilong em yet.
- 8. Wok bilong gavman em long kamapim ol mani sevis, i no long givim ol stret i go long ol manmeri.** Ol nesenel gavman i mas makim ol polisi we i ken kirapim mani sevis bilong ol turangu pipel na long wan kain taim ol i mas banisim ol diposit tu. Ol gavman i

- 9. Mani i kam long ol dona i mas wankain mak olsem ol praivet kapitil.** Em i noken resis wantaim em. Ol dona i save givim ol grent, ol dinau, na ekwiti bilong maikrofainens. Dispela kain sapat i mas stap long sotpela taim tasol. Ol i mas yusim long strongim ol lain i save givim maikrofainens; long developim infrastraksa olsem ol reting ejensi, ol kredit buro, na strong bilong ol long odit; na long sapatim eksperimenesen. Sampela taim, givim sevis long ol lain manmeri i stap long ples bus i mas i gat halivim i kam long ol dona inap long taim bihain. Ol dona i mas traim long bungim maikrofainens wantaim olgeta arapela hap bilong mani sistem Ol i mas yusim ol saveman husat i gat gutpela rekot taim ol i kamapim na karimaut ol projek. Ol i mas makim klia rot we i mas stret pastaim long mani i go het. Olgeta projek i mas i gat plen bilong kamap long wanpela hap we ol i no moa nidim sapat bilong ol dona.
- 10. Bikpela banis em i nogat inap strongpela institusen na menesa.** Maikrofainens em i wanpela spesol wok we i bungim wok benking na komyuniti wok kamap. Ol save na sistem i mas stap long olgeta level: ol menesa na infomesen sistem bilong ol maikrofainens institusen, sentrel beng husat i save lukautim maikrofainens, ol arapela gavman ejensi, na ol dona. Pablik na praivet invesmen o wok bisnis insait long maikrofainens i mas lukluk long strongim dispela wok, na i no long muvim mani i go kam tasol.
- 11. Maikrofainens i save wok gut taim em i makim na tok klia long wok bilong em.** Strepela, klia toksave long wok bilong em i bikpela samting long sait bilong givim mani toksave (olsem ol intres ret, dinau bekim, na kisim bek mani) na komyuniti toksave (olsem namba bilong ol kastoma bilong ol na hevi bilong ol). Ol dona, investa, beng supavaisa na kastoma i mas i gat ol dispela toksave long skelim tingting long kos, hevi ol bai karim na mani ol inap mekim.

## Ngaiire - Nupela musik sta bilong PNG

Andrew Molen i raitim

POT Mosbi na Lae bai pairap long dispela wiken taim wanpela pikinini bilong PNG yet bai i kam bek long promotim namba wan musik CD bilong em.

Meri nogut bilong singsing, Ngaiire Joseph husat i save stap long Australia bai i kam pilai long klab 69 long Lae tumora (Fraide) nait na long Lamana Gold Club long Pot Mosbi long Sarere.

Long dispela taim tu bai em i lonsim namba wan singsing bilong em long nambawan CD bilong em ol i kolim "Lav sa giaman."

SP Brewery husat ol i sponsaim Ngaiire long kam long PNG anit long nupela prodak bilong ol Niugini Gold Ice Beer i tok ol i amamas long em i kam.

"Ngaiire bai helpim tu long promosen bilong nupela prodak bilong mipela," maketing menesa bilong SP, Albert Veratau i tok.

Tupela fainolis bilong Ice Discovered, Lucille na Samson na Sound Cats bilong Lae bai i pilai raun wantaim Ngaiire

PNG i bin luksave long Ngaiire taim em i kamap long musik talen so bilong Australia, Australian Idol we em i kamap namba 13 namel long 50 000 narapela manmeri husat ol tu i laik soim strong bilong ol long singsing.

Ngaiire klostu bai i tanim 21 krismas tasol Menesa bilong em Mal Stekhoven-Smith i tokaut olsem planti ol bikpela rekot kampani long Australia na Amerika i salim tok long em pinis long rekot wantaim ol.

Planti manmeri long PNG na Australia bihain long ol i lukim em i singsing i ting em bai inap win tasol Ngaiire i kam namba 13 na i no bin i stap insait long top 12 ol jas i makim.


Mista Stekhoven-Smith i tok Ngaiire i amamas long kam bek long PNG na singsing long ai bilong ol pipel bilong em yet na em bai gutpela long lukim planti manmeri tu i kamap long sapatim em.

"Ngaiire i no bin kambek long PNG inap foa o faipela yia nau na em i kalap kalap long kam na pilai long hia," menesa bilong em i tok.

Go tasol long ol hap we Ngaiire bai pilai na harim nupela stail musik bilong em.



• Ngaiire meri PNG bai kam pairap long musik bilong em long Lae na Mosbi.



• Ol sponsa bilong em i holim posta bilong em.



### Stori bilong husat manmeri i laik sindaun long dispela bung

#### STORI:

Nem bilong Papa (olsem i stap long paspot bilong yu): \_\_\_\_\_

Nem bilong yu (olsem i stap long paspot bilong yu): \_\_\_\_\_

Posisen bilong yu: \_\_\_\_\_ Kampani o opis yu wok long en: \_\_\_\_\_

Pos Opis Bokis: \_\_\_\_\_ Telepon Namba: \_\_\_\_\_

Feks Namba: \_\_\_\_\_ Email: \_\_\_\_\_

Stori bilong Paspot (i no bilong ol PNG manmeri): \_\_\_\_\_

Kantri mama karim yu: \_\_\_\_\_ Paspot namba: \_\_\_\_\_ Ples yu kisim: \_\_\_\_\_

De yu kisim Paspot: \_\_\_\_\_ Paspot i orait inap wanem taim: \_\_\_\_\_

Plis kisim moa toksave long PNG Embesi (o Konsulet) long kisim moa toksave long ol PNG visa rikwaimen. Ol patipen i mas raun i kam long ol arapela kantri long kam long PNG i mas sekim wantaim ol dispela arapela kantri long trensit bilong ol. Yu mas kisim olgeta tok klia long sait bilong ol visa o trensit visa pemit kwiktaim.

Plis salim dispela infomesen pepa long email o feks i go long: [adbmicrofinance@daltron.com.pg](mailto:adbmicrofinance@daltron.com.pg), fax: 675-3213426 pastaim long namba 15 de bilong mun Jun 2005.

# Glasing Musik i go insait long The National

**M**ENESMEN na ol wok manmeri bilong *The National* niuspepa i givim bikpela sapot tru long mipela hia long *Wantok* niuspepa long askim mi long raitim Glasing Musik long skelim tingting long musik ol arapela kain ats na sindaun bilong ol musik manmeri na pablik. Ol i bilip olsem dispela bikpela kain skelim tingting bilong ol kalsa bilong mipela long sait bilong musik na at em ol bikpela samting tru.

Ol lain rita bilong *The National* na *Wantok* Niuspepa yet bai i ken ritim yet stori bilong ol kalsa na kastom bilong yumi i stap insait long dispela pes bilong niuspepa, na tok tenkyu i mas i go long ol wanwok bilong mipela long *The National* niuspepa.

Tupela niuspepa wantaim i luk-save long strong bilong ol tumbuna pasin bilong yumi. Dispela save i save strongim yumi yet long banisim gut kalsa na pasin tumbuna long ol kain nupela pasin bilong ol arapela kantri. Na mipela i gat bilip olsem mipela i ken mekim dispela sapos mipela i skulim gut ol pipel bilong yumi long ol dispela samting. Ol bai harim tok sapos mipela i stori gut long ol long midia.

Em i bikpela bilip bilong mipela olsem dispela wok i mas go het yet na ol dispela stori i mas i go aut. Ol stori long ol kalsa bilong mipela, ol pasin tumbuna, musik bilong mipela na ol at bilong mipela. Wankain olsem dispela tupela niuspepa, PNG musik na Ats bai stap yet.

Dispela nupela wok bung long serim gutpela infomesen bilong ol pipel bilong mipela i sut long ol bikpela plen bilong tupela niuspepa long wok bung na salim ol niuspepa bilong mipela i go aut long olgeta liklik ples. Dispela bai strongim mipela olsem wanpela bikpela rot bilong skulim na tok-save long ol komyniti bilong ol pipel bilong yumi long wok bilong gavman, toksave long sait bilong helt, edukesen, agrikalsa, na ol arapela hap nius.

Mipela i lukim dispela nupela wok bung em i wanpela bikpela samting tru long sait bilong Midia Industri bilong PNG na dispela bai kamapim nupela wok bung we i no save kamap bipo. Em bai strongim mipela long go insait long olgeta hap we ol manmeri i no save kisim niuspepa.

Na toksave i mas i go long ol gutpela rita bilong *Wantok* Niuspepa, olsem dispela em ol samting yu bai lukim i kamap long dispela pes long sait bilong musik na ats long olgeta wik i kam.

Neks wik mi bai stori moa long dispela musik albam 'Sorpending' bilong Twin Hox bilong Kavieng olsem namba wan albam bilong mun Jun. Bikpela stori tru long dispela albam em long namba 10 de bilong mun Januari long dispela yia, olgeta memba bilong dispela ben wantaim tupela bikman long dispela grup, Tony na Paul Wol bilong Lihir Ailan i bin lus na dai long solwara.

Na maski albam i kamaut pinis



long Lihir Ailan, taim tupela i bin lus, nogat wanpela singsing bilong ol i bin pairap long redio. Ol redio tu i no bin save olsem dispela albam i stap.

Tony na Paul wantaim em tupela i kisim bikpela skul na tupela i bin save painim taim bilong mekim musik bilong ol olsem Twin Hox ben.



• Ngaiire bai lonsim namba wan musik singel bilong em 'Lav Sa Giaman' long dispela wiken i kam.

Namba wan musik albam bilong tupela em i las musik albam ol i rekodim tu. Nem bilong albam em Sorpendeng, na em i kisim luksave olsem namba wan musik albam insait long kantri tete long wanem namba wan singel bilong en, Maten Kandiek i brukim rekot na sut i go stret long namba 1.

Bodi bilong Tony, Paul na ol arapela memba bilong ben Twin Hox em ol i no painim.

Long sait bilong Ats, mipela bai glasing wokabaut raun bilong tupela meri bilong Amerika - Michele na Karen. Tupela wantaim em ol antropolojis o lain husat i save glasing laip bilong ol pipel taim ol wokabaut bihainim lekmak bilong wanpela arapela meri Amerika, Caroline Mytinger husat i bin raun long Solomon Ailans na PNG na penim planti pes na laipstail bilong ol pipel.

Michele Westmorland na Karen Huntt i bin laikim tru ol penting

bilong Caroline na ol i bin kisim planti skul tok long buk bilong em New Guinea Headhunt, we Caroline i bin putim ol penting insait long en long wanem em i laik kisim ol kalsa bilong PNG na Solomon Ailans pastaim long ol pasin bilong ol arapela kantri i kam na sentisim ol.

Ol penting na atwok bilong Caroline na piksa bilong kangal bilong Papua em i kolim 'The Heera' na ol arapela piksa em i droim, ol pas na arapela samting em i bin kisim long raun bilong em i stap yet long Monterey Museum ov At long Amerika.

Raun bilong Michele na Karen em long painim ol lain tumbuna bilong ol dispela lain i stap insait long ol piksa insait long Solomon Ailans, ol ailan long Milen Be na Sentrel Provins na i go long Mosbi.

Dispela stori na stori bilong raun bilong dispela tupela meri bai i kamap insait long *Wantok* Niuspepa na *The National* niuspepa tasol.

Mipela bai glasing nupela wok bung namel long Pawahaus Rekods bilong Lae na nupela musik sta bilong PNG Ngaiire Joseph, yangpela meri PNG husat i mekim nem long musik resis bilong Australia - Australian Idol 2004.

Ngaiire bai lonsim namba wan musik singel bilong em 'Lav Sa Giaman' long dispela wiken i kam. Tumora nait, bai em i pilai long Klab 69 long Lae na long Sarere nait, em bai pilai long Lamana Gold Klab long Mosbi.

Bai mipela i lukluk yet long sindaun bilong ol musik atis biang yumi long sait bilong ol Kopirait Lo na ol banis i stap long strongim ol.

Long dispela sait, long ol wik i kam, bai mi lukluk long husat tru insait long musik industri bai i mas strongim ol dispela Kopirait lo we nau yet i nogat strong bilong en.

Bai mi toktok moa long PNG musik industri, wanem samting em i musik pablisng na wok bilong ol musik rekoding atis.

Mipela bai skelim tingting long husat tru i mas go pas long painim ol nupela musik sta, husat i mas promotim ol nupela musik rilis na ol musik atis, na rot bilong yusim ol dispela musik atis long strongim PNG musik.

Na yes, *National* na *Wantok* Niuspepa yet bai givim yu ol stori bilong developmen na wok bilong ol musik atis, komposa, rekoding atis wantaim ol stori bilong ats na kalsa bilong PNG.

Bai i gat planti nupela samting bai kamap. Na sapos yu laik strongim kalsa na musik bilong PNG stret, ritim *Wantok* na *National*.

**Yu ken ridim olgeta stori blong PNG Musik and ol narapela Atis insait tasol long *The National*.**



• Julius Maob wantaim ol lain bilong em, Zero Balance i pairaim Minj Poto: James Kila

## Julius Maob na Zero Balance pairapim Minj

James Kila i raitim

**PLANTI** manmeri i bin guria stret long harim na lukim dispela man Raikos long Madang provins, Julius Maob i givim samsam wantaim ben bilong em Zero Balance long Minj long Westen Hailans.

Ol i save lukim em na harim musik bilong em tasol long EMTV long CHM Super Sound Vidio Hits program olgeta Fonde nait, tasol taim ol i lukim em stret planti i guria na askim, olsem wanem na dispela bagaros bilong Madang i krungutim ples bilong ol olsem Minj na pairapim musik bilong em.

Julius wantaim ol lain Zero Balance i bin kisim askim long go amamas wantaim ol manmeri bilong Minj las wik i go pinis long taim bilong lonsing bilong Hailans rais multiplikesen na distribusen senta long Westen Hailans.

Julius Maob em wanpela strongpela musikman husat i save go pas long ol lain Side Doors ben bilong Raikos long Madang. Ol dispela lain i save katim ol kaset bilong ol wantaim CHM Supasaun Studios long Mosbi. Ol kaset bilong ol tu i save gat ol gutpela pawa lokol musik we i save kirapim bel bilong planti lain taim ol i harim.

Maob i bin katim wanpela solo albam bilong em tu wantaim CHM we nem bilong dispela kaset em 'Zero Balance'.

Dispela singsing em planti lain i save amamas long harim long wanem em i gat planti pani toktok long en na tu em i stori long trupela laip stori long dispela pasin bilong baim meri em planti papamama i save strong tumas long en.

Dispela kaset bilong em i gat planti ol gutpela singsing tu i stap we i save kirapim bel bilong planti manmeri.

Las yia Maob i bin kisim wan-

pela awot long Yumi FM redio program Wikli 100 Hits we ol i makim em olsem 'Popula Lokol Atis bilong 2004'.

Planti kain kain pilai i bin kamap long dispela taim, tasol taim zero Balance i go antap long stes bilong ol antap long wanpela daina trak long pilai ol i pulim stret planti manmeri long go kostu long ol.

Taim Maob i pilaim namba bilong em 'Sekol Sekol Das' man, ol yangpela long hap i skin kirap stret long danis. Tasol laki tru olsem dispela ples Minj long Westen Hailans em ol i tambu long bia olsem na ol yangpela i sanap tasol na skelim strong musik i pairap.

Maob i hamarim tu sampela ol bikpela namba bilong em olsem 'Malio Wel Wel' na 'Kendel Siti'.

Long dispela taim Maob wantaim ol lain biang em i pulim bikpela laik tru namel long ol planti yangpela man husat i bin go, sanap na lukim ol i pilai.

Maob i bin givim skul toktok tu long ol lain long Minj olsem musik em wanpela gutpela samting tru long helpim ol yangpela husat Papa God i givim ol save long go het na pilai. Dispela em bikos taim ol i givim moa taim bilong ol long pilai musik ol bai i no inap go insait long ol hevi bilong lo na oda.

Dispela konsent long Minj tu i go wantaim wanpela wok awenes bilong anglimp Saut Waghi distrik HIV/AIDS komiti, na dispela i givim sans long ol yangpela long bung na harim gut toktok bilong ol rot long abrusim dispela sik nogut.

Tru tumas ol yangpela long Minj i bin paia lait stret long san long harim ol lain bilong Zero Balance i givim sam sam long stes.





**Laikim Penpren**

**Nem: Nelson Gatnada**  
 Krismas: 18 (man)  
 Adres: Healla Division 2, PO Box 451, Kimbe, West New Britain Province  
 Save laikim: Pilai tas ragbi, basketbol na ritim Baibel.

**Nem: Kikaren Joel**  
 Krismas: 18 (man)  
 Adres: Healla Division 2, PO Box 451, Kimbe, West New Britain Province  
 Save laikim: Piali soka, volibol, go lotu na ritim Baibel.

**Nem: Richard Mana**  
 Krismas: 18 (man)  
 Adres: Bema High School, PMB Lae, Morobe Province  
 Save laikim: Singsing lotu, lukim TV, pilai spot, raun long bus na tok pilai.

**Nem: Jimmy Ruben**  
 Krismas: 22 (man)  
 Adres: Mainland Holdings Crocodile Farm, PO Box 196, Lae, Morobe Province  
 Save laikim: Pilai soka, lukim TV, mekim pren bilong narapela provins, raitim na bekim pas.

**Nem: Regina Roana**  
 Krismas: 16 (meri)  
 Adres: St Mary Catholic Primary School, PO Box 4149, Lae, Morobe Province  
 Save laikim: Tok pilai na harim musik.

**Nem: Ginar Sogur**  
 Krismas: 19 (man)  
 Adres: C/- Kubaka Family, PO Box 643, Madang  
 Save laikim: Pilai basketbol, volibol, soka na go lotu wantaim ol pren.

**Nem: Tussie Wag**  
 Krismas: 19 (meri)  
 Adres: St. Michael's High School Brahman, PMB, Madang  
 Save laikim: Go lotu, pilai spot na stadi.

**Nem: John S. Cyprian**  
 Krismas: 23 (man)  
 Adres: PNG Defence Force, P O Box 262, Lae, Morobe Province  
 Save laikim: Ridim Baibel, go lotu, raitim pas long prens, wokabaut long bus, ridim buk na niuspepa, mekim gaden, lukim TV, pilai spot na self defens.

**Nem: Defnie Miariyo**  
 Krismas: 16 (meri)  
 Adres: Yangoru High School, PMB Wewak, East Sepik Province  
 Save laikim: Go waswas, lukim TV, ridim buk, wokim fani na go long lotu.

**Nem: Joel Joe**  
 Krismas: 19 (man)  
 Adres: C/- Mt Zion Church, PO Box 3512, Boroko, NCD  
 Save laikim: Lotu, harim kainkain gospel, pilai spot, kaikai buai, penpren na lukim ples.

**Nem: Amos Gopi**  
 Krismas: 19 (man)  
 Adres: Tafeto Community School, PO Box 632, Goroka, Eastern Highlands Province  
 Save laikim: Wokim bisnis.



**STORI TUMBUNA**

**B**IPO bipo tru long taim bilong ol tumbuna tupela manmeri i stap insait long bikbus we ol man i no save go raun long en.

Tupela wail manmeri ya i no save long ol kaikai bilong ples na kaikai bilong stua. Na tupela i no save yusim paia long kukim kaikai bilong tupela. Kaikai bilong tupela em ol prut na ol bus kumu tasol.

Klos bilong tupela em narapela kain spesel klos na em i no inap long bruk. Na tupela i nogat pikinini tu. Dispela long wanem tupela i no bin kisim skin long pasin bilong marit.

Wanpela taim meri i go pikim ol prut bilong tupela tasol popaia na em i kisim wanpela prut we i gat pait nogut. Tupela kaikai na tupela i long long nabaut na raunim ol animol.

Olgeta animol i ronawe nabaut na tupela i kilim wanpela bilong ol dispela animol.

Dispela enime! em king bilong ol arapela enime! long bus.

Blut bilong dispela animol i ron olsem wanpela long wara na i go daun long olgeta ples. Ol man na meri i dring dispela blut na pilim swit long en.

Wanpela man em bihainim dispela wara i kam lukim bodi bilong dispela enime! i dai na tu em i lukim tupela manmeri i spak na long long i stap.

Em i kisim hap skin bilong dispela animol na mekim sampela posin na tupela kamap orait. Em nau em i kisim



tupela i kamaut long bus na go long ples.

Em i lainim tupela long olgeta pasin bilong ples olsem wokim haus, gaden, kamapim pikinini na ol arapela pasin tu.

Tasol dispela ples nau tupela i stap

long en em i gat planti hatwok tasol bus ples em i nogat hat wok. Na tupela i tingim i go bek na stori tu long ol arapela.

**AVEX BEGA  
 GOROKA  
 ISTEN HAILENS PROVINS**

**Man i givim bel long narapela meri**


**Dia Laiplain**  
*Mi na man bilong mi i bin amamas long marit bilong mitupela. Mitupela i bin amamas tru taim mi karim pikinini bilong mitupela long yia i go pinis. Sikspela mun i go pinis, man bilong mi i lusim wok bilong em na nau mi lukim olsem em i wok long senis. Em i no save stap long haus long san taim. Em i save kam bek long haus long bik nait na long bik moning stret bilong narapela de.*

*Mi painim olsem em i givim bel long narapela meri. Em i tok olsem em i no laik maritim dispela meri na em i no laik long lusim mi o bai mitupela i brukim marit.*

*Mi pret nogut em i lusim mipela na i go long narapela meri. Bal mi mekim wanem?*

**REJECTED**

**Dia Pren**  
 Mipela i sori long wanem



samting i wok long kamap long yu nau.

Planti taim ol man i save lusim wok, ol i save sem olsem ol i no inap long sapotim famili bilong ol. Nogut man bilong yu i wok long pilim olsem na nogut dispela em i wanpela as we i mekim na em i no save stap long haus tumas.

Tasol mipela i no save tu olsem dispela toktok bai daunim wari bilong yu we man bilong yu i wok long lukim narapela meri husat i gat bel long em nau. Dispela bikpela wari i stap wantaim yu nau tasol yu no laik lusim man bilong yu na yu laikim helpim bilong mipela long helpim marit bilong yutupela.

Long yutupela long mekim nupela na gutpela stat gen long marit bilong yutupela, i gat planti samting i stap we yutupela man bilong yu i mas stretim pastaim.

Man bilong yu i tok em i no laik lusim yu o maritim dispela narapela meri. Tasol yu no tokim mipela olsem em i lukim dispela narapela meri yet. Yu yet i gat dispela tingting olsem man bilong yu i wok long lukim dispela meri yet?

Sapos man bilong yu i no moa lukim dispela meri, i gat askim yet i stap long risponsibiliti o wok bilong em long pikinini dispela meri bai karim. Man bilong yu i toktok pinis wantaim yu long dispela samting? Yutupela toktok pinis long rot we dispela bai gat wanem kain kibbek long man bilong yu na pikinini bilong yutupela tu?

Em i no isipela samting long ol marit i nogat bilip o luksave na ol i sem i stap. I mas gat luksave na pasin bilong no

haitim samting na wok bung wantaim insait long marit. Long yutupela i gat dispela kain samting long marit bilong yutupela, yutupela i mas pogivim o lusim tingting long ol rong bilong wanpela arapela pastaim.

Inap long yu na man bilong yu i toktok wantaim wanpela man o meri husat i gat gutpela tingting, luksave na em i save long yu?

**MI LAIPLAIN**

Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 3260011. Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.

**Laiplain**

# Lukim PNG nau pulim planti ai

Neville Choi i raitim

LUKIM PNG Nau Ekspo, wampela so we olgeta lain manmeri na bisnis husat i mekim wok turisim insait long kantri i bin pulim ai bilong planti bisnis, turis, man, meri na pikinini.

Dispela namba tu Lukim PNG Nau Ekspo i bin kamap long Hidaway Hotel long Pot Mosbi long wiken i go pinis.

Olgeta manmeri husat i wok turisim i bin soim wok ol i save mekim.

Stat long ol lain mama husat i save samapim bilum, i go olgeta long ol husat i save penim skin bilong ol lain manmeri bilong Sentrel provins long taim bilong bikpela Hiri Moale So i bin stap.


Ol lain i save wok turisim long ol kain kain hap bilong kantri stat long Nusa Ailan Beach Risot long Nu Ailan i go antap tru long Haus Poroman lods long Hailans i stap.

Na em i bin wampela gut-pela so tru we planti skul


sumatin na yangpela manmeri i bin go raun long tripela de we so i bin kamap.

Dispela ekspo i soim tru tru kala bilong ol naispela samting i stap insait long PNG. Planti manmeri husat i bin go raun long so i tok ol i no save olsem i gat planti long ol dispela kain samting i stap insait long kantri bilong yumi.

Wantok Niuspepa i bin raun i go long lukim dispela so na kisim ol dispela poto.



SAVE LAIKIM RAIS: Meri nogut bilong hailens i soim wampela wok bilong em we em i mekim wantaim kala bilong PNG na Trukai rais.



MAKMAK: Wampela sumatin bilong Sacred Heart praimer skul i lukluk long wampela meri i penim tumbuna makmak long han bilong em.



PNG KALA: Wampela meri bilong amamas hostel i soim ol bilong PNG.



LUKIM GUT: Intres bilong dispela man i kisim em i go klostu long lukim gut ol infomesen o toktok save long wampela pepa bilong ol lain long Kokoda Spirit.



HARIM LONG REDIO: Shinique bilong NauFM na Turana Kemi bilong YumiFM i stap tu long expo na i wok long stori long ol manmeri long redio long wanem samting i wok long kamap.



LUKSAVE: Sampela ol meri i lukluk long ol samting bilong Tourism Melanesia.



LUKAUT: Meri bilong Nusa ailan "Beach Resort" i tok-tok wantaim wampela man i stap na i no save olsem Malagan Mask i lukluk na i putim yau long ol i stap.



KISIM SAVE: Ol sumatin bilong Pot Mosbi Intaneseno! skul i lainim sampela samting long stua bilong Post PNG. - OL POTO: ANDREW MOLEN.






Bisnis bilong Groim Diwai insait long PNG - Planim diwai long ol renfores eria

Rot bilong groim ol spisis diwai i save groa insait long PNG

### Areca catechu (buai)



Areca catechu L.

Nem bilong en: buai o long tok inglis ol i kolim bitel nat (betel nut)

Ples diwai i kam long en: Dispela i no klia. Tasol em i mas kam long Not Isten Indonesia. Long Saut Is Esia, em i save groa long Myanmar, Thailand, Vietnam, Malaysia, Indonesia na Filipins.

Wanem kain diwai: Namel bilong em i bun na i longpela i go inap long 30 mita samting na bikpela bilong namel bilong em i namel long 25 na 40 sentimita.

Em i save sanap stret na bikpela bun bilong em i save grin taim em i yangpela na bihain em i save tanim i go braun wantaim ol ring we bipo lip i goa long en.

Em i save karim namel long 8 na 12 lip we longpela bilong ol inap long 1.5

mita. Em i save karim wanpela han bilong plaua aninit long het bilong diwai:

Ol man plaua i planti na meri plaua i save gat tripela tasol. Longpela bilong prut bilong em i namel long 5 na 10 sentimita na bikpela bilong em 3.5 sentimita. Em i save grin, na taim em i mau em i save tanim i go orens. Em i save karim namel long 50 na 400 prut long wanpela han.

Ples we em i save groa: Em i save groa long mak bilong solwara i go inap 900 mita samting long ples nambis we i gat bikpela ren i save pundaun long olgeta taim bilong yia.

Yu ken yusim: Ol i save kaikai mit bilong prut bilong en em yet na sampela taim wantaim lip bilong daka na kambang.

**McCARTHY & ASSOCIATES (FORESTRY) PTY. LTD.**  
National & International Forest Consultants  
mccaf@datec.net.pg

"Long kisim tok stia long olgeta wok diwai"

## Japan kampani bai opim wan lein bris long Hailans Haiwe

James Kila i raitim

WANPELA bikpela projek wok i kirap pinis long bikpela Hailans Haiwe long kantri long wokim 5-pela wan-lein bris long kamap olsem dabol-lein.

Dispela projek bai kamap namel long Kainantu na Goroka. Wanpela kampani bilong Japan, Fujita Koporesen i go pas long wokim dispela bikpela projek long Hailans Haiwe. Narapela kampani bilong Japan tu i go pas olsem konsalten long dispela bikpela projek long haiwe em Nippon Koe.

Insait long wanpela eksklusiv ripot em *Wantok Niuspepa* i kisim long wanpela sinia opisa bilong Woks Hetkwota i tok olsem dispela wok Fujita Koporesen bilong Japan i winim em namba wan hap bilong wok kontrak we em bai wokim 5-pela dabol lein bris na kos bilong dispela wok em klostu long K10 milien.

Dispela mani long wokim dispela wok em gavman bilong Japan aninit long Japanis Intanesenel Koporesen Ejensi (JICA) i putim long mekim wok long dispela bikpela rot projek.

Woks opisa i tok olsem dispela namba wan hap bilong wok program we bai lukim dispela kampani bilong Japan i wokim 5-pela dabol lein bris bai pinis long mun Mas 2006.

Long namba tu hap bilong program em kontrak bai ol i putim maut long sampela mun bihain long dispela yia em long wanpela kampani long wokim narapela 7-pela wanpela lein bris i kamap dabol. Ol sampela wokman i makim ol dispela bris pinis long wok bai kamap long ol. Dispela ol bris tu i stap namel long Kainantu na Goroka yet long seksen bilong Hailans Haiwe.

Dispela ol 5-pela bris long Hailans Haiwe em i save gat wanpela lain tasol we wanpela kar o trak i save yusim long go na kam. Planti taim i save gat sain long rot long tokim ol kar long givim rot long ol arapela kar long go.

Nau yet wok i kirap pinis long sampela bris klostu long Kainantu long Isten Hailans provins em wanpela kampani bilong Japan i go pas long kamapim disain long wokim tupela lein bris.

Planti draiva bilong ol bikpela

kar na ol bikpela bisnis husat i save yusim Hailans Haiwe nau bai i ken painim isi long abrusim ol yet antap long ol dispela bris long wanem ol i kamap tupela lein pinis.

Wok i kirap pinis long 5-pela bris klostu long Namura na long Orompinka long mekim wanpela lein bris i go kamap olsem tupela.

Insait long narapela ripot long Hailans Haiwe em olsem planti ol seksen bilong dispela bikpela rot long hap bilong Simbu na long Anglimp Saut Waghi em rot i go bagarap tru. Planti ol PMV na ol bikpela trak we i save karim ol saplai bilong kaikai na sevis i go antap long ol bikpela gol projek insait long Porgera na wel projek long Kutubu na tu karim ol stua kaikai samting i go long ol provins olsem Westen Hailans, Sauten Hailans na Enga.

Long planti ol seksen bilong rot long Simbu em graun i pundaun i go daun na ol i bagarap tru. Dispela ol seksen i stat long Wandl i kam olsem long Mindima na tu ol sampela seksen long sait bilong Waghi Bruk i go olgeta long Minj.

### SMEC mekim trupela wok

TAIM wanpela wok i laik kamap long wanpela hap o ples i mas i gat ol lain i stap long stadi na mekim ol tes long graun long lukim sapos wanpela samting olsem rot, bris o traipela haus i ken sanap long hap.

SMEC o "Snowy Mountains Engineering Corporation" PNG Limited em wanpela bilong ol lain husat i save mekim dispela kain wok bilong testim ol graun na ol samting bilong kain wok.

Las wik Fraide ol i lonsim akredisen o tok orait na luksave long



laboratori o woksap bilong ol we olgeta wok bilong ol i save kamap long en, long opis bilong ol long Pot Mosbi. Piksa i soim sampela ol bikman bilong SMEC i sanap insait long woksap bilong ol. SMEC i stap wok insait long PNG moa long 30 yia pinis tasol aninit long nem bilong ol i yusim nau, SMEC PNG LTD o SPL, em i namba faiv yia bilong ol.

POTO: ANDREW MOLEN.

**Cat**  
330C FM  
Heel Boom  
Excavator

## Caterpillar® quality from undercarriage to grapple.

Specifically designed and built forestry machines, from log loading front linkages, forestry cabs, counterweight fuel tanks, catwalks and a variety of other special logging options are designed by Caterpillar to provide reliable, durable operation in the logging environment.

Full Caterpillar warranty, Caterpillar parts support and fast, easy machine maintenance are all part of Caterpillar and Hastings Deering's service commitment to the forestry industry.

**330C FM Heel Boom Under/Under 13.1 m (43') Reach and standard 850 mm (34") track**

**Hastings Deering**

PORT MORESBY Phone: 300 8300 Fax: 325 0141

LAE Phone: 472 2355 Fax: 472 1477

TABUBIL Phone: 548 9045 Fax: 548 9155

RABAUL Phone: 982 1244 Fax: 982 1129



# Tok Pisin News

Radio Australia  
101.9FM Port Moresby

Tok Pisin Service  
6am - 7am : 6080, 7240(KHZ)  
7pm - 9pm : 5985, 6020, 9710, 1280(KHZ)

## WOL NA PASIFIK NIUS

### SI PM i kisim ripot bilong wok bilong RAMSI

Solomon Ailans Praim Minista i tok em i bin kisim wanpela ripot i kam long Pasifik Ailan Eminen Pesens Grup i go long wok bilong Rijinel Asistens Misin, RAMSI.

Sean Dorney i ripot olsem, Sir Allan Kemakeza i tok of bai glasim dispela ripot na mekim ol senis i go long RAMSI Fasilitesen Ekt o lo, sapos ol i lukim senis i mas kamap. Foren Minista bilong Fiji, Kaliopate Tavola, husat i go pas long Eminen Pesens Grup bilong Forum, wantaim Ombudsman bilong Samoa, Iulai Toma, na Seketeri Jenerel bilong Forum, Greg Urwin.

Sir Allan Kemakeza i no bin tok aut long wanem i stap insait long ripot tasol em i tok amamas long grup long pinisim 'review' i go long RAMSI long tok ol i bin pinisim kwik.

Em i tok Gavman bilong em nau i glasim ripot bilong ol.

Sir Allan i tok sapos senis i kamap, ol bai bringim i go insait long narapela miting bilong Palamen insait long mun Ogas.

### Nauru i kros wantaim Australia long vot bilong ol long ol weil

NAURU i bin tok dispela kros bilong em long Australia long hau em i bin vot las wik long miting bilong Intenesenel Whaling Komisin i soim olsem Australia i no luksave long ol olsem ol i indipenden kantri.

Sean Dorney i bin ripot olsem Ambaseda long Yunaitet Nesens i bin tok vot em kantri bilong em i bin mekim i bilong lukautim namba bilong ol tuna pis bilong em. Australia i bin kempein hat tru namel long ol kantri bilong Pasifik olsem bilong mekim ol i vot agensim Japan long bung bilong Intenesenel Weiling Komisin wantaim Enviromen Minista, Seneta Ian Campbell, i bin kros tru long Minista blong Nauru, Marcus Steven, long i no bin laik toktok wantaim em.

Ambaseda bilong Nauru long Yunaitet Nations, Marlene Moses, i bin strongim rot Mista Steven i bin putim vot bilong em na i bin tok vot bilong Nauru gavman long "commercial whaling" em i wanpela disisen ol i bin tingting gut long en.

Ambassador Moses i bin tok sampela long ol weil i gat dispela wei bilong bagarapim namba blong ol tuna pis bilong Nauru, na ol olsem wanpela kantri, em strong blong ol long kaikai na bisnis i save stap long fishing, em samting em i tok, wanpela gutpela tingting ol i bin mekim.

Em i tok ol gavman bilong ol arapela kantri i mas gat tingting long soim rispek long dispela disisen bilong Nauru na noken daunim em olsem em i wanpela independen kantri, na tok olsem dispela tingting iblong Nauru i bilong lukim olsem Nauru i kisim gutpela samting long en.

### Samoa tambu long ol ausait i adoptim ol pikinini

Palamen long Samoa i kamapim pinis lo em, i tambu long pipel blong ol narapela kantri long adoptim ol Samoa pikinini.

Aninit long ol despela niupela lo, pipel em ol i kandere bihainim blut namel long ol famili, inap long adoptim ol samoa pikinini namel long ol yet, i nogat ol ausait lain i ken.

Long olgeta wan wan case long Samoa famili oa man oa meri i laik adoptim pikinini long Samoa, bai Atoni Jeneral em wanpela tasol i mas kamap na oraitim.

Ol i bin putim ol despela senis long Palame, bihain long wanpela bebi meri i bin dai taim em i bin stap long han bilong wanpela American adopsen ejensi bilong wanpela man Amerika. Polis nau i wok long karimaut ol wok dispela ejensi na ol i tambuim ol dairekta bilong en, long em i noken lusim Samoa.

### Fiji pipel autim laik bilong ol long Fiji militeri komanda

Wanpela painimaut long tingting bilong ol pipel o Opinion Poll long Fiji i soim olsem planti pipel i givim tok orait long wok bilong Fiji Militeri Chief, Commodore Frank Bainimarama. Makim yet tupela Tebbutt Times pol, 23 pesen bilong pipel i ting Commodore Bainimarama i mekim gutpela wok tru, na 32 pesen i tok em mekim wok gut. Aninit long wan kwata bilong pipel i bekim askim ino bilip em i mekim gut wok bilong em.

Poseci Bune (Pos-eth-see Mboo-nay) bilong Fiji Leba Pati i tok dispela pol i

soim ol Fijian i lukim Nesenel Sekyuriti i namba-wan samting.

Em i askim gavman long traim stretim hevi namel long en na militeri.

### Solon loya laikim mo long wan milian dola kompensesen

OL Australia loya bilong Vivian Solon, em ol i bin rong long salim em i go aut long kantri i laikim mo long wan-milian dola kompensesen.

Jastis Marcus Einfeld husat i wok long givim tingting i go long ligel tim bilong Mis Solon, i tok dispela meri krismas bilong em 42 i mas kisim peimen long ol narapela bagarap long wanem em i tok, gavman i bin feil long rispektim ol rait bilong em olsem wanpela sitisen bilong Australian.

Ol bin luksave long Mis Solon olsem em i gat sampela hap bodi i rong long em taim ol i salim em i go aut na i no bin nap long sainim nem na ol travel dokumen bilong em.

Federal Gavman i tok, em i bin tokaut pinis long gutpela ofa i go long em, tasol Jastis Einfeld i tok, dispela i helpim i bilong sotpela taim tasol.

### Planti toktok kirap long rausim Presiden Arroyo

OL TOKTOK nau i wok long kamap long rausim Philippine President, Gloria Arroyo, long wanem em i gat ol tokwin i kamap long em i bin stap insait long korapsen pasin long vot o ileksen, na nau wanpela memba blong Palamen i wok long sapotim ol toktok nau long rausim em long wok bilong Presiden.

Lejisleta Rodante Marcoleta i sapotim wanpela komplein, em praivet loya, Oliver Lozano i bin bagarapim bilip bilong pablik long en.

Nau wanpela komiti i mas skelim tingting long dispela komplein i gat strongpela as long ol i ken kisim i go long Palamen, we em bai i mas kisim wan ted long ol memba long ol i oraitim na salim i go long Senet we bai ol i ken statim nau wok bilong rausim em.

Misis Arroyo i bin tok long dispela telepon kol olsem em i no bin gutpela, bilong lukautim vot blong em, taim kandim bilong ol vot i bin isi, tasol em i tok em i no traim na mekim ileksen bai ron bihainim laik bilong em yet.

## RADIO TOK PISIN PROGRAM TUNE IN: 101.9 FM

Radio Australia Tok Pisin Program - stat long mun Mas 2005

MANDE Morning	6AM	Stesen Op - Nius Hetlain - Musik na ol intaviu
6.30AM	Nius na Karent Afeas	
7AM	Stesen Pas	
Nait		
7PM	Stesen Op	
7.01PM	Ol Hetlain na Program Priviu	
7.15PM	Spots	
7.30PM	Nius na Karent Afeas	
8PM	Heit	
8.15PM	Musik	
8.30PM	NIUS	
8.40PM	Spots Riplei	
8.55PM	Musik	
9PM	Stesen Pas	
TUNDE Morning		
6AM	Stesen Op - Nius Hetlain - Musik na ol intaviu	
6.30AM	Nius na Karent Afeas	
7AM	Stesen Pas	
Nait		
7PM	Stesen Op	
7.01PM	Ol Hetlain na Program Priviu	
7.15PM	Musik na Chit-Chat	
7.30PM	Nius na Karent Afeas	
8PM	Mama Graun	
8.15PM	Musik/Spots	
8.30PM	NIUS	
8.40PM	Heit Riplei	
8.55PM	Musik	
9PM	Stesen Pas	
TRINDE Morning		
6AM	Stesen Op - Nius Hetlain - Musik na ol intaviu	
6.30AM	Nius na Karent Afeas	
7AM	Stesen Pas	
Nait		
7PM	Stesen Op	
7.01PM	Ol Hetlain na Program Priviu	
7.15PM	Musik na Chit-Chat	
7.30PM	Nius na Karent Afeas	
8PM	Focus	
8.15PM	Musik/Spots	
8.30PM	NIUS	
8.40PM	Mama Graun Riplei	
8.55PM	Musik	
9PM	Stesen Pas	
FONDE Morning		
6AM	Stesen Op - Nius Hetlain - Musik na ol intaviu	
6.30AM	Nius na Karent Afeas	
7AM	Stesen Pas	
Nait		
7PM	Stesen Op	
7.01PM	Ol Hetlain na Program Priviu	
7.15PM	Musik na Chit-Chat	
7.30PM	Nius na Karent Afeas	
8PM	Youth	
8.15PM	Musik/Spots	
8.30PM	NIUS	
8.40PM	Focus Riplei	
8.55PM	Musik	
9PM	Stesen Pas	
FRAJDE Morning		
6AM	Stesen Op - Nius Hetlain - Musik na ol intaviu	
6.30AM	Nius na Karent Afeas	
7AM	Stesen Pas	
Nait		
7PM	Stesen Op	
7.01PM	Ol Hetlain na Program Priviu	
7.15PM	Musik na Chit-Chat	
7.30PM	Nius na Karent Afeas	
8PM	Wantok	
8.15PM	Musik	
8.30PM	NIUS	
8.40PM	Youth Riplei	
8.55PM	Musik	
9PM	Stesen Pas	
SARERE		
Nait		
7PM	Stesen op - Ol Nius Hetlain/Program Priviu	
7.05PM	Musik na Chit Chat	
7.30PM	Nius	
7.40PM	Wantok	
8PM	Lokal Ban	
8.30PM	Nius	
8.40PM	Musik/Chit Chat	
9PM	Stesen Pas	
SANDE		
Nait		
7PM	Stesen op - Ol Nius Hetlain/Program Priviu	
7.05PM	Musik na Chit Chat	
7.30PM	Nius	
7.40PM	Femili Blong Serah (Radio Plei)	
8PM	Luktuk Bek Long Wik	
8.30PM	Nius	
8.40PM	Musik/Chit Chat	
9PM	Stesen Pas	

TOKSAVE: YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIK.

# Pacific BEAT

Listen to Radio Australia  
101.9FM Port Moresby

4, 5, 6am & 4pm, 5pm  
including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

**RAGBI**

**POM SP Lig**

Sarere 2/7/05  
 PRL 1  
 09:00 Hawks vs Souths U19  
 10:00 Hawks vs Souths A  
 11:30 Waliya s Defence A  
 1:00 Brothers vs DCA A  
 2:30 Royals vs Paga A  
 4:00 Dobo vs Magani A  
 PRL 2  
 09:00 Magani vs Dobo U17  
 10:00 Brothers vs DCA U17  
 11:00 Waliya vs Defence U19  
 12:00 Royals vs Paga Res  
 1:30 Hawks vs Souths Res  
 3:00 Brothers vs DCA Res  
 PRL 3  
 09:30 Waliya vs Defence U17  
 10:30 Magani vs Dobo U19  
 11:30 Royals vs Paga U19  
 12:30 Brothers vs DCA U19  
 1:30 Magani vs Dobo Res  
 3:00 Waliya vs Defence Res  
 Sande 3/7/05  
 PRL 1  
 09:00 School Boys Development Squad  
 10:00 West vs Tarangau A  
 11:30 Puma vs Kone Tigers A  
 1:00 **BB Bulldogs vs Chemica Cowboys SPC**  
 3:00 **Monier Broncos vs CC Lahanis SPC**  
 PRL 2  
 09:00 West vs Tarangau U17  
 10:00 Hawks vs Souths U17  
 11:00 West vs Tarangau U19  
 12:00 Kone vs Puma Res  
 PRL 3  
 09:00 Kone vs Puma U17  
 10:00 Royals vs Paga U17  
 11:00 Kone vs Puma U19  
 12:00 West vs Tarangau Res

**SOKA**

**EVADAHANA Soka Asosiesen**

Sarere 2/7/05  
 ESA 1  
 08:00 Gee Neps vs Finka meri  
 08:40 Junction vs Graveside Res  
 09:20 Brothers vs Kepsen Imindo D3

10:00 Country Roots vs Outsiders D2  
 10:40 Notna vs Dogura Rats meri  
 11:10 Natare vs Siale Res  
 11:50 Junction vs Sulu D1  
 12:30 Batisalem vs Wasu Crabs D2  
 13:10 Nen Konok vs Wopa Utd D3  
 13:50 Sulu vs Texas Res  
 14:30 Finka vs Namagawi Res  
 ESA 2  
 08:00 Nen Konok vs Wasu Crabs meri  
 08:40 Sapphire vs Raitopos D2  
 09:20 Gala Konok vs Gaidi Utd Res  
 10:00 K-Top Mahnduz vs Namagawi meri  
 10:40 TKSS vs K-Top Mahnduz D3  
 11:10 Gee Neps vs BS Natives Res  
 11:50 Natare vs Siale D1  
 12:30 Wopa Utd vs Notna D2  
 13:10 Country Roots vs AGM Roots meri  
 13:50 Natare vs K-Imindos meri  
 14:30 Batisalem vs Raitopos D3  
 Sande 03/7/05  
 ESA 1 (Game 7)  
 08:00 BS Natives vs Gara Utd Res  
 08:40 Batisalem vs AGM Roots meri  
 09:20 Simbai Utd vs Wasu Crabs D3  
 10:00 Gee Neps vs Gala Konok Res  
 10:40 Brothers vs Country Roots D2  
 11:10 Wasu Crabs vs Gaidi Utd meri  
 11:50 Natare vs Finka D1  
 12:40 Nalas vs D-Rats D1  
 13:30 Names vs Gara Utd D1  
 14:10 Texas vs Liwale Res  
 14:50 Country Roots vs K-Top Mahnduz D3  
 15:40 AGM Roots vs Nen Konok D2  
 ESA 2 (Game 7)  
 08:00 Natare vs Kilengs Res  
 08:40 Nen Konok vs Natare meri  
 09:20 Outsiders vs Wopa Utd D2  
 10:00 K-Imindos vs Sapphire D3  
 10:40 Names vs D-Rats Res  
 11:10 Gala Konok vs Liwale D1  
 12:00 Namagawi vs K-Imindos meri  
 12:40 K-Imindos vs TKSS D2

13:20 Gee Neps vs Texas D1  
 14:20 Batisalem vs K-Top Mahnduz D2  
 15:00 Brothers vs Notna D3  
**PMSA soka**  
 Sarere 2/7/05  
 Bisini 1  
 08:00 Jaha vs Fernor D2  
 09:30 Cosmos vs LBC Defence U21  
 10:30 Mungkas vs Guria D1  
 11:50 Lamana GFN vs WMI WP  
 13:10 LBC Defence vs Los Negros W1  
 14:20 Cellnet vs Badili Utd D1  
 16:00 PS Rutz vs Mirel Momase Prem  
 Bisini 2  
 08:00 Rapatona vs University P/Res  
 09:30 PS Rutz vs Mirel Momase U21  
 10:30 Naniu vs Bavaroko D1  
 11:50 Kurti Andra vs Souths Utd U21  
 13:10 University vs Guria WP  
 14:20 Rapatona vs University Prem  
 16:00 Cosmos vs LBC Defence Prem  
 SJGS - Oval 1  
 11:50 UBOG vs Korion D2  
 13:05 Maset vs KG Utd D3  
 14:20 Raitman vs Moonbi D3  
 16:00 Kurti Andra vs Souths Utd P/Res  
 SJGS - Oval 2  
 11:50 PS Rutz vs Mirel Momase P/Res  
 13:05 PNG Gardener vs Orogen D2  
 14:20 Telikom vs Tawala D2  
 16:00 Yawata vs Zombie D3  
 Sande 3/7/05  
 Bisini 1  
 08:00 Rapatona vs University U21  
 09:20 Naniu vs Tawala W1  
 10:30 Pacifica Utd vs Los Negros D1  
 11:50 Mungkas vs Sobou W1  
 13:10 Blue Kumuls vs Sunset U21  
 14:20 PS Rutz vs Murat WP  
 16:00 Kurti Andra vs Souths Utd Premier  
 Bisini 2  
 08:00 Cosmos vs LBC Defence

P/Res  
 09:20 Jaha vs Mopi Soweto W1  
 10:30 Manambu vs Eia Utd D1  
 11:50 Blue Kumuls vs Sunset P/Res  
 13:10 Sunset vs Souths Utd W1  
 14:20 Telikom vs Rapatona WP  
 16:00 Blue Kumuls vs Sunset Prem  
 SJGS - Oval 1  
 08:00 Jaha vs Tarangau D2  
 09:20 PNG Gardener vs Tawala D2  
 10:30 Sobou vs Mopi Soweto D3  
 11:50 Bomana PC vs KB Utd D3  
 SJGS - Oval 2  
 08:00 Lus Prutz vs Verave D2  
 09:20 Markham Yarangs vs KB Utd D3  
 10:30 Nomads vs Zombies D3  
 11:50 Sobou vs Bavaroko U21  
 13:05 Mungkas vs Manambu U21  
 14:15 Cellnet vs Markham Yarangs U21  
 15:30 Yawata vs Raitman D3  
 16:45 Markham Yarangs vs Moonbi D3  
 Mid-week Game  
 Mande 4/7/5  
 Bisini 2  
 16:30 Guria vs Los Negros U21  
 Trinde 05/7/05  
 Bisini 2  
 16:30 Badili Utd vs Pom BusColl U21

**BASKETBOL**

**CBL**

Hohola Kot  
 Sarere 2/7/05  
 Kot Wan  
 8:30 Tamaraws vs Muruks U19B  
 9:30 Tamaraws vs Muruks U19G  
 10:30 Tamaraws vs Muruks RW  
 12:00 Tamaraws vs Muruks RM  
 1:30 Tamaraws vs Muruks AW  
 3:00 Tamaraws vs Muruks AM  
 Kot Tu  
 8:30 Jazz vs Saints U19B  
 9:30 Jazz vs Saints U19G  
 10:30 Jazz vs Saints RW  
 12:00 Jazz vs Saints RM  
 1:30 Jazz vs Saints AW  
 3:00 Jazz vs Saints AM  
 Sande 3/7/05  
 Kot Wan  
 8:30 Exodus vs Chariots U19B


9:30 Exodus vs Chariots U19G  
 10:30 Exodus vs Chariots RW  
 12:00 Exodus vs Chariots RM  
 1:30 Exodus vs Chariots AW  
 3:30 Exodus vs Chariots AM  
**VOLIBOL**  
**FAIRFAX**  
 Sarere 2/7/05  
 Sir John Guise Indoor Stadium  
 Kot 1 (meri)  
 08:30 Trans Hi Way vs TI Doria WA  
 09:30 Badili Hides vs Lagoons WA  
 10:30 Esi Loan Neibas vs TI Doria WA  
 11:30 Freeway Hox vs Telikom WA  
 12:30 Yonkies vs Badili Hides WA  
 1:30 Arnotts vs Frenz WA  
 2:30 Dolphins vs Fire Fox WA  
 Kot 2 (meri)  
 08:30 Freeway Hox vs Fire Fox WAR  
 09:30 Dolphins vs Seeto Kui POM WAR  
 10:30 Telikom vs Trans Hi Way WAR  
 11:30 Dolphins 1 vs 14 Mixers WAR  
 12:30 Yonkies vs Wet WAR  
 1:30 Kakidos vs Badili Hides WAR  
 2:30 TI Doria vs Arnotts WAR  
 Kot 3 (man)  
 08:30 Telikom vs Frenz MAR  
 09:30 Lagoons vs TI Doria MAR  
 10:30 Esi Loan Neibas vs Moukele MAR  
 11:30 Wet vs Arnotts MA  
 12:30 Freeway Hox vs Lagoons MA  
 1:30 Telikom vs Esi Loan Neibas MA  
 2:30 TI Doria vs Dolphins MA  
 Kot 4 (man)  
 08:30 Freeway Hox vs Arnotts MAR  
 09:30 Badili Hides vs Dolphins MAR  
 10:30 Kakidos vs Wet MAR  
 11:30 14 Mixers vs Fire Fox MAR  
 12:30 Seeto Kui POM vs Moukele MA  
 1:30 Kakidos vs Frenz MA  
 2:30 Fire Fox vs Yonkies MA



• UPNG Blues tim we i winim Goroka Yunivesiti long kisim 2005 Vais Sanselas ragbi lig Kap. Dispela pilai i bin kamap long mein graun bilong UPNG Kempes.



• Lae Yunivesiti ov Teknologi Red tim husat i kamap long dispela pilai. Turangu ol apo i traime tasol i sot lik-lik long strong.



Yunivesiti ov Goroka tim husat i traime bun wantaim UPNG Blues tasol i lus long gren fain-ol. Traime gen long narapela yia. Ol foto: PAULUS MANE (UPNG jonal-ism sumatin)



• Holim gut... City Pharmacy meri i banis gut bal bipo long em i lusim bai Monier Paramata pilai i no ken holim. Tupela i pilai long Pot Mosbi net-bol kompetisen long Rita Flynn Kot. Foto: ANDREW MOLEN



• Em bilong mi: Thomas Linge bilong Dockers i kalap long kisim bal long wanpela mak wantaim ol Bulldogs long Pot Mosbi osi rul resis long Colts Pak long las Sarere. Dockers win 46-34.



• Bol wok: Pilaia bilong Cosmos i traim long ron arere long pilaia bilong Souths long Pot Mosbi soka resis long las wiken. Em i las raun na ol pilai i wok long go hot taim ol tim i painim ples long stap long fainol.



Ran Gut: Tupela rana bilong Pot Mosbi i ron long las Sande moning Pot Mosbi hap maraton we i bin stat long Ela Bis go long Baruni na Etles Stil na go bek long Ela Bis.



• Stap isi... ol pilaia bilong Medics i was long kisim bal bipo long ol i ken mekim rait muv long taim ol i pilai wantaim Brothers long Pot Mosbi ragbi union pilai long Bava Pak long wiken.



• Yu bai kisim! fowet bilong De La Salle Hai Skul Newman Waipu i laik sutim bal i go long Michael Sengi, gol kipa bilong Tokarara Hai Skul long Pot Mosbi skul soka long Sir John Guise Stedum long Sande.




• Wanpela swima long las wiken PNG Dolphins Sprin long Sir Donald Cleland pul long Taurama Lesa Senta. Long dispela taim tu Ryan Pini kosa Rick Van de na Pini yet i kamap long hollim kos. *Oi foto: ANDREW MOLEN*



• **Bikpela manki...Willie Mason** i sain gen wantaim Canterbury Bulldog long pilai wantaim ol long narapela foapela sisen inap long pinis bilong 2009. "Willie i bin soim sampela mak we em i stap long rait taim wantaim Dogs long helpim ol," Bulldogs kosa Steve Folkes i tok. Folkes i tok Willie inap kamap kepten tu. Long dispela saining Mason i tok: "Mi amamas tru long kisim taim em ol Dog i givim mi long pilai wantaim ol."

• Sydney full bek Adrian Morley i tok em i no mekim rong long hapim lek na kikim narapela pilaia. Morely i wanpela bilong ol pilaia husat i stap wantaim ol sas bilong ol las wiken pilai. Dispela Ingran pilaia i join wanpilaia bilong em long Roosters tim Ryan Cross long tupela i nogat sas long bekim long ai bilong NRL judisari. Parramatta seken rowa Glen Morrison i tok em i kisim bagarap taim Cross i takolim em. Long dispela pilai ol Roosters i win 12-8 long Aussie Stedum las Fraide nait.



## Ol wok redi bilong namba 3 Stet ov Orijin

LONGstat Maroons i lusim fulbek bilong ol Billy Slater na kisim Matt Bowen long kisim ples bilong em long namba tri Stet ov Orijin pilai we bai kamap long Suncorp Stedum long Brisbane long Julai 6, Trinde wik.

Maroons kosa Michael Hagan long senisim Slater i tok dispela em i hatpela disison. Em i tok tupela pilaia wantaim i gat wankain strong tasol ol i tok namba tri pilai i bikpela samting tru na olsem ol i mas mekim ol gutpela senis. "Mipela i lukim olsem foapela pilaia long Not Kwinslen olsem Matt Sing, Ty Williams, Jonathan Thurston na Paul Bowman i stap long tim na olsem Bowen i save long ol moa long Slater na olsem mipela i mekim senis.

Tasol em i tok dua bilong Slater i op yet. Em inap kam insait gen.

Long sait bilong ol Blues Timana Tahu na Craig Gower i kam insait we Tahu i kisim ples bilong winga Luke Rooney na Tahu i kisim ples bilong yutiliti Craig Wing. Rooney na Wing i gat hevi long lek bilong ol. Long kepten bilong Blues, Danny Buderus, kosa Ricky Stuart i wet yet long nau

Fonde sapos Buderus i redi long ron long dispela taim em i gat sua long lek bilong em. Sapos em i no redi orait em bai kisim Penrith huka Luke Priddis long kisim ples bilong em. Moa yet ol i no inap long kisim yet Trent Barrett long wanem em i no bin pilai inap nau bihain long em i kisim bagarap long lek bilong em tu.

Na sapos Buderus i no kam bek i luk olsem ol bai makim Andrew Johns long kisim ples bilong em. Johns i bin helpim gut tru Blues long winim namba tu Stet ov Orijin we i mekim namba i wankain long win bilong Maroons.

"Mipela i mekim ol disison long bihain taim ol pilai i gat long pilai," Stuart i tok. Sapos nogat planti pilaia bilong Blues i stap olsem yet.

Na skwat bilong Maroons long taim em i redi em Matt Bowen, Ty Williams, Shaun Berrigan, Paul Bowman, Matt Sing, Darren Lockyer (k), Jonathan Thurston, Petero Civoniceva, Cameron Smith, Danny Nutley, Michael Crocker, Brad Thorn na Chris Flannery. Senis em Ben Ross, Ashley Harrison, Corey Parker. Kosa em Michael Hagan.



• Maroons ful bek Billy Slater we planti toktok i kamap long senis bilong we narapela strongpela Maroons pilaia Matt Bowen long kisim ples bilong em i gat taim yet long kam gen long mekim Maroons tim, kosa Michael Hagan i tok.



### • Sori tumas!

Blues winga Luke Rooney bai i no inap pilai long namba tri Stet ov Orijin pilai long wanem em i gat hevi long lek bilong em. Timana Tahu bai kisim ples bilong em dispela taim.

## Raun 17

Fraide, Julai 1 - Tigers vs Eagles. Yu ken fukim long EMTV long 8.30 long nait.



Sarere, Julai 2 - Dogs vs Storms  
Cowboys vs Warriors  
Knights vs Roosters

Sande, Julai 3 - Raiders vs Panthers. Yu ken iukim dispela long EM TV long 4:00-6:00 avinun.



Broncos vs Sharks  
Eels vs Rabbitohs  
Bai: Dragons

### NRL Poin Lata (after rnd 15)

Klab	P	W	D	L	B	P/D	Pts
1 Broncos	15	12	0	3	1	133	26
2 Eels	15	10	0	5	1	81	22
3 Sea Eagles	15	10	0	5	1	32	22
4 Sharks	14	9	0	5	2	8	22
5 Cowboys	14	8	0	6	2	61	20
6 Storm	15	8	0	7	1	155	18
7 Dragons	16	9	0	7	0	46	18
8 Roosters	14	7	0	7	2	21	18
9 Raiders	14	7	0	7	2	-43	18
10 Bulldogs	14	6	1	7	2	-8	17
11 Warriors	15	7	0	8	1	35	16
12 Wests Tigers	15	7	0	8	1	-40	16
13 Panthers	15	5	0	1	1	-24	12
14 Rabbitohs	15	3	1	1	1	-189	9
15 Knights	14	1	0	1	3	-268	6


\* P: Pilai, W: Win, D: Dro, L: Lus, B: Bye, P/D: Poin Diferens, PTS: Poin

### Top 10 poin skora

Pilaia	Tim	Poin
1. Hazem El Masri	Bulldogs	150
2. Brett Hodgson	Sharks	128
3. Luke Covell	Sharks	126
4. Michael Witt	Sea Eagles	124
5. Darren Lockyer	Broncos	113
6. Luke Burt	Eels	108
7. Preston Campbell	Panthers	108
8. Matt Orford	Storms	94
9. Clinton Schifcoske	Raiders	94
10. Stacey Jones	Warriors	81



• Penrith Panthers kepten Craig Gower husat bai kisim ples bilong Blues yutiliti Craig Wing long pilai namba tri Stet ov Orijin pilai. Gower i gat gutpela save bilong kik tu.



# SP Kap kukim Mosbi

POT Mosbi bai holim tupela pilai long dispela Sande long raun 9 bilong SP Kap.

Pilai namel long Monier Broncos na Coca-Cola Lahanis we bai mas i kamap long Goroka nau bai kamap long Pot Mosbi. Narapela pilai we ol i makim pinis em pilai namel long Brian Bell Bulldogs na Chemica Cowboys.

PNG Ragbi Futbol Lig jenerol menesa Joe Tokam i tok ol senis i kama long wanem ol i lukim olsem Lahanis i bin lukautim wanpela pilai namel long em yet na Broncos pinis na olsem em i taim nau bilong ol Broncos long lukautim dispela pilai ... nel long tupela yet.

Narapela as em i olsem Pot Mosbi i bin holim wanpela dabol heda tasol na i moa gutpela em i holim narapela dabol heda gen.

Narapela as tu we pilai i mas kamap long Mosbi em long namba bilong ol manmeri husat i kamap na lukim pilai long Goroka. Namba i wok long go daun na olsem PNG Ragbi Lig i ting sapos pilai i kamap long Pot Mosbi ol bai inap lukim gutpela makmak.

Long bekim dispela tingting Pot Mosbi ragbi lig siaman Solomon Ravu i tok ol i amamas long dispela disison na i lukluk tasol long holim dispela dabol heda. Em i tok Pot Mosbi i bin wok long abrusim dispela sans bilong lukim planti ol ragbi lig pilai.

"Mipela i kisim toksave pinis long dis-



• Bai yu go we... Guria winga Gilbert John i ting taim em i traim long hamarim Bulldogs Joshua Lapa long noken go long pilai bilong ol long Lloyd Robson graun las Sande. Guria win 25- 10. Foto: PAUL ZUVANI

pela tingting bilong SP Kap dro na olsem mipela i wok long redi long dispela tupela pilai," Ravu i tok. Na long redi long dispela tupela pilai lig nau i mas stretim gen ol dro bilong em long wiken.

Bulldogs husat i go daun long Agmark Guria 25-10 long Pot Mosbi las Sande bai lukluk long bekim dispela dinau taim ol i

bungim Chemica Cowboys long namba wan pilai bilong dispela tupela pilai na bihain long em bai Broncos wantaim Lahanis.

Broncos i bin winim Mabev & Johnson Muruks 24-23 long Lae long las wik na Lahanis i stopim Toyota Mioks 19-14 long Goroka.

## Hailans jon lig sempionsip

HAILANS Jon Lig sempionsip bilong Anda 19 na Sinia pilai bai kamap long Goroka.

PNG Ragbi Futbol Lig jenerol menesa Joe Tokam i tok Anda 19 pilai bai kamap na stat long Fraide Julai 15 i go inap long Sarere Julai 16 we ol lig husat inap salim tim bilong ol long dispela pilai em lalibu, Imbongu, Kurumul, Mendi, Mt Hagen, Tari na Goroka.

Na sinia pilai bai stat na kamap long Fraide Julai 22 i go inap long Sarere Julai 23 na ol lig husat inap salim tim bilong ol em lalibu, Imbongu, Kundiawa, Kurumul, Mendi, Mt Hagen, Porgera, Tabubil, Tari, Wabag, Nondugul na Goroka.

Tokam i tok mani bilong baim rot,

ples bilong silip na kaikai em wanwan ol lig bai mas redim na lukautim.

Em i tok sapos ol lig i lukim olsem ol i painim hat long redim na lukautim kos bilong olgeta dispela samting orait ol i mas toksave long PNGRFL na salim tasol wanpela divison/tim long makim ol.

Long dispela jon sempionsip ol selekta bai makim Hailans Jon Anda 19 skwat na sinia skwat long pilai long nesanel jon sempionsip we bai kamap long Lae Julai na Ogas.

Sinia nesanel jon sempionsip bai kamap na stat long Julai 30 i go inap long Julai 31 na Anda 19 pilai bai kamap na stat long Ogas 6 i go inap long Ogas 7.



• Taim nogut... Bulldog senta Charlie Wabo i takolim hap bek bilong Guria Jessie Alunga long pilai bilong Bulldogs na Guria long Lloyd Robson graun las Sande. Guria win 25-10.

## ... i kam long bek pes Ol tim pait long ples yet

Tasol kosa bilong Lae Bombers Joe Katsir i gat ol gutpela pilaias bilong em i stap olsem Michael Gena, Russ Kaupa Junior, Anton Ba long beklain long hapbek em foma Lahanis pilaia Nime Kapo wantaim Randal Kaupa na long fowat em bai Tony Dai, Luca Daniel, Brown Wilby na Jonah McKay. Muruks i gat wanpela gutpela hapbek olsem Steven Kua husat i ken kamapim bikpela het-pen long ol lain Bombers, tasol ol fowat bilong em i mas sapatim em gut sapos ol i laik winim dispela gem.

Ol lain husat bai pilai strong long Muruks em Roderick Puname, Terry Towa, Gerry Kandipa na Jonah Wangane long beklain. Long fowat em kepten yet Cedrik Kengi bai go pas wantaim ol lain olsem Johny Toank, Billy Clement, Issac Paul na Charlie Dominic.

Narapela gutpela gem bai kamap long Goroka bai lukim ol lain Chemica Cowboys i traim bun wantaim tim we i kam namba tu ples long poin lada em Brian Bell Bulldogs.

Dispela tupela tim bai traim long soim gut kala bilong ol long Goroka long winim gem long stap strong insait long kompetisen.

Bulldogs i gat ol strongpela pilaias husat i save ridim gem gut tru na bai traim long daunim ol Cowboys. Tasol ol boi Hagen bai i traim long yusim ol fowat bilong ol long daunim ol boi bilong Mosbi.

Kosa bilong Brian Bell Bulldogs, Chris Enara bai traim long yusim kepten bilong em Stanley Hondina long kontrolim gem wantaim Geno Kima long stretim rot bilong ol fowad bilong ol olsem Joe Sil, Joseph Omai, Joe Sipa na Johnson Kuike long brukim difens bilong ol boi Cowboys.

Long beklain bilong Bulldogs em ol lain olsem Enosi Geua, Abraham Yobale, Joshua Lapa na Samuel Nap na Charlie Wabo bai i go pas long em. Narapela gem long Kokopo we ol stail mangi bilong Agmark Rabaul Guria bai traim bun wantaim Enga Mioks tu bai i paia lait stret.

Ol boi Guria i gat gutpela spit na strong long beklain wantaim ol pilaias olsem Jessie Alunga, Oscar Tonga, Gilbert John na kepten yet Michael Marum long kamapim spes long ol long skorim trai. Kosa bilong Enga Mioks Toksy Nema bai traim hat long kamap wantaim wanpela gutpela gem plen sapos em i laik ol boi bilong em i winim Guria long asples bilong ol.

## Madang ragbi lig holim anda 19 na A Gret seleksen pilai

MADANG ragbi lig bai holim anda 19 na A Gret seleksen pilai long dispela wiken long makim tim bilong ol long kamap long Noten Jon Lig triais.

Tupela tim long tupela divison i mas long dispela Jon triais. Na olgeta pilaia na tim opisel husat nem bilong ol i stap nau i kamap long trening long Ron Albert Ovel. Ol tim em- Anda 19 Grin: Michael Base, Samuel Zaza, Steve Ole, Joe Manalau, Tani Pawa, Sammy Karl, Kepi Namana, Trevor Kitao, Peter Kolkia, Joshua Yama, Samson Kale, Jeremiah Yombon, Hector Morris, Jeffery Iki, Mike Dage, Lyod Anut na Longman Dau. Ol opisel em kosa Max Kitao, trena Simon, tim menesa Joe Moka na dokta Hugh Saweni.

Anda 19 Blue: Mickenzie Moka, Garry John, Manu Mal, Christ Talau, Malcolm Mazik, Richard Sibolo jnr, Guyford Yama, Simon Mundi, Bob Dadik, Lapun Taine, Sammy Kipalan, Gabriel Tigapu, Elias Balen, Rammy Roy, Andrew Ome, Junior Passingan na Victor Manamb. Opisel kosa Joe Passingan, trena Michael Gembo na menesa James Kasi.

A Gret Grin: Paul Willie, Don Wia, Murphy Sefa, Frank Katenge, Joe Stegman, John Samato, Jerry Taita, Mark Warua, Philip Garima, Isaac Asa, Arnold Ulka, Jimmy Karl, Okun Tumun, Paul Poka, Robinson Horseman, Eddie Gee, Isaac Sumunan, Jack Taraka na Simon Kapolo. Opisel em kosa Paul Tumun, trena/dokta Riven.

A Gret Blue: Robert Nemola, Takabi Bara, Jack Marabe, Samson Biki, Bernard Martin, Lawrence Gande, Danam Kuso, Bal Michael, Philip Kupo, Robin Talopa, Umba Adam, Manu Yama, Ian Gore, Murray Koimo, Moses Edwin, Piam Tandawai, Willie Ropra, Isaac Kia na Dickson Coleman. Kosa em Boston Jack, trena Bobby Razeye, menesa Joe Pekas na dokat A Henao.

## Diwai tim pinis long Madang lig

TUPELA taim Madang primia ragbi lig tim sempion Diwai i pinis long pilai long 2005 Madang ragbi lig sisen.

Dispela i bihain long tim i no bin kamap long tupela pilai bilong em long primia divison bilong em. Moa yet sampela ol pilaia bilong tim i no baim registresen fi bilong em.

Madang ragbi lig presiden Max Kitao i tok Diwai i tim i no kamap long tupela pilai bilong em long las tupela wik bilong Mei na namba wan wik bilong Jun. "Na tu ol i no registrim inap pilaia bilong ol long anda 17 na 19 divison bilong ol," Kitao i tok.

Em i tok Diwai tim i gat 16-pela pilaia bilong em long anda 17 na 19 divison bilong em na dispela namba i no bung wantaim namba em PNG Ragbi Futbol Lig i laikim long em.

Tasol tok i kamap olsem tim i no inap long kamapim ol pilaia long dispela tupela pilai long wanem ol sumatin i kisim semesta malolo bilong ol long dispela taim we lig i bin sindaun na skelim dispela as tasol i lukim olsem dispela as i no stret. Na olsem lig i pas yet long dispela disison em i mekim bipo long rausim tim long kamap long ol pilai bilong dispela sisen. Moa yet lig i lukim olsem tim i bin mekim wankain asua bipo planti taim na olsem i no gutpela lig i mas larim tim i go het yet long mekim kain asua.

## Tarangau go pas long POM lig

BIHAIN long raun 17 planti ol tim long Pot Mosbi ragbi lig i wok long resis strong long go kisim ples na go insait long ol fainol.

Tasol nau yet em i klia olsem Tarangau bai kisim ples pas we em i ron i go pas.

Nau yet em i gat 27 poin we em i foa poin i go pas long narapela tim husat i kam bihain long em.

Narapela tripela tim husat i stap baksait long em Paga Panthers husat i seriim 23 poin wantaim Post Puma na Royals i gat 22 poin. Ol narapela em Magani husat i gat 21, Souths 18, Brothers 18, West 17, Kone Tigers 16, Dobo Warriors 16, Defence 15, Hawks 14, DCA 4 na Waliya 3.

Dispela wiken long raun 18 A Gret tim bai lukim Hawks i pilaim Souths, Waliya nek wantaim Defence, Brothers takolim DCA, Royals sas wantaim Paga Dobo kalap wantaim Magani long Sarere. Sande bai lukim West pilaim Tarangau na Puma ron wantaim Kone Tigers.

# Tim PNG inap go

EM nau taim bilong flai... Mande dispela wik Papua Niugini Spot Federesen i givim K480, 420 sek mani i go long balus bilong yumi Air Niugini long satarim F-100 bilong em long kisim 130 Tim PNG memba i go long Julai-Ogas Palau mini Saut Pasifik Gems.

Dispela mani i kam long helpim bilong ol sponza olsem Trukai Industri, SP Brewery, OK Tedi na Oil Search. Bikpela bilong dispela mani i kam long 2005 Trukai Fan Ran.

"Mipela i laik toksave bai olgeta manmeri na ol gutpela na bikpela sponza bilong mipela i mas save wanem samting mipela i mekim long dispela mani," tresera bilong PNGSF ogena-ising komiti na 'chef de mission' o meri i go pas long Tim PNG, Tamzin Wardley i tok.

Em i tok Federesen i lukluk long yusim Palau Gems long developmen na givim gutpela save long ol pilai bilong em long kamap 2007 Samoa Saut Pasifik Gems.

"Trening tru bilong Saut Pasifik Gems i stat bihain long narapela i pinis na bai ron foapela yia inap long taim bilong narapela yia gen olsem na hap bilong dispela developmen program em long redim Saut Pasifik Gem developmen skwat we ol pilai kisim ekspirians long sait bilong pilai insait long ol bikpela Gem olsem Saut Pasifik Gem," em i tok.

Long 12-pela Gem we bai i kamap long Palau, PNG bai stap insait long 7-pela tasol.



Mipela inap pilai! Sampela ol PNG etlit husat i kamap na amamas long lukim PNG Spot Federesen i baim rot bilong ol long go. *Poto/stori: ANDREW MOLEN*

Ol pilai we PNG bai i stap insait ol em atletiks, basketbol, swimming, softball (ol man tasol), tennis, wetlifiting na gem we em i namba wan bilong PNG long stap insait na resis long kanu. Wardley i tok narapela ol spot olsem besbol, resling, bis volibol, tebol tennis na tra-iaton em PNG i nogat ol pilai long ol.

"Long makim maus bilong PNGSF mi laik tok tenkyu i go long ol sponza bilong mipela Air Niugini," Wardley i tok.

# Pot Mosbi hap maraton kamap gut

MOA long 33 rana bin bung long Ela Bis long las wik Sande long ronim hap maraton.

Dispela resis i stat long Ela Bis i go olgeta long rot long nambis i kamap long Baruni na Atlas Stil we ol tanim na ron i go bek long Ela Bis.

31 rana i bin pinisim dispela resis, tupela rana bin paul long rot.

Dispela resis i lukim David Ruben, Noko Negosa na Steven Aivenzie i kamap long namba wan, tu na tri ples.

Resis i bin stat long tudak yet na planti rana i hat wok tru long ron olsem rot i gat plant ol hol na em. Rot lusim Hanuabada na go olge-

ta long Baruni i gat planti bagarap long em. Na insait long Hanuabada planti pipi i stap long rot na ol dok tu i laikim traim long kaikaim ol rana. Na long hap bilong tanim planti rana i no save long wanem ol i mas tanim na olsem ol i abrusim na go longwe liklik.

Long rot i kam bek long Ela Bis sampela rona i painim hat wok long go antap long ol liklik maun-ten na olsem taim bilong ol long ron i go antap. Sampela i kamap nek drai tru long wanem ol i no karim wara bilong ol.

Sampela ol rana i no bin resis olsem long hap maraton bipo na ol

wok hat long pinisim resis.

Ol mak ol i kamap long ol em Stuart Bury (1.41.46), Jim Taylor (2.11.20) na Ila Geno (2.28.130) i painim hat wok tru long ronim longpela resis olsem hap maraton tasol ol i pinisim resis na amamas.

Joe Kim i bin wok hat tru tasol James Gurumi i bin ron wantaim em na helpim em em long pinisim resis long taim 2.52.15. Paulus Opus (2.21.48) na Martin Maire (2.26.34) i ron isi isi na pinisim resis. Nupela rana Anthony Donohue (1.51.24) i bin kam long Lae na mekim gutpela spit long dispela rot nogut.

Bikpela amamas long polis yunit

husat i bin eskot long ol rana i go long Baruni. Wantaim ol bikpela tenk yu tu i go long Simon na Roger husat i bin givim wara long ol rana. Na tu bikpela tenk yu i go long Gordon, Giri na Eddie Joe husat i bin raitim taim bilong ol rana taim ol i pinisim resis.

Planti rana i mas givim bikpela tenk yu long David Cannings husat i bin givim ples bilong silip na kaikai long Sarere nait.

Narapela hap maraton bai kamap long sampela mun bihain. Dispela hap maraton bai sta long POM Pos Opis bihainim Friwe i go olgeta long ples balus na kam bek.

# Lamana snuka tonamen stat gut

2005 Lamana Pul tonamen i stat long Sande avinun we 8-pela strongpela pilai i kamapim strongpela pilai long 5-pela frem.

Ol mak long Sande i mekim planti manmeri i kirap nogut taim ol i makim ol nem em ol manmeri i save long em olsem Tom English & Garry Welsby. Tasol long dispela taim tu ol nupela pilai tu pait hat long sait bilong ol tu.

Wantaim dispela ol mak bilong wiken i soim Grup A Bob Kerelo. i winim Maria Hayes (4-1), Grup B Gareth Welsby i go daun long Ralph Kaina (2-3), Grup 3 i lukim Kim Kala i autim tiket bilong Tom English (4-1) na Grup D i lukim Andrew Terry i autim tiket bilong Olive Gulu (3-2).

Ating long bikos ol pilai i laikim tru long win o bikos ol i bel hat we i lukim ol waitpela bal i go nabaut long ol sut we i isi tru long mekim. Dispepa i lukim planti ol pilai i lusim pilai bilong ol.

I olsem tok i stap sapos yu givim liklik spes long birua tim o pilai long stori dispela i ken givim em sans long em long wilwilim yu.

Na olsem long dispela pilai we 32 pilai bai pilai long narapela 9-pela wik ol manmeri bai lukim sampela gutpela na strongpela pilai i kamap.

Dispela pilai i save kamap long Gold Klab long olgeta Sande avinun long 6 kilok na long ol Tunde long 7:30 nait.

# Koime kamapim narapela rekot

PNG spitmeri Mae Koime i kamapim narapela nesenel rekot long Brisbane, Australia long long wiken taim em i kamap long 24.26 seken long 200 mita resis.

Em i brukim bipo rekot em yet bin kamapim 24.68 seken. Long dispela taim Koime i bin resise wantaim tupela Australia spitmeri Lauren Hewitt na Melanie Kleeberg. Tupela i win long liklik hap tasol long 2. mita.

PNG Etlit seketeri Philip Rehder i tok Koime i kamapim gutpela mak sapos ol i lukluk long sait em win i kam long em we maski em i pait egensim win em i kamap gut long stap aninit yet long 24 seken.

Long dispela Rehder i tok dispela i givim gutpela hop long PNG long mekim gut long Palau mini Gems we bai stat long Juai 24 na pinis Ogas 4.

Na Koime husat i amamas long ron bilong em i tok dispela resis long 200 mita i stap long program tru tasol ol opisel i kamapim dispela long givim sans long Hewitt husat bai kamap long Wol Sempionsip we bai kamap long Yurop long narapela wik.

Koime i tok bipo PNG kosing diarekta Tom Brandt i kamap long em na askim em sapos em i laik resis wantaim Hewitt na Kleeberg long dispela mak. Koime i tok em i laikim.

Na long wankain taim Toea Wisil i wok long kamap gut long ol ron bilong em long 300 mita resis. Long dispela mak Wisil i kamap long 41.20 seken we em i gutpela long mak em i bin kamap long em bipo.

Na long ol PNG man Wally Kirika i kamapim tu gutpela mak long kamap long taim 35.90 seken na 11.12 seken long 60 mita resis an 100 mita resis. Fabian Niulai i kamap long 35.90 seken long 300.

# Sinaugoro manmeri i kisim gutpela spot skul

PAPUA Niugini Spot Komisen na Trukai Industri i kamapim gen narapela gutpela komyuniti edukenes spot program long Sinaugoro Kaunsel eria long Sentrol provins long las wik.

Moa long 76 manmeri (42 man na 24 meri) i kamap long kisim skul long spot administresen, kosing na referring klinik na fes eid (o skul bilong marasin).

Insait long ol administresen na klinik ol manmeri i lainim ol wei bilong kamap gutpela spot lida, kamapim klab na lukautim klab, wei bilong kamapim na lukautim mani, wei bilong holim ol miting na kamapim ol kain pilai na wei ol pilai i mas kamap.

Long dispela ol manmeri i bin stap long planti ol spot ektiviti na toktok long ol samting.

Ol spot we ol manmeri i lainim long ol em volibol, netbol, tas na soka. Ol opisa bilong Komisen olsem Scott Vavine, Kila Dick, Moses Tolingling na Iga Lahari i bin givim dispela ol skul.

Vavine i tok: "Em i bin gutpela long lukim ol manmeri bilong Sinaugoro i kamap gut long dispela program we ol i bin soim bikpela laik long lain."

"Moa yet planti em i namba wan taim long ol i lainim ol nupela na gutpela wei bilong lukautim na stap insait long ol wok bilong spot. Planti i mekim ol askim we ol i no save gut yet," em i tok.


Robi Duri, siaman bilong Sinaugoro Spot kaunsel i tok em i amamas long ol opisa bilong Komisen i kamap na givim dispela kos na i tok tenk yu long Komisen na Trukai Industri.

Long ronim dispela kos Trukai Industri i bin givim spot samting, rais beg na program setifiket.

Trukai Industri Sauten rijinol sels menesa Lucy Siki i makim Industri na i tok kampani i no soim laik tasol long helpim ol spot program long nesenel level tasol moa yet long liklik ples. Ol i amamas long dispela program.

# Spot profail

## Paulus Tali i raitim



**Nem:** Josek Bomida.  
**Ples:** Simbari, Marawaka, Isten Hailens. **Krismas:** 32.  
Bomida i stat pilai olsem man bilong ron stat long 1991 i kam inap 2004. Long dispela 1991 yet em i bin kamap long PNG Saut Pasifik Gems tu.  
Long 1995 em i kamap long bikpela pilai we planti ol rana bilong PNG i bin kamap long Goroka na ol ples olsem Lae, Pot Mosbi, Mt Hagen na Goroka

we Bomida i bin kamap pes long dispela bikpela ron long Goroka i kamap namba tu long em wanpela rana bilong Lae, Peti Ken.

Long 1999 Bomida i kisim nem bilong PNG wantaim ol arapela rana bilong PNG long go long Gold Coast maraton, Australia we long dispela taim moa long 5,000 rana i bin kamap. Long dispela taim Bomida i no bin mekim gut na kamap 78 ples.

Bihain long 2002 em i go gen makim PNG na 7,000 rana kamap long olgeta hap bilong wol we em i kamap 97 ples.

Bihan tasol long ol ron em i mekim na kisim tropi we 3-pela krismas em i no bin kamap long ol pitai.

Long ausait bilong wanem em i lukim ol selekta i no bihanim gut seleksen bilong ol.

Bomida i no stop maski sampela manmeri i ting taim bilong em long resis i pinis.

Long Sande wik i go pinis Bomida i bin ron wantaim ol rana bilong Pot Mosbi we ol i ron long Must Run Challenge. Dispela resis i mekim ol i ron long bikmoning long Ela Bis go long Idubada Teknikol Koles, go olgeta long Baruni na go bek long Ela Bis long pinis. Long dispela resis em i bin kamap long 1 aua, 33 mini, 57 seken.

Tu bai disten ran bai kamap na ol bai lukluk gen long makim bes seleksen long go daun gen long Gold Coast long Julai 6 i go inap 7.

**LAE BISCUI TS CO.**

LAE BISCUI TS CO.  
BISPELA NA STRONGPELA

# WANTOK SPOTS

**LAE BISCUI TS CO.**

LAE BISCUI TS CO.  
BISPELA NA STRONGPELA



¥ Pes 30  
Moa stori  
na jon  
sempionsip

¥ Pes 31-  
Tim PNG inap  
go pilai

# SP Kap i hot

...Pot Mosbi holim tupela bikpela pilai

**James Kila i raitim**

DISPELA wiken bilong SP Inta-siti kompetisen bai paia lait gen long lukim 4-pela strongpela gem i kamap long ol bikpela senta insait long kantri long raun namba-9 bilong kompetisen.

Long Lae bai lukim Mabey & Johnson Muruks i traim bun wantaim ol asples yet em LBC Bombers, na long Mosbi bai lukim ol Coca Cola Lahanis i traim strong wantaim Monier Broncos. Gem long Goroka bai lukim Brian Bell Bulldogs i pilai egens Mt Hagen Chemica Cowboys na long Rabaul bai lukim kompetisen lida Agmak Rabaul Guria i traim bun wantaim Toyota Enga Mioks.

Dispela ol gems long dispela wiken em i lukim namba tu tai mol dispela tim i salensim ol yet na ol bai putim olgeta samting long strongim ol yet na traim pawa bilong ol yet taim ol i pilai.

Dispela gem bilong Lahanis na Broncos long Mosbi bai gutpela tru bikos Lahanis bai traim long bekim bek dispela dinau taim ol lain Broncos i bin go antap long Goroka na winim ol insait long raun namba-tu long kompetisen.

Kosa Leva Tete i save long wanem gem plen em bai yusim bikos las wiken em i mekim gut tru taim ol boi bilong em i daunim ol lain Enga Mioks 19-14.

Ol boi husat bai strongim Lahanis em ol bagaros olsem ol lain fowat Sigfred Gande, Lawrence Goive, Kasawa Kauga, Timothy na Wayne Warigiso.

Ol lain long Broncos tu em kosa bilong ol Ivan Ravu i gat plen i stap long lukim ol i givim gutpela salens long ol boi bilong kol-ples. Em i gat ol strongpela fowat we kepten Kawaga Gagman bai go pas long ol.

Dispela gem bilong Muruks na LBC Bombers tu bai i paia lait stret bikos Muruks i wok long soim olsem ol i lus long wanpela poin tasol las wiken na bai kambek strong long winim gem.

... I go moa long pes 30



**Meri save pilai osi rul!** Long dispela yia AFL PNG i bin statim program we i kisim ol skul meri long Pot Mosbi long pilai osi rul. Poto bilong Andrew Molen i soim sampela skul meri i redi long go insait long pilai bilong ol. Las wik biknem PNG osi rul pilai long Australia Mai Michael i bin kam na givim sampela trening long ol wantaim ol sinia pilai.

**PLET BILONG KAIKAI**  
3kg, 6kg, 8kg, 10kg  
na 15kg istap

**PLET BILONG WARA**  
3lt, 5lt, 6.5lt na  
10litre istap

Mipela igat kaikai  
bilong kakaruk  
Starter, Grower na Finisher  
istap long 40kg, 20kg, 10kg na  
liklik 4kg paket.

Sapotim wok didiman long yumi.

**BOROKO 325 5411 HCC, GORDONS 325 8489 HCC, LAE 472 8200 TOP TOWN 479 1916 GOROKA 732 1822 MT HAGEN 542 1999 KOKORO 982 9027 MADANG 852 1899**

**Brian Bell**  
Shop with a friend

The publisher of the newspaper is Justin Hansu Kili, MBE of Section 58, Allotment 3, Office 2, Waigani Drive